

**NATIONAL ASSEMBLY OF
SEYCHELLES**

Wednesday 09th July, 2025

The Assembly met at 0900am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab. Bonzour nou bann zofisye Lasanble e nou piblik ki pe swiv nou. Byenveni pou nou travay ozordi. Avan nou al lo biznes ki lo nou *Order Paper*, mon bezwen adres en demann pou en drwa de repons - *right of reply* dapre term ki ganny servi dan nou Konstitisyon orizinal.

Me avan mon al lo sa repons ki mon annan ozordi, mon oule repas ankor enn fwa lo prensip pou drwa repons, pou manm piblik. E sa i aköz mon'n ganny enn de fwa demann ki mon pa'n pase e mon oule fer sir ki piblik i konpran kler aköz pangar zot a dir mwan mon'n mank mon devwar anba Konstitisyon pou respekte zot drwa.

Drwa repons i ganny donnen dan Konstitisyon an koneksyon avek iminite ki Manm Lasanble i annan, pou pa ganny anmennen Ankour

aköz sa ki zot dir dan Lasanble.

Donk, fodre ki sa ki sa Manm in dir in ofans repitasyon en endividi pou li kapab reklanm sa drwa repons; drwa repons pa la zis si en manm piblik pa dakor avek sa ki'n ganny dir dan Konstitisyon.

Mon pou dan legzanp kler zis pou ilistre. Semenn avan mon ti ganny demann en *right or reply* lo *statement* ki Minis ti fer lo size taksi drayver. Sa *statement* ki ti fer dan Lasanble, pa ti mansyonnen okenn endividi dan en fason ki afekte son repitasyon.

An plis ki sa, sa let ki mon ti gannyen ti ganny mete anba *Taxi Drivers Association*. Me ti annan zis en non ki ti'n ganny grife koman sinyatir ki mon pa ti kapab lir, mon pa kapab idantifye sa dimoun ki'n ganny sa. Donk, sa osi i pa akseptab pou en drwa repons. Byensir nou pa kapab aksepte let anonim koman drwa repons.

Prezan mon a kapab pas lo sa *right of reply* ki mon annan devan mwan ozordi e sa i sorti kot Mr Didace Hoareau an referans avek en komanter fer par *Leader* Lopozisyon. Bon sa drwa repons; -

Mr Speaker, *Leader* Lopozisyon ti fer en komanter Mardi le 1 Zilyet an di-z-an sa bann parol swivan; - "sa ki pli

enteresan moniman i ganny *design* par dimoun ki'n ganny *identified* koman en *perpetrator*, i koresponn sa? I klik sa? Lespri pe *text* labous ler pe koze?" Sa ti letan *Leader* Lopozişyon ti pe koz lo Moniman Memoryal dan *Peace Park* e *victim TRNUC*.

Mr Speaker, mwan Mr Didace Hoareau, ki ti ganny sa pri pou moniman memoryal dan *Peace Park*, menm si *Leader* Lopozişyon pa'n mansyon mon non direkteman me tou dimoun i konnen poudir endirekteman i pe koz lo mwan koman en sitwayen.

Vi ki sa seremoni pri pou konpetişyon ti pas lo tou sours medya, sa konpetişyon ti ouver pou tou Seselwa, nenport ki bor ki ou ete e ki krwar i kapab fer en kontribişyon pou en keksoz nasyonal.

Mr Speaker, mon ti a kontan ki *Leader* Lopozişyon i kapab zistifye son komanter e prouv ek Lepep Seselwa kote e dan ki dokiman legal Sesel ki mwan Mr Didace Hoareau, mon'n ganny idantifye koman en *perpetrator*. Pou mwan sa i en gro lakizasyon e difamasyon mon karakter koman en sitwayen Seselwa sorti kot Lopozişyon- sorti kot *Leader* Lopozişyon, *sorry*.

Mr Speaker, mon ti a kontan demann *Leader* Lopozişyon pou retir son

komanter ki in fer e demann en leskiz anver mwan dan lasanble parey ler i ti pas son komanter. Mon ti a osi remet dan latansyon *Leader* Lopozişyon poudir mon non ti ganny mansyonnen dan en ka *TRNUC*.

Rezon se aköz mon ti pe deservi mon pei koman en zofisye militer pandan gouvèrnans son parti, (*SPUP*, *SPPF*, *Lepep*, *US*) e egzekit lord anba Prezidan sa letan France, A. Rene ki ti Komandan Sef e Brigadier Leopold Payet ki ti Sef Lafors Defans. Me, napa okenn moman dan sa ka ki *TRNUC* in war mwan koman en *perpetrator*."

Mon pou aret la, sa let drwa repons in ganny sirkile avek tou Manm, mon'n demann mon biro pou sirkil tou Manm. Si i pa ankò arive i zis ankò aköz i ti pe scan ler mon desann. Manm i a gannnen. Mon oule fer kler ki zot pou ganny sa let an antye, me mwan dan Lasanble mon'n lir zis sa bout ki koresponn avek komanter ki ti ganny fer dan Lasanble.

E sa en lot pwèn, drwa repons pa devret al dan lezot size oubyen anmèn lezot remark kont en Manm ki'n koze dan sa drwa repons. Mon bezwen adres zis sa ki'n ganny dir dan Lasanble.

Fotespere tou sa i kler.

HON SEBASTIEN PILLAY*(Off-Mic)***MR SPEAKER****HON SEBASTIEN PILLAY***(Off-Mic)***MR SPEAKER**

Onorab *Leader* Lopozisyon napa deba lo drwa repons, napa repons lo drwa repons, si ou annan en pwen ou bezwen soumet sa avek mwan an ekrir pou mwan dir.

HON SEBASTIEN PILLAY*(Off-Mic)***MR SPEAKER**

No reply. Mersi.

HON SEBASTIEN PILLAY*(Off-Mic)***MR SPEAKER**

Mersi. Napa *matter of privilege*, napa biznes ki'n ganny leve dan Lasanble.

HON SEBASTIEN PILLAY*(Off-Mic)***MR SPEAKER**

Onorab Pillay, mon'n donn mon *Ruling*, mon pe demann ou respekte li silvouple. Mersi.

Avek sa Madanm Raporter ou ava apel Minis-Vis-Prezidan pou nou kontinyen.

HON SEBASTIEN PILLAY*(Off-Mic)***MR SPEAKER**

Onorab Pillay, Onorab Pillay non. Onorab Pillay non, si ou annan en pwen pou leve an koneksyon avek sa ki'n ganny dir apros mwan e mon a donn ou laparol.

HON EGBERT AGLAE*(Off-Mic)***MR SPEAKER**

Onorab Aglae si ou annan en pwen fer li avek mwan an prive e mon a kapab gete keler ou kapab adrese.

Bon, nou a prosed lo *Second Reading Public Bills* ki lo nou *Order Paper*, mon dir bonzour Mr Ahmed Afif Vis-Prezidan, Ms Odile Vidot Direkter Zeneral *Financial Services Development Division* dan Minister Finans, Mr Paul Robert Direkter *Policy, Research and Statistics* dan *Financial services Authority*.

Mr Victor Hill Assistant Principle Legal Draftsperson dan Attorney General's Office. E apre osi nou annan Ms Hazel Lafortune *Fiduciary Supervision Director Financial Services Authority*.

Mersi zot tou pou zot prezans dan Lasanble e nou a kapab avans- nou annan 2 *Public Bills in fact*, premye ki'n

ganny liste i *International Business Companies (Amendment) Bill, 2025*, e nou a komans avek sa, donk mon a demann Mosyon pou *Second Reading*.

HON BERNARD GEORGES

Mersi Mr Speaker. Bonzour Mr Speaker, bonzour Vis-Prezidan e ou delegasyon, tou bann koleg Onorab e tou dimoun ki pe swiv nou.

Mr Speaker, *in accordance with Order 69(2) of the Standing Orders of the National Assembly I move that the International Business Companies (Amendment) Bill, 2025 be read a Second Time.*
Mersi.

MR SPEAKER

Mersi. Mon a ganny segonnman? Onorab Arissol.

HON SANDY ARISSOL

Mersi Mr Speaker. Bonzour Mr Speaker. Bonzour VP avek ou lekip, bonzour tou bann Manm Onorab, tou dimoun ki a lekout. Mosyon i ganny segonde. Mersi.

MR SPEAKER

Mersi. Vis-Prezidan, ou prezantasyon lentrodiksyon lo sa *Bill*.

VICE-PRESIDENT AHMED AFIF

Mersi bokou Mr Speaker. Bonzour Mr Speaker, bonzour *Leader Biznes Gouvernman, Leader Lopoziyon*, tou bann manm Lasanble, tou dimoun a lekout. Mr Speaker, mon pe vin devan Lasanble pou prezant serten lamannman dan Lalwa *International Business Companies Act, 2016*.

Sa bann lamannman dan Lalwa *International Business Companies* pou lannen 2025 pe propoz en seri sanzman enportan lo Lalwa prensipal ki ti ganny adopte an 2016, e osi avek bann lamannman pli resaman ki ti ganny fer an 2024.

Sa bann nouvo lamannman pe vize pou ranforsi latransparans, bonn gouvernans e asire ki bann lakonpannyen biznes enternasyonal nou apel zot *IBC* ki ganny anrezistre dan Sesel par Lotorite Servis Finansyel (FSA) i reste an konformite total avek bann standar enternasyonal sirtou bann ki ganny mete devan par *Groupe D'action Financière - FATF*.

E *forum* mondyal lo latransparans e lesanz lenformasyon pou *tax* byen koni koman *OECD*, bann standar *OECD*.

Mr Speaker, parey zot okouran Konsil Linyon Eropéen ti retir Sesel dan

Annex 1 lo lalis bann ziridiksyon ki pa korporativ pou rezon *tax*. Sa ki apel *EU black list* depi Fevriye 2024. E i ti azout Sesel lo *Annex 2* sa ki nou apel *EU grey list*. Sa determinasyon Linyon Eropéen i anliny avek revy *OECD* lo transparans e lesanz lenformasyon nou *tax*.

An Mars 2025 *OECD* in komans zot revy siplemanter lo Sesel ki nou espekte konplete an Desanm 2025. Sa revy *OECD* pou ed Linyon Eropéen lo zot desizyon lo Sesel an Fevriye 2026. Baze li zot bann analiz preliminar ki *OECD* in konplete, zot in rekomande ki Sesel i entrodwir bann lamannman dan detrw lezislasyon.

Premyerman, sa nouvo lamannman pe entrodwir en nouvo lobligasyon kot tou dimoun ki pe azir koman en *nominee member* oubyen en *shareholder* dan e lakonpannyen biznes enternasyonal pou bezwen fer en deklarasyon an ekrir dan lespas 21 zour ki zot ganny apwente koman en *nominee shareholder*.

Sa deklarasyon i devret ganny adrese lo sa lakonpannyen dan ki zot pe azir koman en *nominee shareholder* e donn detay lo zot stati koman en *nominee*. E pli enportan, donn lenformasyon ko sa dimoun

oubyen Antite ki zot pe reprezante. Savedir sa dimoun ki apel zot *nominator*.

En tel mezir i asire ki i annan latransparans lo dimoun ki vreman annan lentere finansyel oubyen kontrol lo sa bann lakonpannyen atraver striktir *shareholding*.

Pou bann *nominee* ki deza pe servi dan sa kapasite avan sa lamannman i vin an en aplikasyon, zot pou annan ziska le 15 Zilyet 2025 pou soumet zot deklarasyon. Dan ka kot i an okenn sanzman dan detay sa *nominator*, sa *nominee* li i pou bezwen notifie sa lakonpannyen e i pou enform li lo bann sanzman e soumet en nouvo deklarasyon dan 21 zour avek sa lakonpannyen.

E ler *nominee* i nepli deservi sa pozisyon, sa lakonpannyen pou osi bezwen enformen an ekrir. Sa bann amannman i osi egzize ki bann lakonpannyen biznes enternasyonal ki ganny anrezistre dan Sesel, pou bezwen gard sa bann deklarasyon en lofis dan notis zot azan Sesel.

Sa ki aple *registered agent* pou en peryod *minimum* 7an. Apre ki sa *nominee* in arete dan sa kapasite.

Sa Lalwa i osi met an plas bann sanksyon kont bann dimoun ou antite ki pa

respekte sa bann nouvo obligasyon. Si en *nominee* pa soumet deklarasyon dan sa dele letan ki'n ganny akorde, oubyen i fer en fo deklarasyon i kapab ganny kondannen pou pey en lanmann ki pa depas \$10mil an Meriken oubyen ganny mete dan prizon pou lan oubyen tou le de.

Lakonpannyen li menm i annan responsabilite pou pran aksyon kont en *nominee shareholder* ki pa an konformite avek sa bann obligasyon legal. Sa i kapab enkli restriksyon lo son drwa vote, drwa transfer son *shares*, drwa resevwar okenn benefis finansyel oubyen menm anilasyon son lentere dan lakonpannyen.

Sa bann aksyon i devret ganny dokimante e garde par sa lakonpannyen. En lot sanzman enportan se ki deklarasyon ek notis i ganny soumet par en *nominee* avek son lakonpannyen i devret ganny transfer avek nouvo azan dan kot en nouvo azan in ganny apwente.

En lot lamannman ki pe ganny propoze i viz ver bann azan *registered agent*. Anba sa propozisyon en *registered agent* pou annan opsyon pou refize donn zot konsantman pou fer sanzman koman *registered agent* si sa lakonpannyen pa pe konform avek zot bann obligasyon

legal, sirtou konsernan lenformasyon kontab.

Savedir ki an Angle nou apel *accounting records*, rezis bann Manm aksyonner, rezis bann direkter, oubyen lenformasyon lo bann propriyeter veritab. Me si en azan i deside donn konsantman malgre sa bann defayans i devret dan en dele letan 14 zour enform Rezistrar, e sa nouvo azan konsernen lo sa bann non konformite.

Sa mezir pe ganny propoze pou adres bann sityasyon kot bann lakonpannyen i refize met zot an konformite avek zot Lalwa, e olye adres zot bann defayans zot transfer kot en kot azan san ki zot regle zot bann non konformite.

En lot sanzman ki pe ganny propoze se pour donn Rezistrar e Lakour plis pouvwar pou refiz sa ki apel *restoration*, en lakonpannyen ki ganny retire lo rezis. Dan ka kot Rezistrar e Lakour i annan move lenformasyon lo sa lakonpannyen li menm oubyen lo son bann propriyeter veritab, oubyen bann *beneficial owners*.

Finalman, Lalwa pe osi amann seksyon tranzisyon ki ti form parti Lalwa lamannman 2024. Peryod ki ti permet bann lakonpannyen ki egziste ozordi e pou met zot

rezis azour avek lenformasyon lo *nominee* ek *nominator*, in ganny redir sorti 12 mwan pou vin ziska le 15 Zilyet 2025.

Mr Speaker, sa bann lamannman in ganny diskite avek sekter prive enkli sa dele letan ki mon'n fek mansyonnen e zot donn zot sipor lo sa bann propozisyon.

Mr Speaker, bann reform ki'n ganny propoze dan sa *Bill* i fondamantal pou ranforsi kredibilite nou pei koman en ziridiksyon ki serye, konform e transparan dan domenn finansyel enternasyonal. I pou donn plis lasirans bann regilater enternasyonal, bann envestiser e osi nou pep ki Sesel pe pran bann mezir konkret pou fer keksoz dan en fason modern e responsab.

Mr Speaker, mon demann sipor Lasanble pou sa Prozedlwa *International Business Companies (Amendment), 2025* pou zot konsiderasyon e laprouvasyon.

Mon demann Lasanble pou donn sipor sa *Bill* e permet nou pei kontinyen fer progres dan kad bonn gouvènanans, konformite legal e transparans finansyel. Mersi bokou Mr Speaker.

MR SPEAKER

Mersi Vis-Prezidan. Nou a pran deba lo *Bill*, e Onorab Labrosse.

HON RICHARD LABROSSE

Mersi Mr Speaker. Mr Speaker, dabor mon ti a kontan dir bonzour Vis-Prezidan, bonzour ou komite ki ou'n vin avek dan Lasanble, tou kolek ek tou dimoun ki a lekout. Mr Speaker, espesyalman osi bann dimoun ki dan lendistri ki pe ekoute la ozordi bomaten.

Mr Speaker, parey nou'n fek tande la ozordi nou pe koz li *Bill* limero 11 ki'n vin devan Lasanble. Parey Vis-Prezidan in dir sa in vin en zefor an plis pou fer ki Sesel li menm li i organiz li pli byen dan son kad legal dan sa sekter ki nou pe koz lo la, la, sa se pa lot ki sekter *offshore* parey bokou dimoun i konnen.

Mr Speaker, sa *Bill* li menm li i pe fer li vin efikas parey in ganny dir, kot i pe vin dan semen modernite parey nou konnen ki lemond an se moman zot pe bouz dan modernite e osi pou fer nou osi vin en lot laspe kot nou pe *compete* avek bann lezot ziridiksyon.

International Business Company (IBC), parey nou tou dan lendistri nou konn li byen, Mr Speaker, avan mon kontinyen osi mon ti a kontan osi deklare mon lentere osi koman en dimoun ki ankor pe travay dan sa sekter.

Parey nou konnen biznes *IBC* parey nou dir, i en prodwi ki'n zwe en gran rol dan lendistri finansyel Sesel pou en bon pe letan. Vis-Prezidan mon konnen pou kon sa tre byen, parske i en dimoun ki mon osi mon'n zwenn li ladan. Annefe Mr Speaker, Vis-Prezidan i sa dimoun ki mon ti fer mon *interview* avek ler mon ti zwenn *SIBA* sa letan pou mwan fer mon premye apersi dan sa lendistri li menm.

E sa bann letan ler lendistri li menm ti fek demare dan Sesel ti dan semen demare, Sesel ti pe fer sitan byen sa bann letan kot mon rapel sa letan ler nou ti pe travay dan *registry* kot *SIBA* sa letan ki ozordi i apel *FSA*, volim ki *IBC* ti pe antre dan pei sa letan e sa kantite ki ti pe antre dan pei e osi sa kantite dimoun ki ti pe travay dan en lendistri sa letan, e kantite konesans osi ki dimoun ti annan sa letan ek ozordi mon kapab dir ki in annan en gran diferans.

Ozordi tou dimoun ki dan lendistri zot pli byen konnen kwa ki zot pe dil avek e kwa sa lendistri li menm.

Mr Speaker, *IBC* li menm li parey mon'n dir li boner in en reveni ki atraver son rezistrasyon ki'n anmennen dan pei in anmenn bokou benefis osi atraver finansyelman.

In osi kre plizyer lazans ozordi ki'n kre plizyer lanplwa pou bokou Seselwa, in osi ede avek bann *legal* ek *accounting firm* ozordi parey nou konnen ki'n benefisye bokou e sa dan tousala li menm li i pa'n osi kit li a lekar avek bann kritik ki bann dimoun li menm ouswa bann lapres, ouswa bann endividi zot menm ki'n avek ki zot in koz lo sa bout mank transparans sirtou.

Espesyalman sirtou ler nou pe koz sa bann gro lorganizasyon ozordi ki nou pe dil avek, ki zot parfwa ki kontrol en pe parey nou konnen Sesel nou napa bokou, nou en Pti Leta Zil nou ganny kontrole bokou parfwa aköz nou napa swa dan serten keksoz. Me par egzanp ler nou pe koz ozordi dan sa ki nou pe koz lo la, la, zot in vin ek en lot lobligasyon ki'n dir nou, parey *VP* in fer resorti.

Si nou al lo en lalis non ozordi i dan li menm li i pa pou vin, i pa dan zentere okenn pti Seselwa menm bann ki pa dan lendistri ozordi.

Parske si nou al lo en lalis non ozordi, nou tou nou konnen son bann lefe ki i pou vin avek. Premye lefe prensipal ki dimoun pou kriy lasasen lo la i sa ki nou apel *correspondent banking*, si ou napa en bon *correspondent banking* dan ou pei ozordi, i pou difisil pou ou kapab fer

bann tranzaksyon enternasyonal ouswa parey nou dir bann transfer dan li menm.

E ler nou pe koz lo sa bann lorganizasyon enternasyonal ozordi ki pe met sa bann lobligasyon lo Sesel, e souvandfwa osi Mr Speaker, i fer nou osi kestyonn bann lezot ziridiksyon ki o bor nou.

Par egzanp, mwan mon ganny sans travay osi avek bann lezot ziridiksyon parey *BVI* ki nou apel li *British Virgin Island*, *Cayman Island* ek lezot ankor ki zot, zot fason fer parfwa ek sa ki Sesel i fer mon pou bezwen dir Mr Speaker, ki nou lo nou fason travay ki nou pe fer nou louvraz ozordi, nou pe met plis sa mo *compliance* ladan an menm tan osi parey nou bezwen realize nou annan nou pei osi pou nou prezerv son repitasyon.

E la mon pe bezwen dir osi Mr Speaker, mon pou bezwen felisit *FSA* e mon vwar zot reprezantan ozordi ki pe asiz akote e sa bann dimoun ozordi ki zot fason travay ozordi Mr Speaker, parey mon pe dir ki tou dimoun ozordi i konnen kwa ki zot pe fer.

FSA ozordi i sa lorganizasyon ki pe zwe en rol vreman, vreman ki mannier i vreman serye parey si nou kapab servi sa. Savedir ozordi zour *FSA* i pli avanse lo kwa ki pe pase dan bann lazans e kwa

zot menm ki zot pe espekte avek bann lazans.

E la dan li menm ler nou pe koz lo tousala zis parey mon'n deza dir dan lepase Mr Speaker, nou bezwen fer sir osi ki dan nou pei ozordi nou bezwen annan bann mekanizm an plas. Mon ankouraz plis zenn pou zwenn sa lendistri ozordi ki pe lamazorite ler nou pe koz dan lazans ki lendistri byensir ki nou bezwen admet ki son saler ki bann dimoun pe resevwar, i vreman konpetitiv ek bann lezot saler ki van dimoun pe resevwar.

I annan bann dimoun ki ganny en pti pe an plis. E parfwa ler ou war plis etranze ki pe ganny sa bann benefis i fer ou demann kestyon sirtou ek sa bann lannen ki nou pe ale ozordi.

So, la mon ti a kontan osi ki ler Vis-Prezidan i la, ler nou pe fer Lalwa pou amande pou zwenn avek norm enternasyonal Mr Speaker, ki nou osi nou bezwen fer sir ki nou met bann mekanizm an plas pou ankouraz plis zenn ozordi pou zwenn lendistri e osi bann dimoun osi ki dan lotorite osi ki nou get zot byen osi pou fer sir ki zot kontinyen devlope an menm tan osi.

Par egzanp detrwa letan pase mon ti vwar en mesaz ki ti pe ganny sirkile par bann travayer lotorite *FSA*, mon

swete ki bann keksoz in ganny get dan zot, ladan pou fer sir ki nou ankouraz zot osi Mr Speaker, pou fer zot osi kontan zot lorganizasyon travay e an menm tan pou zot delivre osi pa ek sa ki Sesel pe demande ozordi.

Mr Speaker, lo sa *Bill* li menm ler mon'n regarde mon pas en pe lo la, me keksoz osi ki mon'n vwar osi, i annan bann keksoz osi ki parey *Bill* pe demande ozordi pou fer li vin Lalwa ki i annan bann lazans osi ki pe, ki i deza ankor ki pe fer sa bann keksoz ki nou pe demande ozordi.

Mr Speaker, par egzanp ozordi nou pe koz lo responsabilite bann lazans - nou pe dir bann lasans dan li menm pou annan plis responsabilite kontrol. Par egzanp la ozordi nou pe koz lo *nominee director- nominee shareholder* parey si mon pou servi sa mo an Kreol kot nou tou nou rod en mo Kreol pou nou servi li.

Kot en dimoun li menm sa dimoun *nominee* li menm parfwa i pa sitan annan kontrol lo sa lakonpannyen, so i vin ak koman sa dimoun ki pe reprezant sa lakonpannyen. Me avek sa Lalwa ki'n anmennen ozordi devan nou ek sa *Bill* ki ozordi la, parey mon pe dir i annan bann lazans ki'n deza pe deza fer sa bann keksoz.

Me la ozordi mon swete ki avek sa Lalwa ki pou vini bann kekfw ki pa pe fer li e dan li menm i pou osi ed bann lorganizasyon lokal isi bann lotorite pou zot kapab ganny lenformasyon en pti e pli vit, en pti pe pli fasil ki ler bann keksoz ki arive ki pa abnormal.

Par egzanp nou tou nou konnen ki i annan bann dimoun ki pa servi *IBC* byen. I zis parey dan tou lezot keksoz ki nou konnen, i annan dimoun i servi *IBC* parfwa pou zot fer blansisaz larzan. Ouswa pou fer bann lezot keksoz ki an deor Lalwa.

Me ankor enn fwa la ler nou pe koz lo tousala pou met nou Lalwa annord, pou fer sir ki bann kad legal i annord ki nou pe koz lo la ozordi. E parey mon dir pli boner nou pe koz dan modernizasyon e Sesel pe bouze, bann prosedir, bann prodwi finansyel ozordi pe bouze.

E ler mon pe get *IBC* li menm Mr Speaker, mon pou bezwen dir osi ki *IBC* ozordi pa pe tro vin konpetitiv dan Sesel ek sa bann plizyer Lalwa ki ganny mete. Parey mon pe dir sa i mon lopinyon mon santi ki parfwa kekfw sa bann gro lorganizasyon kekfw i en lot keksoz ki pe demoraliz Sesel, parske Sesel parey mon ti pe dir i enn bann ziridiksyon ki ti pe fer tre byen.

E ler nou pe koz Lalwa pou vin norm ozordi, Sesel en ta Lalwa in ganny pase lo *IBC* depi ler- menm avan mon vin dan Lasanble. Parfwa mon tann menm bann lezot Onorab dan bann lezot Lasanble ki oparavan ki'n koz lo la.

E ler nou pe koz ankor bann ziridiksyon ozordi ki pe *compete* avek nou e mwan pou mwan ler mon pe koz lo lapar Richard Labrosse Mr Speaker mon santi ki sa bann gro pei parfwa zot pe *bulldoze* nou.

Parske ankor enn fwa parey mon pe dir nou napa sitan *say* pou nou dir aköz zot ki dir ki pou fer. Si nou pa fer zot pou enpoz bann keksoz lo nou ki parfwa ki mon santi kekfwa mon pa konnen si nou napa swa nou bezwen- nou, nou bezwen swiv dan sa kad legal pou fer sir ki keksoz i annord zis parey zot pe dir.

Mr Speaker, mon pou aret la li sa *Bill*, so parey mon pe dir mon pou napa swa mon pou bezwen siport mon pei, siport nou lendistri. So byensir mon pou donn mon sipor sa *Bill* ki devan nou. Mersi.

MR SPEAKER

Mersi Onorab. Onorab Pillay i annan laparol.

HON SEBASTIEN PILLAY

Mersi Mr Speaker, bonzour. Bonzour, Vis-Prezidan e lekip sorti kot *FSA* e bonzour bann

reprezantan Biro *Attorney* Prokirer Zeneral.

Mr Speaker, ozordi bomaten nou pe fer sa ki Konstitisyon i prevwar ki Lasanble i kapab fer e Konstitisyon i determinen ki bann keksoz ki nou fer dan Lasanble Nasyonal Mr Speaker. E se li ki donn nou Lasanble pouvwar pou fer lezislasyon.

I donn bokou keksoz. I enportan ki nou edik piblik lo Konstitisyon an relasyon avek nou Lasanble Nasyonal. Par egzanp Mr Speaker, Konstitisyon i dir nou i pouvwar Lasanble pou fer lezislasyon e pas lezislasyon e souvandfwa sa bann lezislasyon i annan lenportans krisyal e nasyonal pou nou pei.

I annan plizyer Lartik Konstitisyon ki dimoun i bezwen konpran, e sa i bann pouvwar e bann privez ki nou, nou gannyen koman Manm Lasanble.

Enn bann pouvwar enn bann lot pouvwar ki Konstitisyon i donn nou i dir se ki par egzanp *amongst* lezot keksoz, ler en dimoun ki- aköz mon pou al koze mon pou dir serten keksoz lo sa lendistri e mon'n fer kler, mon pou fer mon - mon pou met li lo latab pour ki tou dimoun i konpran.

Ler mon pou dir serten keksoz lo sa lendistri taler ki

anba Lartik 102(6) nou Konstitisyon *ok*, ler en dimoun olye en Manm Lasanble ki santi poudir en keksoz ki'n ganny fer par en Manm Lasanble ler in koze sa dimoun, e sa dimoun i kapab enkli en dimoun, oubyen i kapab enkli en lasosyasyon, i kapab an ekrir adres Speaker, anvoy en *reply* kot ou.

E Speaker i ava sirkil en kopi sa *reply* avek tou Manm Lasanble ki pa'n ganny fer bomaten, be selman sa i a ganny fer pli tar ler mon fini mon deba lo sa enn Lalwa. Sa pa'n ganny fer bomaten. E apre lo komansman *proceeding* sa lot *sitting* imedyatman following sa letan kot sa in ganny dir, Speaker i ava lir sa *right of reply*.

E Speaker napa drwa swazir, e mon fer kler ek piblik la deor pou zot, Speaker dan Konstitisyon napa drwa swazir e ki *right of reply* i bezwen lir li. So, si taler ler mon dir en keksoz lo sa Lalwa ki ou santi poudir mon'n dir kont ou, Speaker pa kapab swazir poudir ou'n mal sinyen parey Lasosyasyon Taksi ki la ki kler, aköz li i atak en Minis e Speaker in swazir pou pa lir.

MR SPEAKER

Onorab, ou pe pas lo en size ki mon'n *rule* lo la bomaten, ou *out of order*! Ou *out of order*! Ou *out of order* - silvouple! Mon

napa okenn lobzeksyon ki ou fer referans avek Konstitisyon, selman la ou pe zis servi sa koman en mannev pou repas lo mon *ruling*.

Mon *ruling* i annord, mon pa kapab pas en *right of reply* kot mon pa kapab- mon pa konnen lekel ki'n ekrir, setou, setou.

HON SEBASTIEN PILLAY

Off-mic

MR SPEAKER

Onorab, mon pe demann ou si ou annan komanter silvouple ou refer li an referans avek sa Lalwa. Mersi.

HON SEBASTIEN PILLAY

Mersi Mr Speaker. Mwan mon pe zis fer kler ki vwala, aköz i pou annan osi lasosyasyon bann dimoun ki relye bann diferan *corporate service provider* ki ak koman bann *registered agents*, mon kapab al dir taler serten keksoz lo serten antre zot, e anba nou *Interpretation and General Provisions Act* en dimoun i osi enkli en lasosyasyon, ALORS sa dimoun i a kapab fer son drwa de repons, parey i ganny fer e i a ganny lir.

Si i pou kritik mwan i a ganny lir, si i kritik Vis-Prezidan petet i pa pou ganny lir parey sa en i kritik Minis i pa ganny lir. So, i *ok* sa Mr Speaker, nou konpran.

E i ava osi loportinite pou mon servis mon privez pou eksprimen, dan tou ka par egzanp parey ou'n dir bomaten ou'n dir mon pa *go lo ou ruling*, par egzanp si mon ti ganny lalis *perpetrators* mon ti a konnen lekel ki *perpetrator or non* mon pa'n nonm non dimoun be selman sa i leka, ou deside, mwan mon bezwen aksepte so sa i koumsa.

So, an relasyon avek sa Lalwa Mr Speaker, kote nou pe ale ek sa? *Well*, problem ki arive ek Sesel se ki nou'n annan bann akter ki'n akt dan serten fason dan lepase ede par bann azan dan Gouvernman pou kre distorsyon an sa ki koncern regilasyon ki nou gannnen.

E ozordi nou war nou pe kontinyelman pe tay deryer e fer regilasyon, pas dan prosedir Lalwa zis pour ki nou reste an konformite. Annou koz fran Mr Speaker, pli gro *blemish* ki annan, pli gro tas nwanr ki annan lo sa lendistri se ler atraver ou Mr Speaker, Vis-Prezidan ti anmenn en amannman dan Lalwa dan sizyenm Lasanble, ki i ti amande pou fer ki kont labank i nepli ganny konsidere koman propriyete en dimoun.

E ler sa ti arive deswit bann larzan ti ganny large dan bann kont kot ti annan bann konpannyen ki Vis-Prezidan li menm ti pe asosye avek serten

lakonpannyen pou dil avek Mr Speaker. I konn tre byen li Mr Speaker, sa in ganny dir dan sa Lasanble. E pa nou ki ti pas sa Lalwa se li ki ti anmenn sa Lalwa, li son largiman se ki Prezidan Faure ki ti o pouvwar Prezidan Faure ki ti pas sa Lalwa.

Zot ti'n tyonbo Prezidan Faure koman zot mazorite dan Lasanble fors li fer sa, be selman ki ti arive konsekaman? Sitan sa lamannman ti bon sa letan, ti deswit ganny ranverse par sa menm sizyenm Lasanble pli tar pou retourn kont labank koman definisyon propriyete.

E kot nou ete ozordi prezan? Nou la ozordi kot nou ganny egzize pou nou fer en pli o nivo *compliance* koman en ziridiksyon. En pli o nivo *compliance*, akoz? Zisteman akoz nou annan bann dimoun ki'n servi sa lendistri pou move lentansyon.

Sa lendistri i en bon lendistri li tou pei i annan, e i nesaser annan akoz nou ofer lezot aktivite finansyel e ki ede e nou konpran poudir i ede anmenn reveni pou pei pandan letan *COVID*, lendistri ki ti pe anmenn preski plis reveni sa letan sete lendistri finansyel. Se sa ki nou bezwen aksepte e konpran poudir i nesaser.

Me selman Mr Speaker, i reste lefe ki nou bezwen

konpran akòz ki nou bezwen fè serten keksoz e met serten keksoz an plas.

Now, mon tann bann mirmirasyon lot kote sorti kot serten Manm lo lot kote latab, sertenman Mr Speaker, zot pou mirmire, akòz zot pa oule aksepte naryen ki ganny dir ki kont zot Gouvernman. E sa i enkli dan sa Lasanble i enkli ou Mr Speaker, nou pare pou akiz okenn Manm lo sa kote latab pou nenport kwa e ler nou, nou koze nou pa ganny drwa koze oubyen nou pa ganny drwa dir sa ki nou dir.

Ler let i dir poudir Minis i mal, nou pa pou lir, be ler let i akòz mwan poudir mon'n nonm non dimoun kan mon pa'n nonmen sa i kapab ganny lir, e lakizasyon i ganny fè kont mwan koman en mam mon pa ganny drwa reponn. E ler mon reponn ou debrouy oule koup mon mikro, oule anpes mon koze. So, Mr Speaker...

MR SPEAKER

Si ou pa annord mon pou anpes ou koze, Onorab, e la ou'n retourn ankor lo size ki mon'n dir ou evite, e mwan mon annan mon rezon kler si ou'n fè referans avek let lo desizyon, lo *statement* Minis.

Mon'n dir ou poudir rezon akòz mon pa'n pran sa se akòz napa okenn endividi ki'n ganny ofanse dan sa let,

napa okenn latak, kont okenn repitasyon endividi. E se sa ki provizyon dan Konstitisyon i kouver, setou. Onorab, silvouple si ou anvi adrese lo sa *Bill* adres lo sa *Bill*.

HON SEBASTIEN PILLAY

Mersi Mr Speaker. Si mon anvi adres lo sa *Bill*, mon anvi adres lo sa *Bill*, e mon lo sa *Bill* mwan. Mon ankor lo sa *Bill*. *Well*, wi Mr Speaker, ou konpran e se sa problem ki nou annan.

E dan Lasanble prezan in ariv en staz kot nou'n ganny dir par en *former* Manm Lasanble kot menm ler i annan en keksoz ki zot pa dakor avek lot kote latab zot tant pou aksepte. So, annou sey konpran serten eleman dan sa Lalwa ki'n vin devan nou.

Lalwa i koz lo *nominee* e *nominator* ozordi e i koz lo *self declaration*. Deklarasyon par sa endividi. *Everything* i *rely* lo, irespektiv sa ki nou pe mete dan sa Lalwa *everything* *rely* lo en *self declaration* ki bezwen ganny fè par sa dimoun ki bezwen fè sa deklarasyon. Sa lendistri i *notorious*. Pou ganny difikilte avek *self declaration*.

In fact, Mr Speaker, *as we speak* menm ler i konsern *beneficial ownership*, savedir sa dimoun ki benefisye iltim sa dimoun ki sipoze benefisye

atraver tranzaksyon ki sa lakonpannyen i fer, oubyen sa aktivite ki ganny fer, menm sa i annan difikilte pou fer sir poudir sa rezis i ganny gard annord.

So, premye kestyon ki souleve se malgre ki nou pe koz lo *taskforce* lo aksyon finansyer, ki mannyer nou pou asire e verifye ki sa *self declaration* ki'n ganny fer i en *self declaration* ki korek? Sa i en premiz enportan, nou bezwen konnen ki mannyer ki korek akoz ou bezwen konnen akoz i korek?

Akoz nou'n met lobligasyon lo sa dimoun pou li fer sa deklarasyon, e souvandfwa Mr Speaker, ler nou pe koz sa bann tranzaksyon sa bann konpannyen koumsa, sa bann dimoun zot par dan nou ziridiksyon nasyonal.

Par averti aktivite ki zot pe fer *offshore*, zot pa tonm dan nou ziridiksyon nasyonal, zot tonm an deor nou ziridiksyon. So, la nou pou bezwen angaz bann *neutral legal assistance* pou nou kapab fer sir poudir si i annan deklarasyon ki ganny fer i bezwen ganny fer dan en fason ki korek.

Dezyenmman Mr Speaker, en lot eleman enportan se ki rol ki sa *registered agent* pou zwe? *How-* akoz la ou annan 2

compliance issue la, ou annan en lo nivo sa *self declaration* ki ganny fer ek sa *registered agent and then registered agent* pou promot sa lenformasyon.

Eski nou pe *enforce* an sa ki konsern bann *registered agent compliance mechanism* ozordi? Eski nou satisfè ki nou 100poursan azour avek sa? Legalman si nou pran bann bwat nou *tick*, Lalwa *ticks all the boxes*. I fer sa ki i sipoze fer, me problemm nou ziridiksyon in toultan- e ler ou koz ek bann eksper ki vizit isi swa *FBI* swa lot i pe travay avek *FSA* ouswa *FIU* i zot ou koumsa problemm se kapasite fer *enforcement*.

So, kwa ki zot in fer pou *beef up the enforcement capacity* of bann lenstitisyon ki dil ek sa sirtou par egzanp konteks *FSA*, pou fer ki pou kapab asire ki bann deklarasyon ki ganny fer i alaoter?

Akoz se sa konsern ki'n ganny *raise* e ganny souleve, e souvandfwa nou war poudir ler i annan bann *leaks* oubyen bann skandal ki souleve dan sekter *offshore*, ou war Sesel i ganny nonmen atraver sa bann papye e non Sesel i *come up as* enn bann ziridiksyon ki son kapasite pou fer *enforcement* an relasyon bann provizyon son Lalwa i limite.

Sa i en keksoz ki nou bezwen adrese. I pa vadir ki mon pa war lesansyel Lalwa be nou bezwen adres sa bann defayans akòz se sa ki pou ger sa Lalwa kapab fer sa ganny fer. Prezan ler nou koz lo Rezistrar, mwan mon mazin sa *issue of cross border information exchange*. E Vis-Prezidan pa'n koz lo la ditou ozordi. I bezwen annan en mekanizm *for cross border information exchange*.

En kantite letan i pram. Dernyen fwa nou ti annan en problemm avek *cross border information exchange*, mon krwar nou tou nou a rapel ki ti arive an relasyon avek Labank Franse an sa ki konsern SRC. E nou ti rankontre en gro problemm avek sa. So, la ankorenn fwa nou pe al *towards* asir en pli o nivo *compliance* par bann endividi e bann akter dan sa sèkter.

E so nou, nou bezwen konnen koman en Lasanble e satisfè nou lekòr poudir lenformasyon ki bezwen ganny *exchange* pou ganny *exchange* dan en fason ki vit e fer sir poudir nou pe *comply* avek bann *request for information* ki nesese ganny donnen.

Pou le moman la, mon pa siny ki mannyer zot pou fer sa. Mon konnen nou'n met an plas mezir pou nou dil avek *beneficial ownership* e direkter e la nou pe menm koz lo

nominee e nominator so i *fluid* sa, mon kapab Nomin Mr Hill pou vin mon sa, e demen mon kapab nomin Paul pou vin mon- ak lo mon *behalf*.

So, i *fluid*, mon kapab fer li ozordi sanz sa dimoun demen, i *subject to change* baze lo mon *whim* sa ki mon anvi lekel ki reprezant mwan, so i enportan pou nou konpran sa Mr Speaker.

Prezan *internally* dan FSA *what is the independent verification mechanism* ki zot annan? Lekel mezir verifikasyon endepandan pou dir ki be mwan mon *provide* lenformasyon e sa lenformasyon i korek? *From an enforcement capacity, not even enforcement from a compliance perspective*.

If that is the case ki nou annan sa mezir an plas *then by all means* Lasanble nou aprouv sa Lalwa e nou tou nou kontan be nou bezwen ganny kler poudir *whether* lendistri e son *main* akter i annan sa kapasite pou li fer li, akòz *once again it comes back to* abilite pou fer *compliance*.

Prezan Mr Speaker, nou konnen poudir Lalwa pe osi fer provizyon *ultimately* pou li *block* pou en *registered agent* pou li kapab *block or allow changes*. Eski nou pa osi kler ler en lenstans kot en dimoun ki en *rogue agent* deside poudir lo son prop *whim*, pou

li ganny bann lezot pou li fors sa bann endividi ki pe ak lo zot *behalf* pou fer serten keksoz pou bann *additional fees*, aköz nou pe donn li en pouvwar enportan la. Nou pe donn li en pouvwar *quasi enforcements* ki FSA menm i annan.

So si sa *rogue agent* e in annan *rogue agent* Sesel Mr Speaker, e sa in ganny dekouver atraver bann diferan lenstans kot in annan bann program ki'n ganny fer lo Sesel, bann *agents* ki akt dan en fason *rogue*, dan en fason lo zot menm e met en presyon lo zot kliyan oubyen ofer zot kliyan serten servis ou demann kliyan serten legzizans ki pa nesaser.

So, sa osi nou bezwen konpran ki lotorite pou fer aköz se Lasanble ki pou pas sa Lalwa Mr Speaker. E mon dernyen pwen Mr Speaker, se an sa ki konsern *adverse information*; ou konnen sa i ganny mansyonnen partou dan Lalwa. Mon pa ankor war son vre definisyon, *adverse information*. Kwa ki nou pe dir egzaktman i *adverse information*?

Ki manner ou pou *collate* sa *adverse information* *within* sa peryod ki oule *enforce* sa *compliance*? I vin en pti pe *tricky* sa, aköz sa lorganizasyon sa konpannyen i kapab *Luxemburg*, i kapab

Switzerland, i kapab al en lot landrwa.

Now, mon pa pretann pou konn tou bann *intricacies* e tou bann teknikalite ki manner sa lendistri i fonksyonnen, me baze Lalwa kantite Lalwa ki nou'n pase dan Lasanble, in toultan *come down to 2 keksoz, enforcement* avek *compliance*. E nou ozordi dan Lasanble nou bezwen asire poudir *the enforcement capacity and the compliance capacity* i la.

So, Mr Speaker, avek sa mon krwar mon fer zistis an sa ki konsern bann eleman sa Lalwa. Mon'n osi fer zistis Konstitisyon pei pou fer sir ki sa Lasanble i respekt e sa konstitye Konstitisyon, enkli tou Manm la anndan. E Mr Speaker, apre tou byensir *with all do respect* e avek tou deferens enkli ou sez Mr Speaker. Mersi.

MR SPEAKER

Mersi Onorab. Laparol pou Onorab John Hoareau.

HON JOHN HOAREAU

Mersi Mr Speaker. Bonzour Mr Speaker, bonzour VP avek ou lekip ki'n vin anmenn sa Prozedlwa devan nou ozordi.

Mr Speaker, premyerman mon oule dir ki sa Prozedlwa i enn ki pou anmenn plis transparans, plis lesanz lenformasyon, par natir

ki pe etabli en *legal framework* dan lafason ki lenformasyon pou ganny sanze ant bann *nominee* e *FSA* e osi ant bann *nominators* ki nomin bann *nominee* avek *FSA*.

Sa i vreman enportan, akòz nou ziridiksyon koman en ziridiksyon *offshore* i ganny *monitor* par plizyer lorganizasyon enternasyonal. E i annan ki nou form parti ladan parey *ESAAMLG* ki *Eastern and Southern African Anti-Money Laundering Group*, me i annan bann lezot ki baze lerop *OECD Organization of Economics Corporation and Development*.

E tousala i annan en lizye lo nou koman en ziridiksyon, e tousala pe veye si nou *compliant* avek plizyer bann diferan *parameters* ki konsern *risk of money laundering, risk of financing or terrorism*.

Alor, i annan sa ki nou apel en evalyasyon mityel ki ganny fer lo nou ziridiksyon par *FATF, Financial Action Task Force*, e li i *provide* bann si oule bann rekomandasyon pou gete si nou *compliant* lo tou sa bann nivo oubyen si nou pa *compliant* lo sa bann nivo.

E zisteman dan leparse in ariv leka kot lenformasyon *tax* pa'n ganny esanze parey in devret dan serten dele letan avek *La France*, e se pour sela

ki ou ti ganny *backlisted* a en lepok.

Me selman parey in ganny dir poudir an Fevriye nou'n sorti ko sa *black list* ki Linyon Eropeen ti'n mete lo nou. Me osi enportan Mr Speaker, dan sa lendistri *international business*, bokou bann *beneficial owners* pa ganny trouve Sesel, zot pa pe reste Sesel.

Alor, dapre Lalwa zot ganny demande pou annan en *residential office* isi Sesel. Swa ganny reprezante par zot *CSP agents*, zot *Corporate Service Provider Agent* swa ganny reprezante par zot menm dan en laform fizikal kot zot dan en lofis ki dan en direkter e ki *conduct* si oule *business* sa *International Business Company*.

Me sa ki enportan konpran se ki atraver sa laform ki i annan en *physical presence* isi, i fer li pli bokou pli fasil pou *SFA* kapab *regulate* sa bann lakonpannyen. E dan leka ki sa *beneficial owner* li i pa kapab vin isi Sesel pou li *hold son office* pou li *physically be present therefore*, i fer sa ki nou apel, zot ganny posibilite pou zot fer sa ki nou apel *nominee directors* oubyen *nominee shareholders*.

E sa bann dimoun i ganny- swa i kapab en Seselwa, swa i kapab en lot

etranze, me selman i bezwen rezidansyel pou li kapab *provide* lenformasyon ki nesese avek FSA.

E la nou pe vwar ki Lalwa pe enpoz *liability* lo *nominator* pou li fer sir ki sa *nominee director* oubyen *shareholder* li i kapab, i bezwen ganny enformen si i annan ki son *status* ki li sa dimoun, oubyen si i annan okenn sanzman, sa bann sanzman i bezwen ganny kominike avek FSA ki *regulator within 21 days*.

Sa i fer sir ki bann lenformasyon finansyel oubyen bann lenformasyon lo sa lakonpannyen, i kapab ganny pase avek *regulator within the shortest possible time*.

Mr Speaker, sa bann keksoz parey mon'n dir i vremen enportan aköz lezot lorganizasyon mondyal i annan zot lizye lo nou. I vre ki bokou fwa dan sa Lasanble nou'n koz lo sa lipokrizi ki egziste lo nivo fason ki sa bann lorganizasyon enternasyonal i get nou koman en ziridiksyon an konparezon avek bann lezot gro ziridiksyon parey *Delaware* ki'n menm ganny en konotasyon koman *the wild west* oubyen bann lezot *crown jurisdiction* *Guernsey*, *Jersey* ki zot, zot *get away* avek *murder* ou kapab dir, zot *get away* avek bokou bann keksoz

an term *compliance* ki nou, nou pa kapab *get away* avek.

Alor, nou dan en lemonn konpetitiv, dan en lemonn kot nou bezwen navig sa bann kouran global kot nou koman en pti pei nou bezwen mentenir nou legzistans e mentenir nou prezans koman en ziridiksyon alor nou napa swa parey Onorab Labrosse in koze avan mwan in dir, me pou annan konformite avek sa bann size *compliance* ki zot met devan koman rekomandasyon.

E ler zot met sa bann size *compliance* devan, si nou pa fer sa ki zot dir nou, nou, nou santi poudir nou ganny defavorize dan lesans ki nou pa kapab mentenir nou *correspondence banking* ensidswit e nou repitasyon koman en ziridiksyon i ganny *tarnished*.

Mr Speaker, an di-z-an sa, mon oule dir poudir mon oule felisit plito, mon oule felisit plito tou sa bann travayer kot FSA aköz mwan mon konn zot *personally* detrwa zot Randolph, Virginie, Paul ki la devan Serah e lezot ankor - tou sa bann dimoun i travay *long hours* pou fer sir ki zot etabli sa *monitoring* lo sa bann lezot lakonpannyen enternasyonal.

Ennler 5er, 6er, 7er zot dan lofis, menm SS Payet son bann *Board meetings* i ale

ziske 8er diswar, alors sa bann zenn, sa bann profesyonnèl zot pe donn bokou dan sa lendistri. Me *still* mon dakor avek sa ki- en pti pwen ki *VP* in dir lo kote *capacity*, ki zot pa neseserman annan sa *full capacity* ki zot ti ava anvi annan pou zot kapab *monitor* tou keksoz dan sa lendistri.

Alor, *liability onus* i reste lo sa *nominator*, pou fer sir ki li i vin devan avek sa bann lenformasyon pou fer *FSA* konnen. Nou konnen poudir par egzanp sa bann menm Zofisye *FSA* zot bezwen *conduct* bann *roadshows* pou rod kliyan pou anmenn dan sa sektè lekonomi, zot bezwen osi an menm tan pe *monitor*, an menm tan pe *approve license* pou sa bann lakonpannyen.

Alor, ozordi nou pe vwar poudir lo nivo *capacity building*, lo nivo *capacity FSA*, i ti a bon ki zot agrandi bokou plis, me ankor lo kote kapasite i touzour en resours ase limite dan nou pei. I touzour en resours ki nou bezwen sey ankouraz bann zenn pou antre ladan akòz i annan bokou larzan ladan.

Parey sa ki'n koz avan mwan in dir, par egzanp pou en dimoun ki en *nominee director* i kapab ganny li ant \$2000 a \$3000 koman en *director* si i pe *take* en *directorship*. E si i annan li 4

directors- 4 directorship i fer li en bon pti larzan. So, i en keksoz ki rantab.

E bokou bann dimoun ki'n fer *LLB* pe zisteman fer bann *Diploma* dan *compliance* e zot pe ganny *recognize as fit and proper by FSA* pou zot kapab tenir bann pozisyon *nominee shareholders or nominee directors* dan sa bann lakonpannyen.

Mr Speaker, parey mon'n dir, i fer mon en gran plezir pou vwar poudir nou pe bouz dan bon direksyon malgre i annan bokou opresyon lo nou. Alor, mwan mon pou siport sa Lalwa e Mr Speaker, mon oule dir an finisyon ki lafyev *motorcade* i fer bokou dimoun soufer. Mersi.

MR SPEAKER

Mersi Onorab. Onorab Gill ou annan Laparol.

HON CHURCHILL GILL

Mersi Mr Speaker. Bonzour *panel*. Mr Speaker, nou pa ankor war *motorcade* oubyen nou pa oule aksepte poudir *real motorcade* pa koumsa.

Mr Speaker, mon oule aport mon sipor- mon oule anmenn detrwa konsèrn ki petet *VP* i a kapab donn son-dan son larepons, i a kapab eklersi. Pou bann Manm ki'n koze avan mwan, mon'n fer sorti ki dan sa *offshore sector* bokou fwa nou ganny enpoze

bann keksoz lo nou, e nou, nou napa swa nou bezwen aksepte.

Mwan mon pa krwar i koumsa, aköz koman en pei si nou deside antre dan en sekter, premyerman nou'n bezwen get sa sekter, kwa ki i *entail*, kwa ki nou koman en pei nou bezwen swiv, e ki bann kapasite ki nou devret annan avan nou antre dan sa sekter.

E enn fwa ki nou'n kapab fer sa, nou'n *convince* nou lekor ki nou koman en pei nou kapab antre dan sa sekter e nou pou kapab delivre mon pa krwar la aprezan nou bezwen fer sa ki nou ganny dir oubyen nou napa swa. Aköz sa i pa profesyonnel.

Dan sa Prozedlwa, in fer bann- parmi bann amannman se bann *nominee* i bezwen *disclose* an menm tan detay bann *nominator* i osi i bezwen ganny *disclose* dan en fason *signed declaration* e sa i devret ganny fer dan 21 zour. E osi bann *notice* ler i annan *seization of company*, bann notis osi i bezwen ganny donnen.

E i annan osi bann *compliance* lo bann lesanz lenformasyon ki enn fwa sa sekter i an operasyon, i bezwen respekte e fer sir ki i *comply fully* ladan. E an menm tan sa sekter parey nou'n ganny dir e nou konnen i en sekter ki i annan bokou

potansyel, e depi ler son legzistans lo rikord i kler ki kantite larzan ki sa sekter in fer, e an menm tan ki benefis an term *dividend* ki i kapab donn en Gouvernman ler ki i pe mars byen.

Me ler i vin lo term *compliance*, nou pa kapab donn leskiz kot nou bezwen swiv, aköz i form par dan sa responsabilite koman en pei ki annan en konpanyen *offshore* pou li swiv.

Alors, mon leklersisman ki mon ti a kontan *VP* i donn nou konsernan nou sekter *offshore* dan Sesel, se eski ler nou fini fer sa lamannman, Sesel i pou *fully compliant* dapre ki regilasyon enternasyonal i demann nou pou nou *comply* avek.

An menm tan si nou pa pou *fully compliant*, nou pou *partly compliant* e ki bann lezot *areas* ki Sesel pou bezwen travay lo la pou li kapab amelyor son nivo *compliance*.

E kwa, ki rezon, pou sa bann ki nou pa ankor travay lo la, aköz ki nou pa'n kapab travay lo la, la ki Lalwa in vin devan Lasanble? Aköz i ti a fer plis sans si nou ti'n kapab travay lo mazorite e la ler nou pe diskit sa Lalwa *then* nou ti kapab fer en travay bokou plis konpreansiv lo sa lamannman.

An menm tan lekel Sesel swa en dimoun, oubyen en group dimoun ki sipoze sa *watchdog* pou fer sir ki an term *compliance* pou garanti ki Sesel i pa ganny *blacklisted* oubyen ganny degrade an term *compliance*, lekel zot?

E eski zot pe fer sa travay ki'n ganny konfyè avèk zot pou zot asire ki koman en pei nou lendistri i reste prop parey i devret an term *compliance*, an term fason ki nou fonksyonnen pou atrakte plis kliyan ki pou dan benefis Sesel.

Eski sa group dimoun oubyen sa *body* ki sipoze pe fer sa travay, i a pe fer sa travay, e si non akòz? Eksi nou annan problem kapasite? Eski i mank nou serten lespertiz? E si sa i leka, ki lotorite pe deside fer pou nou kapab adres sa ban mankman?

An menm tan, eski ler nou fini ek sa lamannman apard ki sa bann klarifikasyon ki mon'n demande, eski Sesel i avangard an term i pe gete, i annan sa group dimoun ki pe get be ki nouvo keksoz ki pe ganny arive dan sa sekter ki nou petet nou devret pe tir lesan ladan.

Oubyen nou devret pe komans fer bann travay de baz. Ki ler letan in arive kot sa bann keksoz i vin lo nou an term *compliance* pou nou fer nou ava'n pare e i a pran nou

pli pti git letan pou nou adrese. Akòz sa ki mon pe al adrese mannyer mon konpran i pa en keksoz ki fek vin devan mon la, i annan en pe letan depi ler nou ti sipoze pe fer sa travay.

E la osi petet VP i ava eksplik nou kwa ki'n koz sa retar ki nou pa'n kapab delivre sa bokou pli boner. E an menm tan lo bann- ler i annan bann *meeting* enternasyonal konsernan *offshore sector*.

Eski nou annan sa profesyonnel ki kapab al attend sa *meeting* lo nou *behalf* e ki kapab dan plas parey nou'n ganny dir i zis swiv kot nou osi kapab fer sir ki nou konteks Sesel anver sa ki zot, zot pe dir nou. I pa vedir kot nou pa pou swiv, me selman i annan nou devret kapab annan serten keksoz kot nou osi nou fer sorti e dan konteks Sesel nou pou nou ti a pli bon si nou fer koumsa.

Sa osi ti a bon VP dir nou si nou annan sa lavwa oubyen sa profesyonnel ki ler i annan sa bann *meeting* enportan sa bann dimoun i ale, e nou lavwa i ganny tande, oubyen i tre difisil pou nou fer pase nou konsern e an rezilta i vin parey nou'n ganny dir laplipar moman nou bezwen swiv dan plas petet fer sorti nou konsern e debout ferm lo nou konsern.

Mon ti a vouldre ki VP i donn sa bann leksplikasyon mon krwar sa i bann keksoz tre fondamantal ki i ava donn en apersi pli kler vremen leta kapasite sa *sector*, an menm tan si *moving forward* nou annan bann fason fer ki sa *sector* pou kapab bokou pli popiler dan Larezyon oubyen enternasyonal.

E sa en retour i ava granti bokou plis biznes pou sa sekter. Mersi Mr Speaker.

MR SPEAKER

Mersi Onorab. Mon a pas laparol Onorab Clifford Andre.

HON CLIFFORD ANDRE

Mersi Mr Speaker. Bonzour VP ek ou delegasyon. Bonzour tou Manm Onorab e tou dimoun ki a lekout.

Mr Speaker, *IBC* oubyen si mon dir Sekter Finansyel, i trwazyenm *pillar* nou lekonomi apre tourizm, lapes e li i ti ganny entrodwir pou anmenn en pe reveni adisyonnèl dan nou pei.

E i en sekter ki si oule i anmenn bokou deviz dan nou pei, i kapab fer nou fonksyonnen parey in ganny dir lepok *COVID* sete sa sekter ki ti pe soutenir nou akòz nou ti napa touris e lapes ti an restriksyon. So bann dimoun pa ti kapab al fer zot aktivite parey zot ti a swete fer. Alors, sa i en sekter ki'n kontribye

plennman dan nou devlopman.

An di-z-an sa Mr Speaker, bokou biznes in ganny anrezistre, parey nou dir *IBC*, *International Business Company* in ganny anrezistre Sesel.

E sa in fer bokou kot sa bann biznes ti ete oubyen kot zot ti pe *operate* pa tro, tro kontan akòz Sesel letan mon'n pas en pti kou dan bann rev *internet* e *AI* i dir ki poudir *0 tax*. Si zot pe *operate* an deor zot pa ganny takse Sesel e sa i vin 0, me si zot anrezistre Sesel zot in anrezistre.

E sa i koz bokou konsern. Mwan mon konsern avek sa Mr Speaker, se pa sa lamannman ki devan nou e ki mannyer nou koman en pti ziridiksyon- mon mazine *VP* ou ava dakor avek mwan nou lebra i ganny parey nou dir *arm twisting*, akòz nou ptipti nenk i vire i vire menm pov dyab i fermal nou bezwen dir ayoyo.

Onorab Gill in dir ki poudir letan nou dir napa swa i pa profesyonnel, mon osi mon santi ki i pa byen letan nou, nou en pei dan lemonn nou annan nou *sovereignty* nou. E akòz ou santi ki poudir si nou, nou pe- nou pa pe vol person, nou pa pe fer krim, me nou en pti pei nou dir nou ava sey sirviv lo nou menm, akòz nou pa oule toultan ale

nou dir nou a pran en pti *loan*, donn mwan isi, donn mwan en pti *grant*.

Ou konnen i fermal ennler letan ou gete ou kapab *operate*, ou kapab fer serten aktivite ki ava ed ou pou ou kapab soulaz ou pep e travay en pti pe lo ki mannyer ou fer desann ou pri lavi. Me selman ou war ou ganny pri avek bann lobligasyon oubyen bann demann enternasyonal ki vin dir ou vin fer.

Me si ou get byen, mon, mon konsern letan mon koz avek *panel* ki vin dan *Bills Committee* se *where will it stop, or will it ever stop?* Ou konpran, konmsi nou fer enn nou dir nou a sorti lo *grey* nou ava al lo *white* en kou, en lot keksoz i arive laba i tir ou lo *white* i anvoy ou lo *grey*.

Me selman Mr Speaker, mwan mon konsern se par ler letan zot met sa bann restriksyon ki nou sey *comply* avek, ou war ki poudir si en lakonpannyen pe sorti dan ou ziridiksyon pe al kot sanmenm sa enn ki pe dir ou ki ou pe mal fer. Li i pa pe fer li selman, i pa fer li. Letan nou annan en lareg ki enternasyonal mon panse i devret pou tou, ou dan en gran pei ki devlope, ou dan en pti Leta Zil ki pe devlope i bezwen parey.

Me ou konnen, mwan osi mon pou felisit bann travayer kou *Financial Services*

Authority, mon dir koumsa aköz pangar mon kapab manke dir *Seychelles Fishing Authority* so mon bezwen dir koumsa.

Ki zot travay dir wi, kekfwä Onorab Hoareau i konnen zot bann *odd working hours*, be mwan mon pa tro konn zot bann *odd working hours*, me selman mon konnen zot travay dir letan zot pe sey met nou *at par* avek lemonn enternasyonal.

Me selman en kestyon ki Onorab Gill in demande eski nou annan profesyonnel, mon konnen dan ki kapasite, dan ki konteks i pe demann sa, se si letan nou al kont sa bann antite enternasyonal ki pe demann nou pou fer keksoz si nou vremen kapab lager, mon konnen zot lager enormeman.

Selman par ler selman nou bezwen dir be *ok*, si i pou ed mon pei pou li sorti lo *grey* pou al lo *white* oubyen sorti lo sorti lo *black* pou li mont lo *grey* e nou pa pou perdi nou *correspondence banking* ki vremen enportan parey in ganny dir nou bezwen esey *comply* avek serten zot bann demann. Me mon konnen zot lager for pou osi sanze par ler e fer ki i vin dan diferan konteks.

Se sa ki mon ti anvi dir Mr Speaker, lo baz sa travay ki nou fer avek *OECD* avek *FATF*, i enorm sa latas, i enorm sa

latas pou en pei parey Sesel. Me selman *we rise above it all*.

Yer letan nou ti pe fer-Minister Later ti pe fer prezantasyon CEO Jitesh ti dir *we don't have a silver bullet*. Me par ler lemonn, lorganizasyon enternasyonal i oule krwar ki poudir nou kapab annan en *silver bullet*, *because we rise above everything* e nou ale nou fer sa ki foudre fer.

Me an di-z-an sa Mr Speaker, letan mon pe get sa lamannman dan son leksplikasyon VP, premye leksplikasyon i dir "*just introduce a requirement for all nominee to disclose their nominee status and details of their nominator through a signed declaration.*"

Eski sa i vedir aköz nou pa kapab ganny sa stati avek bann *nominator*? Ki prezan nou pe sey obliz *the nominee director* pou li *disclose* lenformasyon *of the nominator* Parler, VP i annan, e *Financial Services Authority* par ler i annan dimoun ki ganny aprozé par entemedyer pou li vin en *nominee director or a nominee shareholder* pou diferan rezon.

Me i posib osi li sa *nominee director or shareholder doesn't even know the beneficial owner of the IBC to which* li i pe fer sa louvraz *nominee*. So, e dan Lalwa

nou'n mete ki i en lofans, so eski sa pti \$2000 ki parey Onorab Hoareau in dir si ou annan 4 i fer ou \$8000, mon krwar i ti pe kalkil serten ki lo la.

Eski i pa pou fer ki sa dimoun prezan i pou bezwen al rode lekel ki pe *nominate* mwan - konmsi pa mwan me sa dimoun ki pe ganny *nominated, who is nominating the person* e al rod *status of the nominator*. Par ler osi *nominator* pa neseserman *the beneficial owner*, i kapab *the CSP or the registered agent, I mean, definitely*.

Selman eski i pa pe met en presyon lo sa dimoun dan plas, dan plas *Financial Services Authority* letan i pe form sa *IBC* li rod tou sa lenformasyon, ki i ava annan sa lenformasyon, aköz eski nou pa pe *shift* sa responsabilite prezan lo sa *nominee director nominee shareholder* pou li al fer sa resers e fer sir ki i annan sa lenformasyon?

Aküz letan nou dir, poudir *is putting* son status, nou detaye *what is the status*, e pou nou fer sa, so mon santi nou pe met en pti pe presyon kekfwa VP ou a kapab eksplik mwan. Letan mon get ankor seksyon 277 dan *the main Act* ki pe ganny amande pou fer provizyon ki parey ou'n dir bann rezon ki Lakour i kapab

reinstate sa konpannyen *on the register*, i pou varye i pou depan e sa pe donn Lakour en pe plis fleksibilite.

Eski letan mon get 277 i donn en bon pe rezon aköz ou aköz non i pa kapab oubyen i bezwen *reinstate* en *struck off company*. So, mon santi kekfwa nou pou bezwen en pti ep plis detay e leksplikasyon letan ou fer ou *summing up*. Prenan kont tousala, mwan mon en patriyot, mon pou siport mon pei pou fer sir ki nou an konformite avek nou lobligasyon enternasyonal.

Me selman parey mon'n dir, mon krwar nou bezwen koz avek sa bann lorganizasyon e mon konnen nou fer *review* detanzaot, me selman i paret mwan letan zot fer *review*, zot vin avek en keksoz safwasi letan nou dil avek sa enn zot donn nou en lo *next time* letan nou al *review*.

Konmsi si zot ti kapab posibleman donn nou en *at least* en *one-year comprehensive necessity* ki nou annan pou nou fer, epi nou ti ava gete donn nou bann *timeline* definitivman nou a gete ki mannyer nou kapab fer. *At least* mon ava ganny Lalwa pe vini *in respect of* nou *compliance every year if not every 2 years*.

Me selman mon konpran kekfwa tou le lannen, pa tou, le, *the review is happening*

mon krwar tou le 3 mwan oubyen tou le 6 mwan. E sak fwa nou ale i annan en keksoz ki nou bezwen fer. Be donn nou en- parey mon pe dir en *comprehensive review proposal* ki nou kapab travay lo la. Koman en pti pei aköz nou an lezot keksoz kekfwa ki nou bezwen fer ki nou bezwen fer sir ki nou kontinyelman kolekte.

So avek sa detrwa mo e sa bann konsern ki mon'n leve VP, mon oule reasir ou ki parey mon'n dir, mwan mon pou toultan siport lamannman ki nou bezwen fer si i pou met nou dan en pli bon pozisyon ki nou deza ete, oubyen i pou gard nou dan en pozisyon davans ki nou deza ete ozordi.

Avek sa detrwa mo Mr Speaker, mon oule remersye ou e dir avek VP ki mwan mon pou donn li mon sipor pou sa bann lamannman. Mersi.

MR SPEAKER

Mersi Onorab. E laparol pou Onorab Egbert Aglae.

HON EGBERT AGLAE

Mersi Mr Speaker. Mon a dir bonzour VP avek *panel* ek tou dimoun ki al ekout.

Mr Speaker, sa lamannman dan *IBC Act* ki la devan nou i pa premye fwa ki bann tel lamannman parey pe vin devan nou. E sizyenm Lasanble nou'n war plizyer

lamannman dan bann Lalwa lenstriman finansyel ki gouvern nou Sekter *Offshore*, ok?

E Sesel, in enn bann ziridiksyon ki'n touzour, mon pou met li koumsa mon, in touzour ganny targete ok, *alongside* bann lezot pti ziridiksyon ki ti ganny, ki ti antre dan bann lendistri *offshore* e ki'n war zot dan bann- lo bann diferan lalis ki'n ganny *blacklisted*, *grey listed* e byen rar ki ou war sa bann ziridiksyon i antre lo en sa ki nou apel zot *achieve the white list status*.

Mon dir sa koz i annan pou mwan, sizyenm Lasanble mon pa ti tro konpran sa sekter *as such*, e mon'n fer li mon devwar pou konpran en pti gin, aköz mon annan zanmi osi ki travay dan sa sekter e ozordi zot akont ou bann diferan difikilte ki zot bezwen e fer fas avek aköz zot pe travay an tayan dan en sans aköz *goal post* tanzantan pe sanze, *in regards to bann compliance* ok.

E sa li menm li letan mon pe konpran sa sekter, byensir ou annan sa kliyan ki li i anvi fer en lenvestisman li, ok, e letan i anvi fer en lenvestisman premyerman i bezwen asir sekirite son lenvestisman ok.

E osi souvandfwa i annan detrwa zot ki par deryer

sa bann lenvestisman dan sa bann sekter ki zot anvi reste pa neseserman *anonymous* me selman zot pa anvi vin dan *limelight* of bann sityasyon finansyel ekonomik zot anvi reste deryer zot annan larzan zot ok.

E letan mon pe regard lafason ki sa sekter i *operate* byensir, prezan ou annan ou bann gran pei, e la i annan bann blok parey Linyon Eropéen ki annan en rezon aköz bann dimoun, sa bann dimoun investiser zot sorti dan serten lenvestisman dan sa bann pei ki zot al ver sa bann lezot ziridiksyon aköz i annan bann favorizasyon kot i konsern *tax*, ok?

Zot pa pe ganny- zot pa pe pey sa kantite *tax*, e pou zot koman en biznes, koman en dimoun ki annan en ta larzan li pou li *as much as possible* ki i pey mwens *tax* i dan son lavantaz. E se la kot problemm letan in ariv sa bann *shift* kot bokou in al ver bann *offshore* sectors dan bann ziridiksyon e la bann target in komanse, ok.

Wi, in annan bann lenstans kot nou'n koz lo *money laundering* kot larzan sal ti pe ganny servi dan bann diferan ziridiksyon par serten. Me mwan mon pa pou la ladan la ozordi, mon anvi regard la realite.

Prezan ki arive la realite se ki letan ou annan sa bann

blok parey Linyon Eropeen ki zot ozordi dan en fason zot pe kontrol, zot pe egzers kontrol lo sa bann pti ziridiksyon avek serten bi mon pou met li propagann ekonomik targete avek serten sa bann investiser i fer ki nou koman en pei ki nou'n akey sa bann investiser avek bon lentansyon.

Akoz en pei parey in dir trwazyenm pilye lekonomi nou'n *offshore sectors* e dan letan *COVID* plizyer milyon Dolar in ede kit lekonomi pei a flot. E nou avek nou bon lentansyon pou akey sa bann lenvestiser dan pei pou *setup* sa bann lakonpannyen nou war nou dan bann lenplikasyon kot nou ganny targete aköz osi nou form parti bann plizyer konvansyon enternasyonal kot i konsern bann Lalwa *tax* finansyel. *Ok.*

E ki nou'n war, dan serten lenstans ki'n fer mon rapel ti annan en pei sa ti *La France* ki ti pe *request* avek *SRC* sa letan, serten lenformasyon *tax* finansyel lo serten lakonpannyen ki i pa ti gannnen. *Ok?*

E nou ti war poudir i ti annan bann rezon i ti annan kad legal osi ki ti egziste an term prosedir ki i pa ti ep permet sa ganny fer. E Sesel i ganny li *blacklisted*. *Ok?* Par *the global forum on transparency and exchange*

information. Zot ti war nou koman *partially compliant, ok?*

Sesel in fer son bann bout mon rapel plizyer repriz *SS Payet* in vin dan sa Lasanble e Minis osi Hasaan sa letan, pou anmenn bann lamannman pou kapab redres en pti gin sityasyon ki Sesel i ladan lo sa lalis. E nou'n sorti, nou ti bouze 2024 kot nou'n mont lo sa *grey list* e la nou ti ganny regarde koman en pei ki ti pe- mon kapab dir obzerv bann demann, nou ti pe komans obzerv bann demann.

Be mwan mon santi poudir kote nou ale? Ki zistans? Aköz letan ou pe get sa bann Lalwa sirtou *BO, Beneficial Ownership* tanzantan *goalpost* pe sanze aköz sityasyon ek global i sanze.

Prezan nou koman en pei byensir letan bann *goalpost* pe sanze nou pe bezwen touzour war nou pe tay dryer koman en ziridiksyon la nou, napa swa la nou, nou bezwen kontinyen tay deryer pou *meet* sa standar ki sa bann pei pe demande *otherwise* ou pou regrese lo sa bann lalis ki i mete e ou pou war nou dan bann diferan sityasyon. *Ok.*

Ozordi, Sesel pe montre son komitman li, pou li sorti koman en ziridiksyon ki pe ganny kategorize koman annan bann *harmful tax practises*, pou nou vin avek

enn ki lo en nivo pli konplayans- *compliant* e ki nou kapab dir nou pe *meet* sa *international tax standard requirement*.

Me dan en lot kote, parey mon ti dir lo komansman nou bezwen mazin sa sekter avek son bann kliyan osi li, bann kliyan pe *monitor* sa bann kalite - kwa ki nou pe fer koman en pei osi. E zot osi zot fer zot bann *assessment* sa bann *companies* lo si i annan bann lefe ki kapab met an danze zot loperasyon, lentegrite ouswa sa nivo *secrecy* osi ki annan dan sa sekter.

Malgre nou bann Lalwa domestik i dir poudir parey anba *Beneficial Ownership* ou bezwen deklare ou bann *directors and so on*. Me eski nou bezwen ganny forse pou nou letan nou pe *domesticate* nou Lalwa pou nou bezwen ganny forse pou donn sa bann lenformasyon avek sa bann blok ekonomik parey *EU*?

Mwan pou mon sa i bann kestyon Konstitisyon pei i fer ki nou en pei souvren e ki nou pa merit pe ganny soubze dan en fason soubzektif pou ganny forse pou nou *comply*, aköz? Nou pe regard nou lekonomi nou, *ok*. San ki nou bezwen dir nou pe al fer bann akt ilegal koman en pei, aköz nou koman en pei nou pa finans teroris nou pa pe antren- nou

reste nou dan en fason *nonaligned* avek bann konfli enternasyonal ki arive me selman nou'n *welcome* lenvestisman, plizyer lenvestisman. Dan nou sistenm *offshore*.

So, i annan en nivo lipokrizi ki nou'n bezwen mwan mon reflesir lo la aköz parey nou dir the *New World Order* ki pe vini la ki swadizan i annan bokou pe prese, se zis pou egzers kontrol lo nou koman en pti pei souvren.

Se sa ki pe arive, mon pa krwar i annan en lentansyon pozitiv par deryer sa bann keksoz ki zot pe met devan ki pou benefisye nou *in the long run* par fer sa konmkwa- letan nou pou fer sa nou pou ganny plis lenvestisman, non, non, non nou pa pou gannyen plis lenvestisman.

O kontrè i *raise the red flag* avek bann ki anvi vin dan nou ziridiksyon pou dir be mon pa tro *safe* ozordi ek sa ta lamannman dan Lalwa ki pe ganny pase, mon pa tro krwar mon an sekirite, mon pa tro krwar mon lidantite ou mon kredibilite koman en envestiser pou ganny proteze aköz nenport ler zot kapab zis demande, e nou, nou pou bezwen donner.

So, i- mon konnen koman en pei nou napa tro gran swa aköz nou depan lo sa bann *economic block* parfwa,

nou Sekter Touris sirtou i kapab ganny penalize si nou pa neseserman *être compliance*.

Me selman an regard an tousala e se sa ou war ki serten, petet i annan pa pou kontan ler mon pou dir sa, en ler i annan serten pei Lafrik pe sey pran zot desten dan zot lanmen pou sey bouze e pou *breakaway* avek sa bann *colonial master* dan en sans mon pou dir.

Me selman nou koman en pei vi ki nou pa pe prodwi preski naryen, nou depan lo sours reveni deviz etranzer aköz nou enport en kantite. sa i pou met nou an konfli avek sa bann gran blok enternasyonal parey bann lezot pti Leta Zil ki pe pas atraver ozordi. Dan *Bahamas*, *Belize*, *Turks and Caicos* diferan zot, zot in war zot lo bann *black list*.

So, an termin an Mr Speaker, eski nou pou kapab a en pwen arive fer sa bann lorganizasyon satisfè poudir Sesel i pe *fully comply*, i ava antre ek en *white list*? Eski nou pou arive fer sa? Mon pa tro krwar mon, pa tro krwar.

Nou pou war lamannman dan lamannman ki pou vini, wityenm Lasanble pou annan lamannman ki pou vin ankor. Aköz *goalpost* tanzantan pe sanze, baze lo bann norm enternasyonal ki pe arive,

bann nouvo fason tranzaksyon ki pe ganny fer ki zot detekte dan bann lenstriman finansyel, dan bann tranzaksyon ekonomik, tousala, tanzantan i sanze i annan nouvo.

So, nou ava touzour pe war nou pe fer bann lamannman, lamannman ziska ler mon pa konnen ki ava arive. *So, this is my opinion* Mr Speaker, mon pa pe dir i devret koumsa, me selman i mon lopinyon e mon ava aret lanmenm pou le moman.

Me selman mon kontan mon pei, parey Onorab. Angle i dir nou bezwen *abide* avek sa bann lorganizasyon, sansan nou war nou dan problemm. Mersi.

MR SPEAKER

Mersi Onorab. Bon, nou'n ariv ler pou pran en poz nou a repran deba 11er. Mersi.

(BREAK)

MR SPEAKER

Bon, mersi pou rezwenn. Laparol pou Onorab Waven William.

HON WAVEN WILLIAM

Mersi Mr Speaker. Bonzour tou dimoun ki a lekout. Mr Speaker, Sesel i en manm *task force* aksyon finansyel ki en lorganizasyon entergouvernmental kre an

1989 atraver linisyativ
groupman *P G7*.

Mr Speaker, i bon ki an menm tan ki mon pe al koz lo sa lamannman. Mon krwar i bon ki nou fer nou pep deor konpran en pti pe sityasyon ki bokou de fwa nou war nou ladan. Akoz parfwa lo bann program lo radyo, ouswa televizyon nou tann bann dimoun pe demande ki nou koman Manm Parlman nou fer tandè nou lavwa pou kapab sanz bann sityasyon.

Me nou bezwen fer konpran nou pep ki i annan serten keksoz ki Gouvernman Sesel, menm Parlman pa pou kapab sanze e mon pou tonm dakor avek Mr Laporte ki ti dan 'Lopinyon' yer swar ki letan ti pe koz lo sa size lendepondans Mr Laporte i dir "be non, nou pa endepandan nou" e lo sa size nou pe koz lo la Mr Speaker, mon pou dir ki nou pa endepandan.

E nou kapab dir ki nou dan bann *era modern slavery* e *modern colonialism*, letan ou pe fer fas ek sa bann tel sityasyon. Mr Speaker, letan nou pe koz bann *P G7* or *G7*, nou pe koz lo bann pei endistriyalize parey *Canada*, *La France*, *Allemagne*, *Italy*, *Zapon*, *Grande Bretagne* e Leta-z-Ini ki enkli Linyon Eropen bann pei Linyon Eropen ki apepre 27 zot.

So se sa bann pei ozordi ki *call the shot* Mr Speaker, lo sa bann size. Sesel pa *call the shots*. E zot, zot bann *watch dog*, se zot ki set stander pou evit bann tel aktivite krim ilegal, finansyel e domaz kapab ganny fer dan en sosyete.

Mr Speaker, prezan lekel *OECD*? *OECD* i en lorganizasyon Polisi global ki promot Polisi ki pou lev nivo byennet ekonomik sosyal, sitwayen lemonn e soustenabilite. I konpri 37 pei Mr Speaker.

Me la ankor Mr Speaker, letan ou regard sa ki zot pe dir dan li menm li e ler ou pe regard sa ki bann pti pei pe fer fas avek atraver bann tel lamannman ki nou bezwen fer, Mr Speaker, letan ou pe dir be ou pe an vi ki tou bann pei i rezouir sa bann menm benefis Mr Speaker, dan li menm li i pa vreman *equal to what it is being said*.

Mr Speaker, sa lorganizasyon i set standar ki biznes global i ganny fer byen, promot latransparans e rann kont ek drwa imen i ganny osi proteze. I ed sa ki fer Polisi pou pli byen evalye e lev nivo kad legal reglemante e kad enstitisyonnel ver bonn gouvènanans.

Sesel pa en manm sa lorganizasyon me manm en lot lorganizasyon sirveyans

rezyonal Les Sidafriken Anti-Blansisaz Larzan ki nou apel *ESAAMLG*. Sesel depi Fevriye 2024 nepli lo lalis nwanr Mr Speaker, me in bouz lo *grey list* koman en ziridiksyon ki pa pe korpere. Sesel ti ganny mete lo sa lalis nwanr depi Oktob 2023, ler lorganizasyon korperasyon ekonomik e devlopman *OECD* ti fer son evalyasyon. Lalis gri i vedir se bann pei ki pe ganny plis sirveye kot i konsern aktivite blansisaz larzan, finansman terorizm e aprovizyonman larzan ouswa materyo ki pou fasilite devlopman ouswa akizisyon, ouswa materyo nikleer, kemikal, swa zouti biolojik.

Mr Speaker, lemonn ozordi in sitan boulderse ki sa bann keksoz pe arive Sesel pa pe ganny eparye si nou, nou pa vey byen. Mr Speaker, pou sorti lo lalis gri, ki ganny pli sirveye pou al lo lalis blan, bann pei ki pli *compliant* ek standar enternasyonal ki fer sa perse.

I neser ki en pei i demontre progre signifikan e soutenab pou adres ban defayans dan aktivite blansisaz larzan, *counter terrorist financing*. Mr Speaker, avan ki mon terminen mon ti a kontan lir detrwa fraz kot la zot dir ki bann konsekans ki kapab arive avek en pei si i pa

vin *compliant* e mon pou lir li an Angle.

“Consequences of non-compliance: -

Countries on the grey list face increased monitoring and may experience negative consequences including potential economic sanctions from international institutions and reputational damage.

Continued non-compliance may lead to a country being added to the FATF black list which carries more saviour sanctions and reputational damage.

In essence, moving from the grey list to the white list requires a sustained and demonstrable commitment to international standards for AML and CTF including robust legal framework effective implementation and strong international corporation”.

So, Mr Speaker, nou bezwen fer sa bann lamannman, nou bezwen pas zot e parey lezot Manm in ganny dir *goalpost* pou toultan ganny sanze e nou kapab dir ki laplenn dan sa sekter i pa nivo e i pa pou zanmen nivo Mr Speaker.

E nou pou annan toultan bann *New World Order* ki koman en pti pei sel keksoz ki nou bezwen fer se kontinyelman koze Mr Speaker, kontinyelman koze, annan sa dyalog e activate

bann deba ou kozri lo en baz diplomatik.

Mr Speaker, e pou konklir ki mwan mon annan pou dir, par lefe ki la nou sorti lo *black list* nou lo *grey list*, mon ti a kontan demann avek Vis-Prezidan baze lo bann prosedir, eski li a se moman avek bann teknisyen ki travay kot SFA ki dabor mon felisit zot, eski li i vwar ki avek bann prosen evalyasyon Sesel i kapab bouz lo *the white list*? Eski sa i posib?

E dezyenmman, mon anvi demande si dan sa sekter la, la zot annan ase zouti ouswa resours pou fer sa travay? Akoz letan mon'n get bann konsekans i demontre ki si nou pa vizilan pou kapab sivre kwa ki pe arive enternasyonalman avek bann nouvo mon kapab dir baryer teknik, nou pou ganny kit deryer.

I fer mon rapel an 2016, 2017 letan nou de Onorab Clifford Andre nou ti pe *attend* sesyon Parlman ACPU, letan non Sesel ti monte nou ti santi nou anbarase, e nou ti demande be ou a dir mwan ki'n arive eski nou annan ase resours? Bann dimoun ti pe veye ki pe arive pou fer sir ki nou pa ariv lo sa *black list*.

Me an menm tan mon anvi osi dir ki petet nou devret ankouraz plis nou bann zen osi Liniversite ou kapab pran

bann pozisyon dan kot FSA pou fer sir ki nou annan ase resours kalifye pou kapab kontinyen fer bann sirveyans e fer sa bann travay laba.

Mr Speaker, dan sa sans la, la nou lo *grey list* e mwan ki mon pou dir se kit li lanmenm *no turning back, no turning back*, pou nou pa retourn ankore lo lalis nwanr me i pou kontinyen ale pou ariv lo *white list*. Mersi Mr Speaker.

MR SPEAKER

Mersi Onorab. Onorab Georges.

HON BERNARD GEORGES

Mersi Mr Speaker. Mr Speaker, sa set en deba regilye ki nou annan *at least* en fwa par an e pou menm rezon a sak fwa se akoz *squeeze in* ganny mete lo nou e nou bezwen *comply*.

E, annan de fwa mon demann mon lekor si i pa ti ava pli bon *tape* enn sa bann deba apre rezwe li en fwa tou le an, akoz mou dir menm zafer ou menm rezon e ziska ler en nouvo set demann i ganny mete par FATF oubyen OECD e nou bezwen *comply* avek.

E fodre pa nou krwar ki sa ki nou pe fer se nou pa pe *dance to the tune of somebody else*, akoz set egzakteman sa ki nou pe fer. Tou sa bann seri

Bill ki vin devan nou se bann *Bill* ki pe reazir avek en demann ki'n ganny enpoze lo nou, e mon krwar nou bezwen regard sa kler devan nou e eksepte larealite.

I byen ki nou pe sey navig dan en sityasyon ki difisil e ki pa nou sityasyon, me larealite se larealite e mon ava dir zot larealite *like it or not* pou sa lendistri *the writing is on the wall*, e sa i kler pou en senp rezon; -nou en ziridiksyon ki'n fer tre byen e felisitasyon pou sa Lalwa sa lankadremman pou bann dimoun ki travay dan sa sekter, pou sa sekter li menm, ki anploy bokou dimoun ki'n donn en kantite kapasite dimoun *lawyers and accountants*, bann dimoun dan lespas finansyel in en gran sikse, e in sov nou dan plizyer difikilte ler nou bann sekter tradisyonnèl pa ti kapab azir.

So, for all those reasons, mon krwar nou bezwen dir felisitasyon nou'n byen travay, nou annan en sekter ki prodiktiv e nou bezwen gard nou alaoter. *All of this is a given*, me *what is the future* Mr Speaker, of sa sekter? Akoz annou pa bliye, sekter finansyel sirtou o nivo kot nou, nou'n plas nou lekor, se sa ki nou fer an grann parti se anrezistre lakonpannyen pou bann dimoun ki pa reste Sesel.

E i *obvious* ki ladan i annan en bon pe dimoun ki fer li lo en bonn rezon, aköz zot anvi aste en later oubyen en lakaz e zot pa anvi met li lo non en lakonpannyen dan zot prop pei, alor zot swazir en ziridiksyon *offshore, very good reason, perfectly legal*, nou napa okenn problem avek sa.

Me i osi i anmenn en serten dimoun ki pe anvi fer sa pou zot *at the best avoid tax* dan zot pei e sa ankor enn fwa set en keksoz ki toutafe normal pou sa endividi me ki pa normal ditou pou sa pei ki pe fye lo *tax* pou li fer marse son lekonomi.

E *at the worst*, en bann dimoun ki pou servi sa lopasite en tel sistenm pou zot fer kontrebann pou zot finans bann keksoz ki pa legal e pou zot fer tou bann keksoz ki nou'n koz lo la. So, nou annan sa *range* bann nesessite bann rezon aköz dimoun i servi nou ziridiksyon.

E nou pa kapab Mr Speaker, e nou napa drwa blanm bann pei pli devlope ki nou, ki pe rod met presyon lo nou pou anpes nou donn en landrwa enn zot sitwayen oubyen enn zot biznes pou pa pey *tax* dan zot pei. *It's normal*, nou, nou ti pou fer parey. So, nou pa kapab blanm lezot aköz nou, nou pe fer li.

Nou'n benefisye atraver sa sistenm parey mon'n dir e

mwan mon napa okenn problemm avek. *I, personally* mon pa dan sa sistenm, mon pa'n anvi al ladan, me Onorab Richard Labrosse ek plizyer lezot in fer li e mon tir mon sapo avek zot aköz zot pe rann en servis e zot pe anmenn bokou resours dan nou pei. *E chapeau to them.*

Me nou bezwen- nou bezwen konsyan Mr Speaker, ki sak fwa ki nou vin devan sa Lasanble, leto in ser ankor en pti pe plis e i pou kontinyen sere pou bann rezon ki mon'n donnen ziska ler ki sa sekter pou nepli prodiktif, i pou- *the risks of keeping it* i pou pli gran ki *the benefits* ki nou pe gannyen.

So, ler nou, nou fer en *risk benefit analysis* a en serten moman nou pou bezwen dir *it's not worth it* annou- abandonnen i en gro mo, me annou reform nou sistenm, annou al dan en lot direksyon, annou tout an gardan en servis finansyel annou rann en servis ki dimoun i bezwen san ki nou pe ed dimoun kontrol en Lalwa dan zot pei.

E nou vwar bokou pei in fer, nou, nou pa ankor ariv lo sa nivo, mon ti ava swete ki nou ariv lo sa nivo, ler mon al Moris e mon pas o bor *Cyber City* e mon vwar tou sa bann lakonpannyen ki'n anrezistre zot *head office, Cyber City*

ozordi in vin en pti *Luxemburg* Mr Speaker, kot ou pase ou war bann labank eksetera ki'n anrezistre Moris.

E se la kot Moris i ganny larzan aköz zot pe *manage the headquarters* sa labank i la, *for tax reasons*, me zot annan en *management structure* ki nou, nou pa ankor ariv a sa nivo. E nou bezwen arive, nou bezwen aret zis *register companies incorporate companies* \$1000, \$1000, \$1000, \$1000 e ofer en servis p enportan.

E sa bann zenn dimoun parey Onorab Richard Labrosse e tou sa bann kantite zenn dimoun ki travay dan sa sekter e ki travay a en tre o nivo e ki perform ekstremman byen e ki anmenn zoli larzan kot zot an deviz, nou bezwen ankouraz zot pou zot fer sa tranzisyon pou sorti lo en sekter ki i annan danze e ki zis *basically* sa ki nou pe fer, nou pe enkorpor konpani al dan en sekter ki pli prodiktif e ki mwen risk, mwen *risky*.

E mon krwar e mon ava demann avek bann dimoun lo panel ozordi, ler zot reponn asir mwan ki nou vizyon se al dan sa direksyon, e nou pa pou kapab, nou pa pou bezwen alor tou le an vini e aksepte en lot *turn of the screw* lo nou sekter ki nou annan la ozordi.

E nou'n vwar sa Mr Speaker, *right across* depi sa sekter in komans an 1978 sa, *Decree 45/78* mon rapel tre byen *was the very first shot* e se la kot sekter *offshore* in antre Sesel. *And at that point*, a sa moman i ti *completely opaque*, ou pa ti konn naryen e ou pa ti annan drwa konn naryen.

E bann lezot pei pa ti ankor *up to the mark*, me o firamezir ki bann ziridiksyon in devlope in grandi annou pa bliye *Hong Kong, Singapore* eksetera zot in komans koumsa zot, be ozordi zot in *move away* zot dan en- Moris pe swiv zot, *the Singapore of the Indian Ocean* e nou osi nou bezwen *zwe catchup*.

Me sa ki nou'n vwar depi '78, atraver bann Lalwa ki'n pase atraver bann amannman ki ganny fer regilyerman, se ki sak fwa sa opasite i ganny redwir, premye keksoz ou ti bezwen devwal lekel ki direkter, lekel ki *shareholders* ou bezwen devwal *accounts* apre ou bezwen en *UBO*, la prezan ou bezwen avek sa bann amannman ou bezwen devwale lekel ki *nominees*.

So, bann pei deor, gradyelman zot pe diminyen rezondet sa sekter, aköz zour ki zot pou kapab ganny akse avek tou lenformasyon *there will be very little purpose* pou vin isi Sesel pou anrezistre en

konpannyen, *might as well do it* dan ou prop ziridiksyon.

And that's where we're going, se pour sa rezon ki komanse an di-z-an, *the writing is on the wall*. E sa ki nou bezwen fer koman en pei e sa ki nou koman Manm Lasanble isi nou bezwen ankouraze e mon sir ki Minister avek *FSA* pe fer se diriz nou dan sa direksyon, pour ki nou pa pou annan en deba regilye lo sa bann mezir ki ganny enpoz lo nou tanzantan.

Ler mon dir tousala Mr Speaker, mon konsyan ki etandonnen ki nou napa bokou resours natirel annefe nou annan zis 2, nou pwason avek nou labote, nou pe vin apard lendistri lapas ki en lendistri *manufacturing* nou kapab dir, apard sa tou bann lendistri se bann lendistri servis.

E nou tre bon koman en pep dan lendistri servis. Tourizm nou en *benchmark*, dimoun i vin isi pou aprann avek nou ki mannyer pou *manage* touris dan en fason soutenab e dan en fason kot reveni i osi o. E en lot *say the service industry- the financial services industry* ki nou pe koz lo la ozordi.

E antretan an mezir ki nou pe rod lezot *service industry*, mwan mon rapel ozordi atraver sa Lalwa, pour

ki olye zis debat lo en lot blokaz ki zot in met devan nou e pou annan en lot ankor ki pou vini lannen prosenn e pou annan en lot ankor apre, olye debat lo la annou *jettison* sa e annou rod amelyor nou fason fer.

Avan ki *OECD* ek *FATF* i ariv kot nou, annou deza nou'n ariv en pa *let's get ahead of them*. Olye *instead of being reactive let's be proactive for once* e annou bouz nou sekter annou atir bann lendistri tel parey Moris in fer, annou donn zot sa lespas loportinite pou zot kapab vini.

E ki pou nou dimoun ki travay dan sa sekter zot ava sorti dan zis en sekter *template* kot ou pe fer menm keksoz *over and over again* e ou pe al dan en sekter kot ou pe ofer en servis tel parey nou'n fer avek lendistri tourizm, ou pe fer en servis odeganm e a kalite kot dimoun pou kontan vin isi Sesel.

Alor Mr Speaker, mon lapel ozordi se sa, se annou servi sa Lalwa ki devan nou ozordi koman en *warning* pou nou sanz nou sistenm, *get ahead of the curve* e fer ki nou ava annan en sistenm finansyel *in fact recently* nou'n agrandi nou sistenm avek *virtual assets* par egzanp. Sa se bann pa dan en tre bon direksyon.

This is where I think we need to position ourselves Mr Speaker, aköz nou annan kapasite, nou annan bann dimoun ki kapab fer sa, mwan mon zanmen mon arete emerveye par bann zenn Seselwa ek zenn Seselwaz dan sekter finansye, ki i zot rezonnman lafason ki zot vi annan de fwa demann en *advice* me zot in fini konvenki *advice* ki zot anvi.

So, these are steps in the right direction e nou bezwen ankouraz sa, e mon demann avek *panel* pou dir mwan e pou satisfè mwan ki *the thinking is there* e ki bann blok, bann *building blocks* pe ganny met an plas pour ki nou ariv la.

Finalman Mr Speaker, avek ou permisyon permet mwan briyevman e san kontrovers, san kontrovers mansyonn nou Konstitisyon avek Lartik 102. E mon ti anvi fer li bomaten me mon pa'n anvi enteronp deba. I annan en keksoz ki nou, ki fodre nou retenir, e sa se lo liminite ki nou bann Manm nou annan isi dan Lasanble Nasyonal pou koz fran.

Ou'n tous lo la e ou annan parfetman rezon ki se an repons a nou liminite anba Lartik 102 ki i annan en *right of reply* anba Lartik 102(6) me en keksoz Mr Speaker, ki pa kontrovers mon dir li fran, en

keksoz ki fodre pa nou bliye se ki fodre zis Manm ki annan sa privez, se zis Manm ki annan sa liminite. Dan sa Lasanble i annan zis ou e nou ki asiz isi anba, napa okenn dimoun dan sa *panel* la devan ki annan liminite.

Minis si i dir en keksoz i napa okenn liminite se zis nou ki *enjoy* sa liminite. Alors, si Minis i dir en keksoz, napa *right of reply from* piblik lo sa ki Minis in dir, sa *right of reply* i zis pou Manm. Si nou lir Konstitisyon- e mon ti konnen *Leader* Lopozisyon ti pe konplent, si i lir Konstitisyon i ava war sa.

(Interruptions)

MR SPEAKER

Onorab Georges! Onorab Georges en pti moman. Mon apresye sa pwen ki ou'n fer, lezot osi in fer ant, ant koumsa pwen ki mon'n les pase, selman mon'n dil avek sa pwen. Alor fer li kourt e nou a terminen. Mersi.

HON BERNARD GEORGES

Mon'n fini fer li Mr Speaker, ler Onorab *Leader* Lopozisyon i a don mwan laparol ankor mon ava dir ki mon apresye *VP* avek pou *panel* lafason ki ou'n eksplik sa *Bill* devan nou.

E mon demann ou silvouple ed mwan dan mon refleksyon bomaten e reasir

mwan ki lo nivo Gouvernman nou pe deza al dan en direksyon kot nou pa pou bezwen tou le- -zan vini e demann en lamannman aköz en presyon ki'n ganny met lo nou *from abroad*. Mersi Mr Speaker.

MR SPEAKER

Mersi Onorab. Onorab Woodcock.

HON WAVEL WOODCOCK

Mersi Mr Speaker. Mr Speaker, mon krwar i enportan pou mon koriz sa ki *Leader* Lopozisyon in dir lo sa *Bill* ki mon krwar i *misleading*. In dir ki keksoz in vin pli *worst* anba ladministrasyon aktyel.

Mr Speaker, avan lannen 2021 anba ladministrasyon *US*, ti annan plizyer problem avek lafason ki bann *International Business Companies IBCs* ti pe fonksyonnen Sesel. Bann gran lorganizasyon parey plizyer bann Manm in mansyonnen parey *OECD* ek *FATF* ti montre zot lenkyetid e zot ti menm dir nou, zot ti menm *threaten* pou *back list* nou Mr Speaker.

Avan 2021 enn, Mr Speaker, nou pa ti pe gard ase bon lenformasyon lo lekel ki vreman propriyeter bann lakonpannyen. Dezyenmman ti annan tro bokou lakonpannyen ki ti pe servi

Sesel zis pou evit pey *tax* dan zot pei e dan lezot pei.

Trwazyenmman Mr Speaker, nou sistenm ti mank latransparans e ti kapab fasilite *money laundering*, blansisaz larzan oubyen lezot aktivite ilegal parey *drug trafficking* e *terrorism*.

Fodre pa zanmen bliye Mr Speaker, *le fame Pandora Papers* kot ti annan sa bann *shell companies* anrezistre isi Sesel ki ti ganny *link* avek koripsyon, *embezzlement*, *bribery* e *laundering* larzan, blansisaz larzan atraver Sesel Mr Speaker.

E dan nou pei Mr Speaker, en kantite keksoz in pase disparisyon \$50 milyon, legzanp Irlande, *LDFIU* avek zot bann *shell companies* Moris, zot ti pe *embezzle* larzan Lepep Seselwa kot zot ti pe pey zot prop lekor. Avan 2021, nou ti napa ase kontrol ek lenspeksyon lo bann lakonpannyen *offshore* ki anrezistre isi Sesel.

Me Mr Speaker, apre 2021 nou'n war ki nou ladministrasyon in fer ki nou Gouvernman-ladministrasyon *LDS* in fer, parey zot in anmenn plizyer reform pou nou vin pli *compliant* avek bann Lalwa e standar enternasyonal.

Enn Mr Speaker, *IBC Act* ti ganny amande pou fer li nou pli for e pli kler. Nou'n

entrodwir bann *register* kot i nesaser pou konnen lekel ki par deryer en lakopnopnanyen, sa ki nou apel *beneficial owners*. Nou'n amelyor kontrol lo bann labank ek bann lezot biznes finansyel.

Nou'n travay avek lezot pei pou partaz lenformasyon, lesanz lenformasyon e ede dan lalit kont blansisaz larzan, tou sa in arive anba nou ladministrasyon. Akoz sa bann mezir Mr Speaker, Sesel ti ganny retire lo *black list*, Linyon Eropeen e nou'n fer progre pou sorti lo *grey list FATF*.

Sa bann larzan in fer Sesel- sa bann sanzman Mr Speaker, in fer Sesel vin pli serye, pli *compliant* avek bann standar e norm enternasyonal e gard en bon nivo repitasyon lo nivo enternasyonal sirtou avek sa bann gran lorganizasyon.

Mr Speaker, sa *Bill* ki devan nou *International Business Companies (Amendment) Bill, 2025* mon pou siporte aköz i annan en rol vremen enportan pou zwe dan devlopman ekonomik nou pei. Sa *Bill* i fer serten amannman dan Lalwa ki konsernan *IBCs* e sa bann *IBCs* parey bann Manm in eksplike se bann konpannyen ki ganny anrezistre Sesel me zot fer

biznes enternasyonal dan lezot pei.

E Lalwa *IBC* i enportan aköz se sa Lalwa ki fer Sesel reste konpetitiv dan domenn servis finansyel, enternasyonal e i en sekter ki anmenn en kantite reveni pou nou pei Sesel e bokou bann zenn i pe *operate* dan sa sekter.

E dan sa domenn keksoz i sanz sitan vitman e i annan-parey bann Manm in dir bokou presyon enternasyonal *LGB* in eksplik sa tre byen ek lezot Manm osi zot in koz lo la ki parfwa ki souvandfwa zot fors Sesel e bann lezot pei osi pou met zot Lalwa- pou amann zot Lalwa met zot Lalwa azour avek bann standar enorm enternasyonal.

E nou koman en pei nou bezwen fer sir ki nou Lalwa i reflekte enn bann bon prensip gouvènanans e ki respektè sa bann standar enternasyonal - sirtou bann ki ganny mete par bann lorganizasyon parey *OECD* ek *financial action taskforce* aköz Mr Speaker, nou pa anvi war nou ganny *black listed*. Ankor ouswa nou war nou konman en pti pei Sesel pe persi *correspondent banking*.

E alor Mr Speaker, avek sa 2 mo, parey bann Manm in dir e nou napa swa nou bezwen met nou azour avek bann norm enternasyonal e

mon pou bezwen- e nou tou ki la anndan mon konnen nou pou bezwen sipòrt sa lamannman, avek sa 2 mo, mon dir ou mersi Mr Speaker.

MR SPEAKER

Mersi Onorab. Tou Manm ki mon ti annan lo mon lalis in entervenir, e alor nou kapab demann *VP* pou fer son repons lo deba. Vis-Prezidan?

VICE-PRESIDENT AHMED AFIF

Mersi bokou Mr Speaker. Mr Speaker, mon ti a kontan tou dabor remersye tou bann Manm ki'n entervenir, i paret mwan laplipar an faver sa *Bill* e mon profit sa lokazyon petet pou reponn enn de bann konsern en kestyon ki'n souleve atraver sa deba.

Mon krwar en kantite bann pwen ki'n ganny leve bomaten i konsern kote nou pe ale e sa direksyon zeneral ki nou pe swiv, presyon ki ganny met lo nou koman en pti pei pou nou vin annakor avek sa ki serten pei i krwar i devret lareg e ki parfwa kan ou regard lemonn e lafason ki keksoz i evolue, petet zot servi nou koman bann pti pei ki- pou met bann kontrol ki en pe plis strik ki dan okenn lezot ziridiksyon.

Aküz i pli fasil pou met presyon lo en pti pei ki zot realize i totalman depandan lo

zot e prensipalman li son ki bokou bann Mann in sirte tel ki *correspondence banking* e pou bann tranzaksyon i bezwen pas atraver zot.

E vreman ler ou regarde ou lekonomi an zeneral i depan en kantite Lo sa bann pei ki bokou pli for ki ou, e ki alor i annan sa pouvwar pou kapab vreman egzers presyon lo ou pou ou aksepte bokou bann kondisyon ki zot met lo ou.

Be sa ki mon ti a kontan dir avek Lasanble Nasyonal e tou dimoun ki pe ekoute se ki nou koman en Gouvernman nou osi realize ki parey bokou Manm in dir nou en pei souvren, nou annan nou konesans, nou konnen kwa ki zis, kwa ki marse e kote e si i annan okenn menas eski i sorti kot nou e ki fason nou kapab redwir sa bann menas.

E mon krwar o firamezir bann lannen in pase, i annan bokou letan ki nou dan sa sekter depi 1995 ki nou dan sa sekter, kot nou'n pas Lalwa pou anrezistre lakonpannyen. Sekter li menm in evolye e sa Lalwa ki devan nou ozordi li, li menm ti la depi 95 me ti annan en revizyon sibstansyel an 2016 e depi sa toultan in annan serten revizyon sibstansyel.

Me selman, bokou Manm in demande eski nou pou aksepte ki tou le lannen nou

pou bezwen vin ankor avek nouvo *Bill* e nouvo amannman aköz bann regilater enternasyonal i met presyon lo nou?

Larepons pou mwan se parfwa nou pa konnen si nou pou bezwen vin avek nouvo lamannman. Nou, nou krwar bann lamannman prensipal ki zot ti pe demande in deza ganny fer e kwa ki vreman zot ti pe demande, zot ti pe dir be nou, nou annan lakonpannyen Sesel, souvandfwa bann propriyeter sa bann lakonpannyen se dimoun ki sorti kot zot menm dan Lerop oubyen bann gro pei endistriyalize.

Zot, zot anvi konnen be lekel as bann dimoun ki'n vin anrezistre dan nou pti pei lwen ek zot pou fer biznes san ki zot, zot konnen lekel sa bann dimoun. Alor se sa zot konsern, alors zot dir nou, nou Lalwa pa pe permet ki ler zot demann lenformasyon nou, nou tann zot sa lenformasyon.

Prezan nou dir zot be nou, nou napa sa bann lenformasyon -n dir be fodre ou annan, alor nou sanz Lalwa ki dir fodre ou anrezistre propriyeter sa bann lakonpannyen ou met li dan en rezis e ou fer li aksesib avek lotorite me pa piblik. Nou'n fer sa.

E apre zot dir be sa pa ase, fodre ki ou fer ki sa bann

lakonpannyen i gard rikord zot bann tranzaksyon sa osi fodre nou war. Prezan nou dir, be zot soumet zot bann *report*, pa avek nou aköz souvandfwa zot pa zis zot, zot anrezistre i osi me selman loperasyon i deor.

Nou dir be fodre ou al rod sa bann *record*. Si in fer en lagreman ek en lot lakonpannyen, si in resevwar larzan, kote son larzan i ale, dan en labank Langleter fodre ou fer nou konnen. Prezan nou dir be sa bann rikord pa isi sa rikord i ganny garde kot son bann sekreter lakonpannyen deor. I dir non pa ase sa, fer li anmenn tou sa rikord Sesel, nou'n fer sa.

Apré dan 2018, 19 zot vin kot nou zot dir fodre ou dir nou si en dimoun i dir lo paye li ki propriyeter sa lakonpannyen, si li vre propriyeter oubyen i pe maske pou en lot dimoun. E si i pe fer sa, fodre i deklare e sa fodre i al dan en rezis. Fodre nou konnen kot sa rezis i ete. Sa osi nou'n fer, non pas *Beneficial Ownership Act*, nou'n amann li, nou'n fer tou sa bann keksoz.

Alor, la ozordi ki i pe demann nou ankor, i dir be tousala i bon sa, selman prezan parfwa sa bann propriyeter vre propriyeter i nomin en dimoun, li i *nominator* i nomin en dimoun i apel *nominee*, i dir be sa

dimoun ki pou al reprezant mwan dan tou *meeting*, i pa ale li. *Annual General Meeting* oubyen dan en *Board meeting*, Direkter i pa ale li.

Prezan zot retourn kot nou zot dir nou be sa dimoun pa ale *meeting* sa enn ki dan rezis li i annan en *nominee* li, fodre ou fer antre- fodre ou fer nou konnen tou bann *nominees*, la i la sa lamannman devan nou ozordi. Nou pe fer konnen lekel bann *nominee* e lekel ki ti nomin li, *nominator*.

Alor sa vre propriyeter *nominator* in nomin li, apré dan milye semen i sanze, zour i sanze fodre i dir prezan la i dir ek nou, anba sa lamannman i mete sa bann *nominee* i bezwen gard rikord pou 7an. Tousala nou pe fer.

Alor zot kestyon eski lannen prosenn zot pou vin en lot e nou, nou pou tay ek en *Bill* ankor nou pou vin sanze. Mon krwar laplipar keksoz ki pou donn latransparans lo lafason bann lakonpannyen i egziste ozordi nou a pe fer ozordi nou.

Mon pa konnen si pou annan bann nouvo demann par bann regilater deor, me selman pou nou, sa ki enportan pou nou se ki nou reste dan lizye bann regilater koman en ziridiksyon kredib, sa i enportan pou nou, e parfwa, Onorab Gill mon

krwar ti mansyonn sa taler, aköz ki sa in vin la prezan, si nou ti konn sa depi avan?

E larepons Onorab se ki parfwa pa koman i koze laba i dir ou on oule lalis *nominees*, mon oule lalis *nominators* fodre gard rikord pou 7an ki ou bezwen taye pou fer deswit, aköz? Aköz i annan dan zot ziridiksyon menm pa ankor fer, e i annan bann lezot pli pti pei pa ankor fer, i pa en standar sa i en demann e zot pe demann tou dimoun fer.

Me si ou premye pei pou al fer, apre i komans ki ou pou realize se biznes pou nepli vin kot ou pou serten rezon komersyal. Biznes pou al en lot landrwa alors nou tant pou tenir e en pti pe sa ki Onorab Georges pe demande, eski toultan nou pou taye nou pou zis kriye nou pou dir be *ok* be wi be nou bezwen aksepte.

Oubyen ou regard en pe lanvironnman, ou kalkil en pe ou balans en pe ou bann opsyon e kart ki ou kapab zwe e ou dir ek zot be *ok* la mon ariv en staz kot mon santi mon pare pou sa. E parfwa ou kapab dir ou pa pare aköz ou napa resours, par egzanp si ou pou ensiste poudir ou pou fer tou lakonpannyen gard tou rikord pou 7an.

I dir fodre le 15 Zilyet fodre ou'n pare, e si le 15 Zilyet ou napa lenspekter pou al fer tou sa bann vizit, eski i vo

lapenn ou pase? Aköz ler zot ou vin fer odit lo ou, zot pou vini zot pou dir be ou'n pas, be nou pa'n war ou bann rapor, be ou napa oditer ou. Sanmenm sa ou demann en dele letan ki rezonnab pou ou kapab fer sa.

Alor parfwa i annan tou sa bann rezonnman ki fer ki bann *Bill* i ganny pase a serten ler aköz i baze lo- en lot rezon ankor se parske ou anvi annan diskisyon avek sekter, ou pa kapab zis ou koman en Gouvernman ou pe koz ek en lot Gouvernman oubyen regilater ek regilater me ou pran tou zot komanter ou tay avek ou ale ou al fer.

Aküz sekter i bezwen mars ansanm avek ou, nou, nou pa kapab depan antyerman lo nou pouvwar ki nou annan, en kantite bann pouvwar ekonomik i avek sekter li menm e alor nou depan lo zot alor i depan ki mannyer diskisyon i al ek zot pou nou get bann praktikalite avan ki nou tonm dakor lo son bann dele keler nou pou anmenn sa.

Byensir, i annan lezot lafet ankor - konbyen letan osi pran pou formil sa bann lamannman, resours entern legal pou transformen, tou sa bann demann an term lezislasyon pe anmenn devan Lasanble Nasyonal. So, tousala se bann rezonnman.

Onorab Gill ti osi demande be eski nou benefisye ler nou fer sa bann keksoz? E wi, mon krwar ti annan en konferans 2 semenn pase ou 3 semenn pase ki ti ganny fer par *Africa initiative* e Sesel lo *Africa initiative*, ki vreman i regroup bann pei Afriken ansanm ek bann regilater tel ki *EU* avek *Global Forum*, sa bann pei Afriken i asiz ansanm ek zot e Sesel i *co-chair* nou se *Commissioner General SRC co-chair* lo la.

E atraver zot, zot in sa travay ki zot, zot fer zot in dekouver poudir i annan anviron 4000 milyon oubyen €4 bilyon larzan *tax* ki pa pe ganny peye parmi bann pei Afriken. E 2.5 dan sa 4bilyon i prensipalman aköz zot pa pe sanz lenformasyon.

Alor, si nou vreman nou annan en lankadremman serye ek Lalwa, mon krwar i pou kler poudir en bon pe sa bann larzan ki kapab vin kot Sesel tou, aköz pa bliye nou'n sanz nou Lalwa, lontan nou ti apel zot *offshore companies* aköz zot ti *offshore*, zot pa ti lo nou teritwar zot, zis sa anrezistre lo nou teritwar selman zot ti kapab *operate* an deor. Zis an deor, pa lo Sesel.

Ozordi nou'n sanz Lalwa ki ou nepli *offshore*. Zot in apel zot prezan *International Business Companies* aköz zot osi annan drwa *operate* Sesel

sa bann lakonpannyen. Me nou Lalwa *Tax* i dir si ou *operate* Sesel e ou kliyantel ou pe servi en kliyantel Seselwa, *then* ou pou pey *tax* Sesel, si ou pe servi en kliyantel an deor zot kapab dir be ou pa vreman merit pey *tax*.

Be si zot pe fer serten aktivite atraver Sesel ki *tax* i krwar sa *tax* i devret ganny peye Sesel, i annan reveni sibstansyel ki kapab vin pou Sesel. Alor, ler nou fer sa bann kalite evalyasyon nou konnen lekel vre propriyeter, nou konnen kote vre biznes pe ganny fer atraver deklarasyon ki zot bezwen gard pou 7an, i kapab anmenn reveni non selman pou Sesel, me pou lezot pei dan larezyon alor i kapab fer nou zirisdiksyon monte.

Onorab William ti pe demande si mon krwar nou pou sirtou lo sa *white list*- lo sa *grey list* ki nou ete *European Union*, pa bliye poudir Sesel in sorti lo *black list La France* an Fevriye 2024, me nou pa ankor sorti lo *grey list* Linyon Eropeen. Me atraver sa bann sanzman ki nou pe fer e i kapab annan ankor lezot sanzman pandan lannen lo *Companies Act*, lo *AML*.

E ankor sa pou vin esperon en pe pli tar. Nou krwar poudir nou pou annan sifizaman rezon pou montre

Linyon Eropeen *FATF*, *OECD* poudir Sesel i serye. Nou serye dan nou bann demars pou fer sir ki tou biznes ki pas atraver Sesel, atraver lakonpannyen Seselwa ki en lakonpannyen lokal, ki en lakonpannyen *IBC* tousala i transparan dan dan Sesel.

E nou espere kapab konvenk zot me i pa depan lo nou antyerman. Zot in fini aktyelman fer zot revi lo Sesel zot, la zot pe prepar zot rapor, la zot in fini prepar zot rapor inisyal zot pou re anvoy li kot nou, nou pou fer komantr lo la, nou pou retourn kot zot atraver zot bann striktir e nou espekte ver lafen lannen oubyen boner lannen prosenn ki zot pou pas zot revi final lo Sesel.

Si tou i al byen, mon espere ki Fevriye 2026 nou pou sorti lo sa *grey list* Linyon Eropeen. Sa si tou keksoz i al byen, e nou, nou pou fer tou e mon kont lo zot sipor dan sa *Bill* ki la pou nou kapab pas sa osi e i annan enn apre *Limited Partnership* osi e si nou kapab fer li i pou ed nou en kantite.

Mr Speaker, mon krwar mon'n reponn bokou bann pwen ki'n ganny souleve. Ou konnen i sagrinan parfwa ou ganny lakizasyon atraver en *Bill*, me parol i fasil, parol i fasil dir lakizasyon i fasil dir. Me mon krwar lefe bann *facts*

ki reste i pou montre kote Sesel i ete.

Nou, nou rikord i kler nou, e rikord avan nou letan *LDS* i kler. Se avan nou letan ki ler ou ti demann kestyon avek bann regilater ki zot ti kit pei e zot ti ale e bann llande ti ale, sa ti dan nou letan sa se dan nou letan ki zot in demann tou kestyon e nou'n reponn tou kestyon e napa okenn ka ki'n ganny anmennen devan okenn nou Manm pou al devan Anti-Koripsyon.

Me lo lot kote dan zot letan, sete dimoun ki asosye avek zot ki ozordi i ganny kestyonnen lo bokou bann keksoz ki'n arive ki annan pou fer avek koripsyon, se lo zot kote e rikord i kler. Lo nou kote otan ki mon konnen nou, nou fer tou nou deklarasyon. Lo zot kote sa ki mon'n tande mon pa pe akiz person, atraver zot prop parol i annan ki pa'n fer zot deklarasyon.

Se dan zot letan ki Sesel ti ganny *black listed*, se dan nou letan ki *La France* in tir nou lo *black list* e se dan nou letan ki Linyon Eropeen in tir nou'n met nou lo en *grey list*. Se dan zot letan ki zot ti dir zot pou lager kont koripsyon, zot pou al lager pou fer tou pou lager kont koripsyon me se dan nou letan ki nou'n pran aksyon kont koripsyon.

Se dan nou letan, se dan nou letan ki nou ti pas bann lamannman annan 2022 pou ranforsi pouvwar ACCS pou donn li plis abilite pou al prosekite bann krim ki'n fer avan 2006 e avan '96. Se dan nou letan ki i ti pas dan Lalwa, se nou kote latab ki ti vot an 2022 pour sa Lalwa pou fer sir prosekisyon i kapab arive, se lot kote latab ki ti vot kont sa bann lamannamn.

E rikord i kler, rikord i kler lo en kote lakizasyon, lo lot kote nou met bann fe kler devan pep Seselwa pou zot war. E se pour sa rezon zot ankoler, mon'n tann en Manm nonmen poudir ti napa loto, ti napa loto Dimans, be ti annan loto Dimans. Si zot viv dan en rev zot lib pou zot viv dan en rev.

Zis parey Onorab William i konnen Dimans i pou annan en kantite dimoun ki pou vin kot li pou en *rally*, zot lib pou zot krwar pou napa, me selman i pou en lokazyon aköz Seselwa i realize ki sa travay ki nou pe fer dan Lasanble Nasyonal sa bann lamanman ki nou pe anmenn dan Lasanble Nasyonal i pou benefis nou pei, nou sekter, tou sa bann amannman ozordi i pou benefis nou pei pou fer sir ki nou pei i bouz de lavan.

E, mwan mon kont lo zot sipor pou anmenn progre dan sa pei, pou anmenn

lamannman ki pou ede fer nou bouz devan. Avek sa Gouvernman *no turning back* e nou pou kit li lanmenm. Mersi bokou Mr Speaker.

MR SPEAKER

Bon, avek repons Vis-Prezidan lo deba Manm a vot lo *Bill* pou *general merit* dan *Second Reading*. Manm ki an faver lev lanmen. Mersi, tou Manm in vote, mon a verifie, napa Manm ki'n vot kont. Mersi.

Lo *general merit International Business Companies (Amendment) Bill, 2025 as amended* 29 Manm in vot pour, 0 kont, 0 abstansyon. *Bill* in aprouve dan *Second Reading*, Madanm Clerk a fer *Second Reading*.

MADAM CLERK

Mersi Mr Speaker. *A Bill for an Act to amend the International Business Companies Act, 2016 and the International Business Companies (Amendment) Act, 2024*. Mersi Mr Speaker.

MR SPEAKER

Mersi. Avek sa nou a pas dan Staz Komite. Mon war nou annan detrwa amannman ki'n ganny marke dan *Bill*. E lo kote *Bills Committee* Onorab Andre pou diriz nou lo bann amannman.

HON CLIFFORD ANDRE

Mersi Mr Chair. Mr Chair, par lefe ki- parey nou ti agree VP in osi dir ki sa bann rekomandasyon- bann deklarasyon plito, pou ganny fer par le 15 Zilyet 2025, akòz avan dan lesplikasyon ti le 30.

So zis pou nou dan son *explanatory note* devan (b) kot ti annan le 30 Zen, 2025 nou'n ranplas li avek le 15 Zilyet 2025 e osi dan (j) anba nou'n fer parey. Lo paz limero 4, i pa'n sa soz, so mon ava al lo 7(7) ki pou aparet lo paz 3(7) i annan en komanter ki ti'n ganny mete sa komanter in ganny pran konsiderasyon ladan.

Si nou swiv ankor Mr Chair, lo sa lot paz ki swiv zis par lao kot i met “*amendment of section 169*” in annan apre “*conviction*”, nou'n azout “*to imprisonment for a term not exceeding 1 year, if any*” i bezwen “*if any*” i bezwen vin “*if an individual*” sorry- “*if an individual or to a fine not exceeding US\$10,000 or to both*”.

Nou kontinyen nou al lo 4(B) dezyenm laliny Mr Chair, nou delete sa “A” apre “4”, so i pou read (4). E lo 7 nou delete dan premye laliny *towards the end* apre “*liable*” nou delete “*to imprisonment for a term not exceeding 1 year, if an individual or*” apre dan trwazyenm laliny apre “10

thousand” nou delete “*or to both*”.

Nou kontinyen, nou al lo kot i met “*amendment of section 25 of the International Business Companies (Amendment) Act, 2024, Act 19 of 2024*”. 10 lo trwazyenm laliny...

MR SPEAKER

Endik mwan ki paz ankor Onorab kot nou'n arive.

HON CLIFFORD ANDRE

Nou'n ariv lo 10- *clause 10* Mr Chair.

MR SPEAKER

Clause 10, ok.

HON CLIFFORD ANDRE

I ok Mr Chair?

MR SPEAKER

Wi. Mon'n *catch up ya*, mersi.

HON CLIFFORD ANDRE

Clause 10, lo trwazyenm laliny nou zis ranplas “*30th June 2025*” avek “*15th July 2025*” e menm zafer in ganny fer lo sa 11 ki *subsequent* tir *30th June 2025* nou ranplas li avek “*15th July 2025*”. E sa bann lamannman ki ganny fer. Mersi.

MR SPEAKER

Mersi. Bon, nou'n pran tou bann lamannman, eski *panel* napa okenn komanter lo

bann- *ok* les mon a pran komanter Onorab Pillay avan.

HON SEBASTIEN PILLAY

Mersi Mr Chairman. Mon vwar poudir *panel* in konsantre lo zis sa konponan *nominees and nominators*.

Me *what about nomination od reserved directors*, an relasyon avek en konpannyen ki annan zis en direkter? Sa osi sa dimoun i vin en *nominee*. Prezan ou'n dir, zot pou *comply*. Eski seksyon 135 osi *would apply to the transition of provision* ki zot pe koz lo la *or not*?

Akoz *as it stands* la, dapre Lalwa zot dir poudir kot en konpannyen i annan zis en endividi ki sa *sole director*, - direkter sa lakonpannyen, *notwithstanding anything* dan son *articles of association*, zot kapab- sa dimoun i kapab *nominate* en lot dimoun pou vin en *result director*.

So *therefore*, li osi i vin en *nominee director*, prezan ou'n koz lo en *transitional provision* ki fer *compliance*, *would that include* osi an relasyon avek *nomination of reserved directors or not*?

Akoz *for all intendment purposes* zot osi zot vin en *nominee* dan sa konteks. Mersi. Mon ti a kontan konpran si zot pe enkli...

MR SPEAKER

Mersi. Vis-Prezidan i kapab adrese?

VICE-PRESIDENT AHMED AFIF

Mersi bokou Mr Chair. Mr Chair, sa *issue* ki Onorab pe *raise* i pe souleve la, i ti devret ganny souleve dan merit stage, e si i ti annan en lamannman i pa'n zanmen lev sa koman en konsern, i ti'n devret anmenn en lamannman pou pas sa *with 72 hours notice*.

I pa'n fer, ou pa kapab vin dan *Committee Stage* eskiz mwan Mr Speaker, mon pa pe pran okenn pozisyon *as such*. Me selman mon konn dan *Committee Stage* i pou zis koriz en keksoz sa ki pase dan *merit stage* nou'n fini vot lo la.

Ou pa'n zanmen *raise* sa dan ou *merit stage argument* ni mon pa mazin en dan *Bills Committee*, sa se pa en bann lamannman ki pe ganny propoze e alor i reste koumsa.

MR SPEAKER

Non, Vis-Prezidan.

VICE-PRESIDENT AHMED AFIF

Sa i *nominees to shareholder not directors*.

MR SPEAKER

Vis-Prezidan, mon a dir ou sa pwen in ganny leve dan lepase. Mon sel pwen mwan se ki si en

pwen i kapab ganny klarifye. Mon pa pe koz lo amannman, e i vre amannman i devret la, e si i pa la nou pa kapab konsider amannman.

Zis si i kapab ganny klarifye i ganny klarifye, si non ou dir mannyer i ete i byen, *ok*. Si, ou napa plis ki sa, Onorab Pillay ou ankor lo menm pwen?

HON SEBASTIEN PILLAY

Mersi Mr Chairman. Mr Chairman, semenn pase nou ti pas Lalwa an sa ki konsern Lalwa eleksyon, nou pa ti warler nou pe fini ki anba Lalwa *Political Parties* menm enkli Vis-Prezidan ek tou son savan, i pa'n kapab war poudir ou pa kapab tir en Komisyoner atraver Lalwa.

Zis Lartik 165 Konstitisyon ki'n fer sa, e Lasanble ti pe fer en fot konstitisyonnel a sa moman e in fer.

MR SPEAKER

Ok, Onorab.

HON SEBASTIEN PILLAY

Now, nou'n agree poudir Mr Speaker, nou'n agree poudir an sa ki konsern bann Lalwa teknik ki konsern de regilasyon pei, natirelman prosis ki nou'n swiv toultan se ki avan nou propoz lamannman teknik nou

demann en klarifikasyon avek *panel*.

Lalwa i prevwar ki nou pe koz lo *nominee*, nou annan 2 eksper la *ok*, pa nesese pou vin fer tou sa bann mon kapab *for lack of a better word* - kankan.

MR SPEAKER

Ok, Onorab, nou'n konpran tou sa bann pwen.

HON SEBASTIEN PILLAY

Ti *straight forward* nou ganny en klarifikasyon. Ou war?

MR SPEAKER

Kot mon'n arive, mon'n dir *VP* nou a pran klarifikasyon si i annan, si i bezwen klarifye, mersi. *Ok*, *VP* si ou'n fini fer ou remark.

VICE-PRESIDENT AHMED AFIF

Wi, Mr Chairman, lamannman i konsern *nominees* ek *nominators* lo propriyeter pa lo direkter. E alor setou ki nou krwar i nesese pou le moman, se sa ki nou'n diskite avek bann regilater se sa ki zot satisfè avek, se sa ki nou krwar i pou anmenn en solisyon vizavi bann regilater. Mersi.

MR SPEAKER

Mersi. I bon. Okenn lot- *panel* mon pa'n tann naryen pwen lev e lo bann lezot amannman

ki ganny fer mon sipoze zot annakor avek sa? E mon sipoze lezot Manm osi pa'n lev lanmen, so nou annakor avek bann lamannman ki'n ganny propoze.

Tre byen, e avek sa nou a pas dan Staz Lasanble pou nou vot lo *Bill* dan *Final Reading*. Mon a ganny Mosyon pou *Third Reading* silvouple.

HON BERNARD GEORGES

Mersi Mr Speaker. Mr Speaker, annakor avek *Order 76(1)* nou *Standing Orders*, mon *move* ki *the International Business Companies (Amendment) Bill, 2025 as amended* i ganny lir en Trwazyenm Fwa. Mersi.

MR SPEAKER

Mersi nou a ganny segonnman? Onorab Arissol.

HON SANDY ARISSOL

Mersi Mr Speaker. Mosyon Onorab Georges i ganny segonde.

MR SPEAKER

Mersi. Manm a vot lo *Bill* dan *Third Reading*, Manm ki an faver lev lanmen. Mersi. Tou Manm in vote. Napa Manm ki vot kont?

Lo *Formal Third Reading International Business Companies (Amendment) Bill, 2025 as amended*, 29 Manm in vot pour, 0 kont e 0 *abstain*.

Bil in aprouve par Lasanble. Madanm Clerk a fer *Third Reading*.

MADAM CLERK

Mersi Mr Speaker. *This Act may be cited as the International Business Companies (Amendment) Act, 2025*. Mersi Mr Speaker.

MR SPEAKER

Mersi. Avek sa, *Bill is passed*. E nou 12:05, menm sityasyon ki nou ti ladan semenn pase kot manm ti di petet nou devret *break*, me selman nou en pe kwense pou le moman.

So mon propoz ki nou komans lo nou lot *Bill*, akoz enn, nou riske en pti pe an retar avek *meeting* e komans en pe tar. So mon pa santi nou kapab sakrifye tro bokou letan.

Donk, mon pou envit Mosyon pou *Second Reading* pou *next Bill, Limited Partnerships (Amendment) Bill, 2025*. Nou a ganny Mosyon silvouple.

HON BERNARD GEORGES

Mersi Mr Speaker. Mr Speaker, annakor avek *Order 69(2)* nou *Standing Orders*, mon *move* ki nou *Limited Partnerships (Amendment) Bill, 2025*, i ganny lir en Dezyenm Fwa. Mersi.

MR SPEAKER

Mersi. Mon a ganny segonnman. Onorab Arissol.

HON SANDY ARISSOL

Mersi Mr Speaker. An vi ki nou annan ankor en pe letan Mosyon i ganny segonde. Mersi.

MR SPEAKER

Mersi. Vis-Prezidan ou ganny apele pou fer ou lentrodiksyon.

VICE-PRESIDENT AHMED AFIF

Mersi bokou Mr Speaker. Bonn apre midi ankor tou bann Manm. Mr Speaker, lamannman dan *Limited Partnerships Act*, 2003 i prensipalman pou asire ki Sesel i reste an konformite avek standar enternasyonal sirtou standar *FATF* avek *OECD*.

Sa bann lamannman dan Lalwa *Limited Partnerships* pou lannen 2025 ki pe ganny propoze, i bann sanzman ki parallel avek sa ki nou fek prezante pou bann lakonpannyen biznes enternasyonal. Me dan kad bann *Limited Partnerships* ki ganny anrezistre avek Lotorite Servis Finansyel *FSA*.

Sa *Bill* i entrodwir en nouvo mezir kot nenport dimoun ou Antite ki pe azir koman en *nominee partner* dan en *Limited Partnership*

pou bezwen soumet en deklarasyon an ekri avek sa *Limited Partnerships* dan en dele letan 21 zour ki zot in ganny apwente.

Sa deklarasyon i devret ganny adrese lo sa *Limited Partnerships* dan ki sa endividi ouswa antite pe azir koman en *nominee partner* endik zot stati koman *nominee* e donn detay sa *nominator* ki zot pe reprezante, ki enkli lenformasyon idantite konplet tel ki ladres, limero anrezistremman e lenformasyon idantifikasyon nasyonal.

Pou bann *nominee* ki deza pe servi dan sa kapasite avan sa lamannman Lalwa i vin an aplikasyon, zot pou annan ziska le 15 Zilyet 2025 pou soumet zot deklarasyon. Si i annan okenn sanzman dan detay sa *nominator*, sa *nominee* pou bezwen fer en notis an ekri pou enform sa *Limited Partnership* lo sa bann sanzman e fourni en nouvo deklarasyon dan en dele letan 21 zour.

E ler en *nominee* i nepli pe deservi sa pozisyon sa *Limited Partnerships* pou osi bezwen ganny enformen an ekri. Bann *Limited Partnerships* zot menm pou annan lobligasyon pou gard tou sa bann deklarasyon ek notis pou en *minimum* peryod 7an dan lofis zot azan.

Sa Lalwa i pa zis adres sa lobligasyon me i osi entrodwir sanksyon pou en *nominee partner* ki pa konform avek sa bann provizyon. I kapab ganny kondannen pou pey en lanmann ki pa depas \$10 mil Ameriken oubyen lan prizon oubyen tou le de. E si en *nominee partner* i fer en fo deklarasyon dan okenn rezon valab Lalwa i prevwar menm penalti.

Si enn *nominee partner* pa respekte son lobligasyon anba Lalwa sa *Limited Partnership* li menm i annan lobligasyon pou pran aksyon apropiye kont li. Sa i kapab enkli restriksyon lo son drwa transfer, son lentere dan sa *Limited Partnership*, drwa vote, drwa resevwar peyman oubyen menm anilasyon son lentere dan sa *Limited Partnership*.

Tou bann aksyon ki ganny pran i devret ganny dokimante e garde par sa *Limited Partnership*. E si vre propriyeter sa *Limited Partnership* li menm ki pa pran aksyon apropiye, zot kapab ganny penalize ziska \$10 mil Ameriken.

En lot sanzman fondamantal ki sa Lalwa pe anmennen se pou retir seksyon 18, ki ti donn serten egzansyon bann *Limited Partnerships*, sirtou konsernan *tax* lo biznes. Sa i

vedir ki *Limited Partnerships* pa pou ganny trete dan en fason spesyal kot i konsern *tax*. Me i pou tonm anba bann menm Polisi legal parey lezot form antite.

An plis, seksyon 4 in ganny amande pou retir restriksyon lo kalite aktivite ki en *Limited Partnership* i kapab fer. Sa i vedir ki en *Limited Partnership* pou kapab fer son aktivite biznes dan Sesel anliny avek Lalwa. Sa bann lamannman i anliny avek standar *OECD, forum on harmful tax practices*.

Finalman peryod tranzisyonnel kot *Limited Partnerships* ti devret met azour sorti 12 mwan pou vin ziska le 15 Zilyet 2015. Sa i montre langazman ki Gouvernman i annan pou fer sir ki sa bann reform i ganny met an aplikasyon vitman e efektivman.

Mr Speaker, sa bann mezir dan *Bill* lo *Limited Partnership* i neser pou met *Limited Partnership* lo menm nivo latransparans parey lezot lenstriman legal ki annan en lenpak finansyel i rann nou sistenm pli kler, pli transparan e pli responsab. I osi asire ki nou pei i kontinyen amelyor son pozisyon lo lasenn enternasyonal e gard konfyans bann regilater, bann partner aletranze.

Mr Speaker, mon demann sipor Lasanble pou sa Prozedlwa *Limited Partnerships (Amendment) Bill*, 2025 pou zot konsiderasyon e laprouvasyon. Mersi bokou Mr Speaker.

MR SPEAKER

Mersi Vis-Prezidan pou lentrodiksyon. Lasal i ouver prezan pou deba lo *Bill*. Napa Manm ki pe entervenir? Onorab Henrie?

HON GERVAIS HENRIE

Mersi Mr Speaker. Bonn apre midi tou dimoun e partikilyerman mon ava dir *welcome panel* dan Lasanble Nasyonal. Mr Speaker, depi bomaten i annan plizyer keksoz ki ganny dir ki i fer sa 2 *Bill* i annan en koneksyon avek kanmarad.

Solman mwan sa ki mon ti ava kontan dir se ki sa bann lamannman ler i vini, mwan parfwa mon pa forseman vwar li konmsi Sesel pe ganny targete, ouswa ki *goalpost* pe sanze, nou bezwen forse tay deryer en standar, kestyon *World Order* mon pa anvi fer mon lekòr per lo sa bann keksoz koumsa.

Akoz souvan mon krwar poudir lefe ki sa lendistri i la, i bezwen pe annan en dyalog kontinyel ant lendistri partikilyerman Sekter Prive e bann teknisyen pou kapab

kontinyelman amelyor sa Lalwa.

Akoz pre tou zot al reprezant Sesel dan bann *forum* aletranze, i annan bann *expert* ki vin isi. I annan bann lesanz ki ganny fer e koumsa alor i ankouraz nou pou nou anbelir nou kad legal ki nou annan.

So, sa bann lamannman i bezwen vini apre ki i annan bann diskisyon avek par egzanp *global forum technical assistant team*, konsiltasyon avek sekter prive parey mon'n dir sirtou *international corporate service providers*.

E Sesel li menm li i annan bann revè ki bezwen ganny fer lo nou kad legal, pour sa *exchange of information on request*, i annan enn ki ti fer an 2023. E letan ki nou vwar poudir nou *rating* i *partially compliant* nou anvi fer pli byen. Alor, ki Sesel lo en baz volonter i demande ki i annan en revè, e ki letan i fer sa revè nou vwar kot i annan bann mankman, nou esey aziste, pour ki nou *rating* lo lalis kot *EU* in met nou, i kapab amelyore. E alor bann linisyativ parey nou bezwen *welcome*.

E dapre lenformasyon ki mon annan in annan en *mock review* ki'n ganny fer kot serten size e konsern legal in ganny idantifye avek lenformasyon *Beneficial*

Ownership ki alor sa lamannman pe adrese.

Me sa ki mwan mon apresye se lamannman konsernan seksyon 18 dan *Mother Act*. E kot bann egzansyon lo *tax* ouswa *duty* ki bann lakonpannyen ti pe annan i ganny retire. Avan sa zot pa ti pe pey *stamp duty* par egzansyon, lo bann transfer propriyete, ouswa tou bann tranzaksyon biznes ki *Limited Partnership* i fer.

Pa ti pe pey *GST*, ok *GST* in ganny ranplase par *VAT* lo lenportasyon meb, bann lekipman ki tonm anba *Trade Tax Act*, zot pa ti pe ganny konsidere anba *Social Security Act* ki aplik pou bann anplwayer en *Limited Partnership*, zot pa ti pe pey *GOP* si zot ti annan travayer etranze swa bann *expatriate* parey nou dir.

E, sa bann mezir Mr Speaker, depi *the original Act* i date 2003, e sa bann mezir ti pou la pou 20an, egzansyon. E si ti napa en keksoz an ekrir sa bann egzansyon ti pou kontinyen. Alors, nou kapab apresye tou sa bann letan konbyen larzan nou'n perdi.

Mon napa statistik lo konbyen lakonpannyen ki anrezistre isi anba *Limited Partnership*, me nou kapab apresye konbyen larzan nou'n perdi, e Sesel koman en Pti Leta Zil i depan bokou lo son

sistenm *tax* pou li kapab finans bann devlopman dan pei e osi par egzansyon bann keksoz servis piblik ki bezwen *tax money* pou kapab marse.

E zis par egzansyon Mr Speaker, yer letan Minister Later ek Lakaz ti la, kekfw piblik pa'n tro swiv sa aköz bann lekritir ti ptipti, me dan Sekter Lakaz lenvestisman ki'n ganny fer an 2021, 22, 23 e 24 ki plis ki 350 *unit* ki sa ladministrasyon in konstrir, zis en pti pousantaz ki ti *foreign grant*, tou larestan larzan *generate* par Bidze.

Be se sa kot sa larzan i sorti, so, nou bezwen apresye poudir alor letan zefor i ganny fer aköz apre nou tann lot kote i dir nou pa fer naryen, be 300 ekek *unit* laplipar finanse par larzan *generate* atraver Bidze, e sa letan sa Lalwa i adres sa egzansyon i tire nou bezwen aplodir, nou bezwen siporte.

E en lot zafer se ki ler sa bann lakonpannyen ouswa bann biznes *offshore* pa pe pey *tax* dan fason ki zis e ekitab Mr Speaker, e i pa *fair* pou bann lakonpannyen lokal. Mon en dimoun ki'n deza annan en pti biznes mon war nou ale *diligently* nou peye nou *tax*, menm sa letan ki ti annan *CSR*, tou nou peye nou.

Me ou war poudir i annan en group dimoun ki li i ti pe ganny egzansyon e sa 20an pase pa nou ki'n fer sa.

20an pase si 2003 manman, defen Prezidan Rene ti ankor vivan, mazin en i pa ti ankor ale i ti al Avril 2004 li. Tousala in pas anba zot letan sa, apre konbyen Prezidan ki'n vini ankor? E sa egzansyon in reste.

So, si ozordi nou pe sanze ki Sesel ava benefisye mon aplodi. E akòz prezan i ava amelyor abilite Gouvènmman pou ganny plis reve pou li kapab envestir dan ledikasyon, dan lasante, dan lenfrastruktir piblik e sa bann logmantasyon saler ki nou demande tou lazournen, tann servis pou travayer e tou sa *long service allowance*, i ava kapab ganny adrese en fason ouswa en lot Mr Speaker.

Alor, mon swete ki tou lede kote latab i sipòrt sa bann zefor pou fer ki nou lev stati nou pei kot son *compliance* i konsènen. E dènyen pwèn, se ki nou menm nou koman Manm Lasanble nou bezwen realiz en keksoz, se ki, ki manner nou koman en Lasanble Minisiter Finans, son bann teknisyen ki la, *Attorney General* e reprezante la, nou annan VP ki sorti dan *Cabinet*, nou vwar konmsi ki manner sa sèkter i ganny prioritize. Tou lazournen zot devan nou ek Lalwa. Be ki manner sa i *push back* lezot sèkter ki bezwen lamannman dan zot Lalwa.

Health Safety Decree la depi 1978, *Employment Act*, nou bezwen si ti napa sa bann lamannman pou nou fer, lezot sèkter ti ava ganny sa bann privelez.

Donk, nou kontan ki zot vini, solman an menm tan nou rekomande ki *internally* i annan sa bann revè volontèr ki en zour- mon krwar en Manm bomaten in dir sa ki en zour zot vini avek en *comprehensive review* menm keksoz ki lezot pa pe panse poudir obliz Sesel fer, nou, nou kapab *think forward* ki konmsi nou'n donn en lape en kou avek sa bann Lalwa ki toultan i vini.

So ki nou kapab konsantre lo bann lezot sèkter akòz vreman zot pran en pe nou bann letan, me solman nou pa pe konplèt *it's part of our job*, solman nou anvi war ki Sesel i avanse.

Donk Mr Speaker, vwala 2 pti pwèn ki mon ti anvi dir e ki mon swete nou bouze lo lezot keksoz. Nou annan bann Mosyon enportan ki nou bann sipòrtèr pe dir be pa ankor vini alor nou anvi sa bann Mosyon i pase. Mersi Mr Speaker.

MR SPEAKER

Pou mwan konnen ki manner pou prosede, mon annan zis sa 2 *Leader* ki'n demann laparol. Napa personn lot ki pe lev lanmen.

Dan sa ka mon pe propoze ki nou zis prolonz sa bout bomaten pou nou ava fini avek sa *Bill* ki mon krwar nou kapab fer li 1er. Nou annan *Bills Committee*, *Bills Committee* nou a kapab anvoye. Sorry, Onorab Andre wi, koz mwan lo *Bills Committee*.

HON CLIFFORD ANDRE

Wi, *Bills Committee* nou annan bann *outsiders* ki'n vini koan *panel*, so zis si zot permet nou *Bills Committee* i kapab sorti aköz zot 2 zot oule koze. So nou kapab ale nou a *carry on* avek *meeting* aköz nou'n dir zot midi edmi. So...

MR SPEAKER

Ya, be mon pa tro kontan ki nou zis bezwen kas Lasanble aköz *Bills*. Ok dan sa ka eski?

HON CLIFFORD ANDRE-

Non ki mon pe dir Mr Speaker, si lasanble i don nou permisyon nou koman *Bills Committee* nou kapab sorti nou al *attend meeting* e Lasanble i kontinyen. Mersi.

MR SPEAKER

Well, mon pa konnen si bann lezot *Bills Committee*, napa lide entervenir sa i a posib, ok, pou le moman mon ava kontinyen avek deba. Mon a pran Onorab Georges.

HON BERNARD GEORGES

Mersi Mr Speaker. Mr Speaker, non pou tre bref, annefe mon pa ti anvi pran laparol me mon annan 2 kestyon ou *panel* e annefe se zis 2 kestyon.

Sa *Bill* ki devan nou la, *Limited Partnership* i egzakteman parey i pe fer egzakteman parey sa bout *Bill*, *International Business Companies* ki nou fek fer, *it's about nominees* e pou bann menm rezon. Donk, nou pa bezwen retoun lo bann largiman ki nou ti fer taler.

Mon 2 kestyon pou *panel* se sa 2, premyerman *how popular is Limited Partnerships?* Ki kantite ki nou annan ki'n ganny anrezistre? Mon persyade ki i pa osi popiler ki *IBCs*, me mon ti a kontan kekfw pou nou lenformasyon dan Lasanble konnen konbyen apepre nou pe dil avek sa bann- sa kalite veikil legal.

E dezyenmman, sa dat *for compliance* ki nou pe sanze nou pe fer li le 15 Zilyet, annefe le 15 Zilyet i dan zis 6 zour, *of which two weekends*, nou annan demen, apre demen epi Lendi *and then that's it*. Eski pou annan sifizaman letan pou *compliance?*

Mon mazinez *you've thought it through*, se pour sa rezon ki zot in met sa dat. So

sa se mon 2 kestyon Mr Speaker, mon napa plis lentervansyon ki sa, mon ti ava kontan en repons *from the panel* ler zot pran laparol. Mersi.

MR SPEAKER

Mersi Onorab Georges. *Ok*, mon a ekout Onorab Pillay. Kote *Bills Committee* ler zot bezwen sorti midi edmi zot a kapab sorti. Onorab Pillay ou annan laparol.

HON SEBASTIEN PILLAY

Mersi Mr Speaker. Mersi pou donn mwan laparol. Si ou a permet mwan Mr Speaker, mon ti a kontan met en keksoz devan piblik Seselwa ki pe ekout nou ozordi bomaten-apre midi, komansman apre midi la.

Zis pou fer zot remarke ki mannyer nou war dan *Sez everything* pe ganny fer pour ki sa Mosyon ki bann- zot bann siporter pe espere, i kapab pase ozordi e ki mannyer Lasanble pe ganny prolonze, Lasanble pe ganny prolonze pour ki sa Mosyon i kapab arive taler e ki mannyer ler nou, nou annan kestyon ler nou, nou an travay nou pa kapab anmennen travay nou, nou ganny bloke, nou ganny koupe, nou ganny siprimen.

(Interruptions)

MR SPEAKER

Order! Onorab! Wi, be ou pe dir, ou pe- *Order!* Ou pe dir en keksoz ki fo, mon pa pe prolonz Lasanble pou Mosyon pase mwan, mon pe prolonz Lasanble aköz i reste nou zis en pti bout pou fer lo sa *Bill* e letan sa *panel* i la, i bokou pli avantaze pou nou fini avek sa *Bill* les sa *panel* ale. Zot menm zot, zot in dir poudir sa *panel* i annan en kantite louvraz.

Rezon se programasyon letan, ki mannyer nou servi nou letan pli byen. Se sa aköz mon'n fer sa desizyon ki nou pou prolonz sa bomaten e mon ekspekte ki nou kapab fini avek sa *Bill* 1er, so silvouple si ou aret gat letan e ou adres *Bill* nou a kapab fer sa. Mersi.

(Interruptions)

HON SEBASTIEN PILLAY

Be Mr Speaker, sel dimoun ki pe fer nou gat letan se ou, aköz get ki arive, nou pa kapab nou par egzanp menm anmenn en *query* lo *Bill* nou pa kapab anmenn en kestyon lo *Bill*. Nou annan en *Bill* devan nou i koz lo *nominee directors*.

MR SPEAKER

Ou a gannyen.

HON SEBASTIEN PILLAY

E sak fwa ou kote i fer komosyon, *nominee partners*, e sak fwa ou kote i fer

komosyon nou pa kapab anmenn naryen nou. Selman sa ki enteresan par egzanp Onorab Georges pa'n deklar son lentere akòz li par egzanp i fek reprezant en *case* Ankour ki *involve nominee directors* dan en konpanyen.

E enn bann keksoz ki Lakour ti ordonnen lenformasyon ki ganny garde se pour sa rezon nou pe demann sa bann kestyon. Si Lakour pe dir poudir par egzanp an sa ki konseren en *case* ki'n pas Ankour e ki'n ganny anmennen par pti *Court...* war la Onorab George ski ti avoka pou sa konpanyen ki pe sa, *services provider* - zot koz lo bann *nominee directors*, zot koz lo bann lenformasyon ki bezwen ganny donnen, zot koz lo sa ki'n bezwen ganny *provided* e menm dir poudir sa *services provider* li menm i kapab akt koman en *nominee director* pou sa lakonpanyen. E sa ti en *case* divors ki ti *involve* en madanm *Russian* mon pa krwar sa enn ki dan *One Coin*, be selman en madanm *Russian* ek son msye.

Kestyon Mr Speaker, ki nou annan se ki akòz nou pe dil avek *Limited Partnership* ki napa sa kantite, be nou pa pe dil avek *nominee directors*? Akòz ki Lasanble pe ganny dir poudir la nou pe dil avek *nominee members and not*

nominee directors? Pour ki rezon?

Akòz ler nou get *gam* legal, in dil avek *nominee directors*. So nou, nou bezwen konpran merit sa *Bill* from sa perspektiv ki merit sa *Bill* i annan ki ozordi ki nou pe konsider zis *nominee members and not nominee directors*? I enportan pou nou konpran.

Akòz ler nou regard par egzanp sa ki Lakour ti demande Mr Speaker, i ti demann avek sa lakonpanyen pou konfirman si in deza *provide nominee director services*. Savedir taler nou pa'n ganny eksplike sa nou dan prezantasyon.

I paret poudir en *corporate service provider* i kapab *provide nominee director services*. Be ki mannyer sa i ganny kouver dan *gam* sa bann *disclosure* ki'n ganny demande pou ganny fer la? Eski in ganny kouver anba sa Lalwa oubyen eski in ganny kouver anba sa lot Lalwa?

E akòz alors si nou pe koz merit sa Lalwa i sitan enportan, i sitan bon e kestyon in ganny demande par *Leader Zafer Gouvernman* ki kantite *Limited Partnership* i annan ki'n anrezistre?

E si napa sa kantite *Limited Partnership*, be selman la mazorite *case* i *revolve around nominee directors*,

disclosure of nominee directors bann dimoun ki ak lo *behalf* lezot dimoun, *then* i esansyel pou Lasanble demande be akoz nou pa pe konsider en lamannman dan Lalwa ki dil ek sa bout ki la? Spesifikman.

Se sa keston lezitim ki nou pe demande. Napa naryen pou personn ankoler oubyen nerve about sa. Si nou pe koz lo merit Lalwa *then* nou bezwen dir sa, *now*, i pa mwan ki sa zizman in ganny donnen kont, sa zizman in ganny donnen kont Onorab Georges Ankour e lot avoka sete Mr Rouillon.

So, mwan mon pe zis *refer to* dokiman ki *available* avek mwan pou ed mwan e pou mwan fer mon deba ki kler pou piblik la deor. So sa ki enportan Mr Speaker. In ariv en staz dan Lasanble kot nou preski pa kapab koze lo sa latab oubyen fer en pwen e nou bezwen asize sibir e ekout tou sa ki'n pase san ki nou kapab ganny en leksplikasyon.

Menm ler i annan en *panel* profesyonnel la devan, ki zanmen in deza arive dan nou letan dan Gouvernman, kot en *panel* pou refize reponn keston Manm. Nou war nou dan sityasyon kot en Vis-Prezidan avek larogans i deside reponn i dir ou anmenn lamannman, fer isi, fer laba me selman, me selman par

lepase Mr Speaker, par lepase, par lepase zanmen in leka, zanmen in leka.

E sa ki enteresan Mr Speaker, ou pa oule nou dir be nou bezwen be dir zot, zot ti promet pou vin en Lasanble ki reprezant tou Seselwa i pa sa ki zot in vini. In vin en Lasanble kot ou pa ganny drwa koze, dimoun i ekrir *right or reply* nou rod leskiz pou pa pas *right of reply* dimoun, ou demann keston en *panel* ou pa kapab ganny keston, *panel* zis i donn lanmen bat lanmen ler Manm pe koze, *I mean*, kot nou ete? Be kote nou *stand* Mr Speaker?

Nou'n ariv en staz, nou'n ariv en staz dan sa Lasanble kot sak fwa nou koze, gete ou'n fini mate pou ou sey koup mon *micro* akoz i kler ou'n pri dan largiman pou prop Deputy Speaker ki'n dir ou....

MR SPEAKER

Kot nou ete, kot nou ete koz lo *Bill*, kote no ete? Lo *Bill*.

HON SEBASTIEN PILLAY

Be mon pe koze, be aret koup mon *micro*. Aret koupe les mwan koze.

MR SPEAKER

Mersi.

HON SEBASTIEN PILLAY

Let there be a debate dan sa Lasanble, *be fair*.

(comments off-mic)

MR SPEAKER

Order!

HON SEBASTIEN PILLAY

I enposib pou ou kapab ak dan en fason *fair* Mr Speaker. Prezan nou sa ki nou pe dir, sa ki nou pe dir, fer keksoz drwat. Semenn pase nou annan sa problem, ler nou anmenn en pwen devan ki konsern en keksoz enportan nou ti dir poudir i annan en problem Konstitisyonnel ki ti ganny *raise* dan Lalwa eleksyon.

Nou'n met *clause* eleksyon, nou met *clause* Konstitisyon devan, nou'n met Lartik Konstitisyon, ou'n anpes nou, finalman zot in war zot in fer en fot, so be les nou kapab eksplor nou pwen ki nou bezwen fer.

Nou vin avek en pwen devan, nou pwen i senp, nou oule konpran akòz nou pa pe fer li pou bann direkter, akòz se sa ki annan plis enteraksyon avek, setou.

Panel i ava dir nou akòz i bezwen fer, i ava dir nou akòz Lalwa i bezwen ganny amande. Me ou, ou bezwen admet poudir dan deba i annan en kantite keksoz ki'n ganny dir. Eski nou, nou sipoze reste trankil pa reponn sa bann keksoz akòz ou, ou pa

anvi nou reponn? I pa mars koumsa?

MR SPEAKER

Onorab, aret fer lakizasyon kont mwan koman Speaker. Mon'n donn ou permisyon, ou'n koze, mon oule ou koz lo *Bill* ou al dan en kantite lezot size. Se sa ki mon obzekte si mon koup ou mikro se akòz ou pe dir bann keksoz ki *out of order*, setou. Si ou'n fini lo *Bill* zis dir nou, nou a kapab kontinyen.

HON SEBASTIEN PILLAY

Mon pe al fini Mr Speaker.

MR SPEAKER

Mersi.

HON SEBASTIEN PILLAY

Mon pare pou swiv sa ki ou pe dir mwan e retourn lo *Bill* e reste lo *Bill*.

Problem ki mwan mon annan tou senpleman se ki ou, ou pare puy fer mwan fer sa ou, me ler sa i ganny fer lo lot kote ou pa pare pou fer naryen ou. Tou dimoun i war.

MR SPEAKER

Mersi Onorab. Vis-Prezidan mon a demann ou fer ou repons lo deba.

VICE-PRESIDENT AHMED AFIF

Mersi bokou Mr Speaker. Mr Speaker, mon krwar sa *Bill* ki

devan nou i kler i en lot antite i *Limited Partnership* parey pou *IBC*, nou pe met menm lamannman.

Setadir tou bann dimoun ki bann *nominee* savedir in ganny nominen par en *nominator* pou li azir lo lapar sa propriyeter li i bezwen enformen lekel sa *nominator* i bezwen gard rikord pou 7an e i bezwen enform sa *Limited Partnership* ki li i en *nominee*. Si i annan sanzman i bezwen enformen.

Se vreman sa ki dan *Bill* pe demande, lot keksoz ki *Bill* pe fer se ki parey dan ka *IBC* ki ozordi zot annan drwa fer biznes Sesel, e si zot fer biznes Sesel zot pou pey *tax* Sesel, *Limited Partnership* li i ti en Antite ki ti napa drwa depi 2003 fer biznes Sesel, ti napa drwa fer biznes Sesel.

Lamannman ki nou pe anmennen prezan e aköz i ti napa drwa i pa ti pey *tax* Sesel. Nou pe dir ek li ozordi ou kapab fer biznes Sesel, be si ou fer biznes Sesel ou pou pey *tax* parey nenport ki. Se sa lamannman ki nou pe anmennen. Nou ti deza anmenn en lamannman koumsa pou *IBC* ti en pe dan sa dernyen 3an nou ti fer ki zot osi zot bezwen pey *tax* si zot fer biznes Sesel. E alors se sa vreman ki nou pe anmennen dan sa *Bill*.

Onorab Georges in demande konbyen *Limited Partnership* nou annan. Ti annan 35 me Fevriye sa lannen nou'n azout ankor enn in ariv 36. E eski sa dat i pou en problem? Nou pa krwar i pou en problem menm ki i tre pre i le 15, e rezon se nou deza an diskisyon avek sa bann azan ki reprezant sa 36 *Limited Partnership*.

Zot tou zot in dakor pou rezon ki zot bann koneksyon enternasyonal, zot rezo enternasyonal ki zot annan i meyer pou zot ki nou Lalwa i enpoz sa bann deklarasyon. Aköz zot prezan zot pou obliz zot bann propriyeter pou donn sa lenformasyon ki i pli bon pou zot dan ziridiksyon kote zot pe fer biznes.

Alor, an zeneral pou satisfè poudir i pa pou poz en problem sa dele letan le 15 Zilyet pa ou poz en problem nou'n an diskisyon, pa yer me plizyer mwan avek zot lo sa bann amannman, annefe depi lannen pase sa bann lamannman pe ganny diskite e boner sa lannen ti bokou pli aktiv. Alor, vwala en pti pe.

Onorab Henrie ti osi mansyonnen ki i vre nou'n donn en kantite priyorite lo bann *Bill* ki annan pou fer avek sekter finansyel. E enn bann rezon petet se parske sete sa sekter ki ti annan en pli gro koneksyon avek bann

regilater enternasyonal tel ki *FATF*, *OECD* e ki ti pe met serten latansyon lo Sesel e plizyer lezot pti ziridiksyon.

Zot pa ti pe port zot lentansyon lo lezot Lalwa ki nou pou fer ki mon dakor avek ou antyerman ki zot osi zot enportan, Lalwa lanplwa par egzanp Ms Odile i dir ek mwan ti annan menm *Auctioneers Act* ki date depi 1818 pa ankor amande. E mon krwar pou annan en lamannman ase byento lo la.

I annan plizyer lezot Lalwa ki annan pou fer avek tranzaksyon dan Sesel, me ki napa sa presyon enternasyonal pou pas serten amannman ki i kapab afekte nou repitasyon.

E se pour sa rezon ki dek ki sa bann presyon i vin lo nou e i enportan ki nou reazir anver sa, se pour sa rezon ki nou, nou pe anmenn sa. Me mon antyerman, antyerman dakor avek ou, kot i annan lezot lamannman kot, kot nou kapab ed nou sekter nasyonal nou pou fer li.

E avek sa Mr Speaker, mon soumet sa *Bill* avek Lasanble, mon espekte nou ou ganny *full* sipor, ankor enn fwa set en fason pou nou moderniz nou lezislasyon, nou lankadremman legal pou fer nou kontinyen donn plis sipor pou sa sekter biznes enternasyonal e ki nou a kontinyen vwar ki

pe fleri, anploy plis dimoun, pey plis *tax* e kontinyen develop Sesel. Mersi bokou Mr Speaker.

MR SPEAKER

Mersi Vis-Prezidan. Avek sa repons mon a demann bann Manm pou vot lo *Bill* pou *Second Reading*. Manm ki an faver lev lanmen. Mersi, Manm ki kont?

Lo *general merit Limited Partnerships (Amendment) Bill 2025*, 21 Manm in vot pour, 0 kont e 7 in *abstain*. *Bill* in aprouve dan *Second Reading* e i a reste nou pou nou Pas dan staz, *arr.... sorry*, Madanm Clerk *Second Reading*.

MADAM CLERK

Mersi Mr Speaker. A *Bill for an Act to amend the Limited Partnerships Act, and the Limited Partnerships (Amendment) Act, 2024*. Mersi Mr Speaker.

MR SPEAKER

Mersi Madanm Clerk. E avek sa nou a pas dan Staz Komite. Mon'n war enn de pti amannman dan *Bill*, e *Bills Committee* malerezman zot bezwen la pou Staz Komite. Wi Onorab Andre.

HON CLIFFORD ANDRE

Mersi Mr Chair. Mr Chair, parey sa enn avan *IBC* dan son *explanatory note- statement*,

kot ti annan 30 Zen in ganny ranplase avek 15 Zilyet, sa dan (b) avek dan 1(h)(i) dan dernyen laliny in ganny ranplase avek le 15 Zilyet 2025.

The main Act Mr Chair, si nou al lo 4(b), 4(b) nou- donn mon en pti segonn Mr Chair, 4(b) dan katriyenm laliny apre “*conviction*” nou'n azout “*to imprisonment for a term not exceeding 1 year,*” apre “*if an individual or*”.

E dan setyenm laliny apre US\$10,000, nou'n met “*or to both*”. Swivan Mr Chair, i al lo *clause 7* lo trwazyenm laliny apre “*by*” nou'n retir 30th June, 2025 nou'n met 15th July, 2025. E menm parey dan *clause 8* trwazyenm laliny nou'n retir 30 Zen nou'n ranplas li avek le 15 Zilyet 2025. Se sa bann lamannman ki annan. Mersi.

MR SPEAKER

Mersi. *Panel* napa okenn komanter lo sa bann lamannman?

Mersi, Manm napa okenn lot Mersi, Manm napa okenn lot *ok*, dan sa ka a bann lamannman in ganny aksepte e nou a pas Dan Staz Lasanble pou terminen avek *Third Reading*, nou a ganny Mosyon pou *Third Reading*.

HON BERNARD GEORGES

Mersi Mr Speaker. Mr Speaker, annakor avek *Order 76(1)*, nou *Standing Orders*, mon *move* ki *the Limited Partnerships (Amendment) Bill 2025 as amended* i ganny lir en Trwazyenm Fwa. Mersi.

MR SPEAKER

Mersi. Mon a ganny segonnman. Onorab Arissol.

HON SANDY ARISSOL

Mersi Mr Speaker. Mosyon i ganny segonde. Mersi.

MR SPEAKER

Mersi. Nou a demann Manm pou vote dan *Third Reading*, Manm ki an faver lev lanmen? Manm ki kont? *Thank you*.

Lo *formal Third Reading Limited Partnerships (Amendment) Bill, 2025 as amended*, 19 Manm in vot pour, 0 kont e 7 in *abstain*, *Bill* in aprouve par Lasanble dan *Third Reading*. E Madanm Clerk a fer *Third Reading*.

MADAM CLERK

Mersi Mr Speaker. *This Act may be cited as the Limited Partnerships (Amendment) Act, 2025*. Mersi Mr Speaker.

MR SPEAKER

Mersi. *Bill is passed*. *Ok*, nou'n terminen lo sa *Bill*. Fotespere bann Manm ki'n obzekte in konpran aköz mon demande sa bann Manm pou endike si

zot pou koze oubyen non, pou permet mwan konnen ki kalite letan nou pou donn sa *Bill*.

Nou'n donn sa *Bill* 11 minit an plis, sa in sov nou fer *panel* retournen apre midi pou 11 minit. So, zot a war poudir i vreman vo lapenn e nou bezwen en pe fleksib lo la. Mersi bokou. Mersi bokou, mersi *panel*, mersi Vis-Prezidan e bann zofisye pou zot partisipasyon e mon swet zot bon kontinyasyon e bon depar.

Donk, Lasanble nou a pran poz la, e aköz retar ki nou'n ganny nou a komans Lasanble 2er 30 e sa i a permet bann komite pou kapab konplet zot louvraz, fotespere. Mersi bokou nou a pran poz.

(BREAK)

MR SPEAKER

Bonn apre midi tou dimoun bann ki avek nou apre midi. Lo nou *Order Paper* nou'n ariv lo Mosyon e premye Mosyon par Onorab Gervais Henrie.

Donk mon ava apel Onorab met son Mosyon lo latab.

HON GERVAIS HENRIE

Mersi Mr Speaker. Bonn apre midi tou dimoun. Partikilyerman bonn apre midi bann zabitan Mont Buxton.

Mosyon ki lo *Order Paper* Mr Speaker i lir koumsa;

Sa Lasanble i demann *Board* avek Zesyon Lazans Nasyonal pour Servis Lenformasyon NISA pou aret fer biznes avek Parti *United Seychelles* an relasyon avek propriyete kot zot *Print House* i sitye. Mersi Mr Speaker.

MR SPEAKER

Mersi. Mon ava ganny segonnman. Onorab Romain.

HON GEORGES ROMAIN

Mersi Mr Speaker. Bonn apre midi tou koleg Onorab. Mr Speaker, mon segonn Mosyon. Mersi.

MR SPEAKER

Mersi. Onorab Henrie, ou kapab adres ou Mosyon.

HON GERVAIS HENRIE

Ankor enn fwa mersi Mr Speaker. Mr Speaker, tou dimoun ki swiv aktyalite i okouran ki parti minoriter dan Lasanble Nasyonal *United Seychelles* in sanz zistifikasyon e atraver labi pouvwat akizisyon 46 - mon repete 46 morso later Leta depi ki zot ti fer koudeta an 1977.

Lakizisyon later par US i reste en size kontrovers ki'n ganny dokimante dan en raport spesyal par lofis Oditer Zeneral avek tit "*Land deals and transactions between the Government and the United*

Seychelles Political Parties” pibliye le 3 Novanm 2021.

Vorasite sa parti pou akimil larises lenfliyans ki’n ganny plis pouvwar atraver akizisyon propriyete ki zot pa’n pey son vre pri, i ganny met o kler dan sa rapor.

Ziska ozordi 3an pli tar, anba *Chairmanship* Dirizan Lopozisyon sa rapor pou ankor ganny konsidere par Komite Finans avek Kont Piblik FPAC dan Lasanble Nasyonal. Kontrerman avek presedans travay ki’n ganny etabli par sa Komite dan nou Lasanble depi 2016.

Sa enn propriyete ki size Mosyon ki monn anmennen ozordi pa form parti sa 46 propriyete.

Propriyete ki *National Information Centre Services Agency* i sitye i kare later V8543 ki mezir 1663 met kare.

Sa kare later ti anrezistre e transfer avek Gouvernman le 5 Avril 1995 swivan proze konblaz pli boner dan bann lannen 1990.

Le 4 Zilyet 2013 lakonpannyen *Sun Press Printing Limited* reprezante par Defen Mr Olsen Vidot ti siny en bay 30an avek Gouvernman pou lwe sa kare later - setadir ziska 2043.

Sa lakonpannyen *Sun Press Print Limited* Mr Speaker, i anrezistre an Novanm 2012 anba limero

841653-1 e son ladres ofisyel i *Maison Du Peuple*.

Son de direkter ti Sef Egzekitiv Parti Lepep Mr Vidot ladres Anse Royale, ki ti pe tenir 90poursantaz par lo lapar parti e Mr Charles Robert Bastienne ladres Anse Etoile ki annan 1poursan par.

Kondisyon sa bay ti *comme* swivan; *Sun Press Printing Limited* ti pey en *premium* R49 mil 890 e apre i ti bezwen pey en lokasyon menm pri setadir R49 mil 890 par an. Me zot ti bezwen pey sa sonm de fwa par lannen setadir R24 mil 945 tou le 6 mwan.

Sa ki fodre fer resorti la, lakonpannyen *Sun Press Printing Limited* i propriyete Parti *United Seychelles* e se la kot zot lenplikasyon parti minoriter dan Lasanble Nasyonal dan sa Mosyon i vini.

Zis 1an apre ki zot ti ganny sa *lease* avek Gouvernman, Parti Lepep parey zot ti apele sa letan ti *sublease* sa propriyete ki enkli later avek en batiman lo la avek Lazans Nasyonal Servis Lenformasyon ouswa NISA an Angle.

NISA i sa lakonpannyen ki responsab pou piblikasyon zournal *Seychelles Nation* mye koni konman zournal Nasyon.

NISA ti ganny kree an Avril 2010 atraver en Prozedlwa e i en lantrepriz

piblik, ouswa en lakonpannyen paraetatik ki pa depan lo Gouvernman finansyerman.

Son performans an term reveni anyel in sorti R20. 99 milyon an 2014 pou ariv R25. 19 milyon an 2024. Setadir a mon avi i montre plis ki vyab stab e performans.

Kestyon nou bezwen demann nou lekor se aköz ladministrasyon Prezidan Michel, swivi par Ladministrasyon Prezidan Faure apartir 2013, pa ti vwar li nesaser asire ki en tel a ki Nasyonal pa ti ganny son prop propriyete. En pe parey demars ti fer pou SBC. Aköz board avek zesyon sa lazans pa'n milite depi 2014 pou ganny zot prop lokasyon olye pey en alokasyon tou sa letan.

Lagreman *lease* ant Parti Lepep avek NISA sinyen le 1 Out 2014, ti pou NISA pey zot R63 mil 654 pa mwan ki ariv R763 mil 848 par lannen pou 30an. A lafen sa *lease* NISA pou'n pey Parti Lepep avek *United Seychelles* en sonm R22 milyon 915 mil 443.

Aprezan annou fer sa konparezon. Ler US pe pey Gouvernman R49 mil 890 par an NISA pe pey US R763 mil 848 dan sa menm letan e ki 15 fwa plis sa sonm ouswa 1431 poursan an plis,; 15 fwa plis sa sonm ouswa 1431 poursan an plis.

Mr Speaker, zis mazine ki par mwan NISA pe pey *United Seychelles* R63 mil 54. Sa i par mwan. Sa *rental* i par mwan i plis ki *United Seychelles* i pey Gouvernman pou son *lease* pou 1an, ki tonm selman R49 mil 890 par an.

Savedir par an *United Seychelles* pe anmas R763 mil 848 avek NISA. Me li i pe pey Gouvernman zis R49 mil 890.

Mr Speaker, ler ou *minus* sa sonm ki *United Seychelles* pe pey Gouvernman R49 mil 890 par an dan sa R763 mil 848 ki NISA pe pey *United Seychelles* par an, i fer ki R713 mil 958 i al dan kof sa parti politik tou le-z-an zis avek sa tranzaksyon avek NISA sa i larzan ki normalman NISA i dwatet pe pey Leta Sesel an term *dividend* ki mandatwar pou tou lantrepriz leta peye tou le-z-an.

Letan US pe kontinyen rode oli *long service allowance* pour *teachers, nurses*, zofisyè Lapolis avek travayer servis piblik; letan US pe kontinyen dir pansyon dimoun aze e ki fodre sorti 65an e retourn 73an letan US pe kontinyen rod trezyenm mwan otomatik san regard performans - letan US pe rod logmantasyon saler menm ler zot pa vot an faver Bidze, kote zot krwar larzan pou ed Gouvernman akonpli sa bann target i sorti? Eski zot

krwar i annan pye larzan *State House, United Square* ouswa deryer *Maison Du Peuple*?

Zot per fondater ti dir nou sa pye pa egziste i dan limazinasyon *Dream Team 2025*.

Larzan i rezilta travay dir. Koleksyon *tax* efektiv. Me pli enportan labsans konfli lentere lanpesman parti o pouvwar fer biznes avek Gouvernman. E pli enportan, labsans koripsyon. Relasyon biznes antre *United Seychelles* avek *NISA* i ilistre sa bann defayans swivan dan nou demokrasi ki mazorite *LDS* dan Lasanble Nasyonal pe demande annou arete ozordi menm.

Premyerman konfli lentere;

Fodre nou pa oubliy relasyon travay premye *Chairman NISA* avek premye Prezidan Parti Lepep Mr James Michel ki zot pa oule tann nonm li ozordi.

Premye *Chairman NISA* ti ganny apwent an Avril 2010. Dan son karyer servis piblik ki'n dir pou 35an, in travay pou 32 an ladan anba *leadership* Mr Michel letan in Minis e pli tar konman en konseye letan ti vin Vis-Prezidan e pli tar Prezidan Larepiblik.

Vwala konfli lentere kot bann endividi dan en parti politik, i servi zot pozisyon pou

lenfliyans bann kontra ouswa laranzman dan lentere zot parti.

Dezyenmman, finansman parti politik;

Atraver sa *lease* ki inisyalman *United Seychelles* ti prevwar pou li ranmas e benefisye avek en sonm R22 milyon 915 mil 440 pandan 30an, Mr Speaker, i kler sa tranzaksyon ti pirman finansman zot bann aktivite politik a lonterm. Mankman latransparans avek *oversight* i trwazyenm pwen.

Pandan 10an ki en tel laranzman ant *United Seychelles* avek en lakonpannyen paraetatik in egziste i zis pou argimante ki'n annan en mankman latransparans e *oversight* dan en tel Lagreman par plizyer lenstitisyon ki annan en rol enportan pou fer lenvestigasyon dan okenn ka ki annan potansyel pou konfli lentere e pou asire ki sa lagreman i an konformite avek tou regilasyon.

Kestyon i aköz lofis *Ombudsman*, Komisyon Anti-Koripsyon (ACCS), Komisyon Bann Lantrepriz Piblik *PEMC*, *FPAC* dan Lasanble Nasyonal e Komisyon Elektoral in reste silans lo sa dosye ziska ozordi.

Menm ler en dimoun i kapab argimante ki napa okenn Lalwa ki'n ganny kase, lo pwennvi etik i pa desann

byen sa bann kalite laranzman pou lefe ki al kont bann valer monn mansyonnen pli boner.

Mr Speaker, la pou rapel bann Manm seksyon 29 (a) dan Lalwa ki gouvren rezistrasyon avek regilasyon bann parti politik e ki Senkyenm Lasanble Nasyonal ti aprouve atraver 26enm Lalwa 2014.

Dan seksyon 29(a)(1) i dir klerman, ki en parti politik anrezistre pa devret aksepte direkteman ouswa endirekteman avek okenn kontribisyon ouswa donasyon, sorti kot en lenstitisyon piblik ki kontrole ouswa ki pou Gouvernman, ouswa ki ouswa sa ki Gouvernman i annan par ladan.

Mannyer mon lir sa ki sa i se ki sa laranzman biznes ant *United Seychelles* avek *NISA*, i al kont sa Lalwa e ki zot menm si zot aprouve 11an pase.

Le sel Manm Lasanble ki ti en Manm Senkyenm Lasanble sa letan ki dirizan Lopozisyon, ki nou ava rapel ti premye dimoun pou akiz *LDS* pou kas seksyon 29(a) sa menm Lalwa.

29(a) i sit koumsa Mr Speaker. 29(a)(1) *a registered political party shall not accept directly or indirectly any contribution for donation from (c) a public institution statutory body or any organization*

controlled or owned by the Government or from any company in which government holds any capital share.

E 29(a)(1)(d) i lir koumsa, *“any private company performing a public function pursuant to a written law.”*

Mr Speaker, nou a rapel ki dirizan Lopozisyon ti dir nou pli boner sa mwan isi menm dan sa Lasanble, ki letan Lalwa i ganny konteste devan Lakour ki bann Ziz i demann verbatim pou mye konpran nou lentansyon konman Lezislater ler nou ti pe pas sa Lalwa.

Alor pou kontinyen, mon pou lir verbatim Dirizan Zafer Gouvernman Anbasader Marie Antoinette Rose letan deba lo lamannman dan *Political Parties Registration and Regulation (Amendment) Bill 2014* ti pe pase dan Lasanble Nasyonal Mardi le 9 Desanm 2014.

Mon site;-

“En lot fason osi ki pe protez *public fund* aköz i annan parti politik ki *outside the government*, i annan politik ki dan Gouvernman sa Lalwa pe protez *public fund* aköz i dir ou, *no public institution of fund can fund the political parties.*’ Savedir si ou dan si en *public institution* li i pa kapab i la, i kler i dan Lalwa. Dimoun i konnen ozordi e transparan. Personn pa kapab demen akiz

okenn parti politik ki o pouvwar konmkwa in fer *a, b, c, d, e without proving* aköz i dan Lalwa mon krwar sa i byen.

Government-owned organisations pa kapab finans *political parties*. Sa ki pli byen se *private company performing a public function* e sa i tre modern, i tre byen. I montre poudir sa Gouvernman ki o pouvwar Parti Lepep i net, i drwat dan son bann desizyon ki in pran konsernan *political parties*.” Fen sitasyon.

Vwala lentansyon Lalwa Mr Speaker - parti ki dan Gouvernman, parti ki o pouvwar, pa devret fer biznes avek okenn antite leta pou lavantaz finans politik.

(APPLAUSE)

HON GERVAIS HENRIE

Mr Speaker, sa ki vreman malonnet dan sa tranzaksyon, se ki sa menm lannen ki Parti Lepep ti lev zot lanmen an kontant dirizan Lopozisyon ozordi, pou vot an faver sa lamannman *Political Parties Registration and Regulation (Amendment) Bill 2014* zot ti konnen ki zot pe deza benefisye avek sa tranzaksyon avek NISA - en lakonpannyen piblik oubyen paraetatik – *a clear violation of the law* Mr Speaker.

Zis pou fer remarke ki lamannman ti aprouve le 9 Desanm 2014 e Parti Lepep ti’n siny pou *sublease* sa propriyete avek NISA le 01 Out 2014 3 mwan avan. Ki mannyer i apele sa, si pa en manboulouk?

Parol avek aksyon i de keksoz. E sa i fason fer Parti *United Seychelles* menm ler zot pou premye e pare pou akiz zot oponan politik pou tou sord kalite kestyon.

Annou pa bezwen krwar NISA pa pe sibir anba presyon finansyel US pe met li anba la. Son rapor anyel lannen apre lannen i fer resorti ki logmantasyon dan kou loperasyon i en defi kontinyel pou zot e zot solisyon stratezik ki zot kontinyen fer resorti se pou entrodwir bann mezir pou koup kou nouvo devlopman Mr Speaker.

Sa ki nou bezwen regarde konman en Lasanble ki pozisyon Departman *Lease and Property Management* dan Minister Later, eski US pe pey *lease* a ler?

Pozisyon avek SRC, eski zot pe soumet zot *annual tax return* e pey *tax* lo alokasyon sa batiman?

Pozisyon avek FIU, eski detay *beneficial ownership* in ganny soumet avek *unit* lentelizans finansyel FIU?

Seksyon 12 i koz lo *sublease*, alor oli permisyon ki

Gouvernman in donn Parti Lepep sa letan pou *sublease* sa propriyete ki li i pe *lease* son premye lye.

E Mr Speaker, dan mon resers monn ganny enformen ki'n annan en desizyon ki ti pe fer letour koridor pou vwar depi 2021 pou retourn propriyete avek Gouvernman. Alor kestyon ki nou konman en Lasanble nou bezwen demande ki'n arive avek sa desizyon?

I osi annan lof ki sorti kot US pou li vann sa *assets* avek NISA.

Sekreter zeneral zot parti Mr Wallace Cosgrow ti ekri NISA le 21 Septanm 2024, ofer pou vann sa propriyete pou en sonm R3.5 milyon avek sa bann kondisyon swivan.

Demann NISA pou pey zot R1 milyon inisyalman e apre R100 mil par mwan pou 25 mwan. E sa i bezwen annan en Konsey Legal ki Gouvernman atraver Biro Attorney Zeneral i bezwen donn NISA si sa i en bon keksoz pou li pran sa lof ouswa non.

Pozisyon kot Rezistrar Lakonpannyen ski *Sun Press Printing* i dan *good standing* ouswa non? Dan mon resers mon'n vwar ki napa rezolisyon ki ti endik sanzman pou sorti lo non Parti Lepep pou vin *United Seychelles*.

Par egzanp en sertifika sorti kot Komisyon Elektoral ki sertifye sa. Ti napa osi rezolisyon dan fayl pou endik lanmor defen Olsen Vidot e dezormen alor lekel ki pe reprezant zot parti konman Direkter *Sun Press Printing Limited* ki pe tenir sa 99 pousan?

Pozisyon konsernan SRC - non plito Rezistrar ankor Lakonpannyen.

Dan fayl napa *Annual Report* dan *files Sun Press Printing Limited* kot *Registrar companies* depi 2013 ziska ozordi. Solman nou konnen lakantite larzan ki'n fini akimile R7 milyon e plis.

Depi 2021 *Sun Press Printing Limited* pa ankor pey sa *annual fee* R500 parey Lalwa i presize. Mazinen i annan en penalti pou sak semenn ki en lakonpannyen pa *comply*.

Baze lo sa 4 pwen i kler ki *Sun Press Printing Limited* en *good standing* avek Lalwa *Companies Act*.

An konklizyon Mr Speaker, rezon ki mon'n anmenn sa Mosyon, se ki i kler larzan ki NISA pe pey Parti *United Seychelles*, se zis pe donn li en larzan pou nanryen. Li in ganny en Lagreman pou *lease* en bout later apre kree en konpannyen ki *basically* en lakonpannyen ki zis pe anmas

larzan pou li zis koumsa - zis koumsa menm.

Be eski nou kontinyen sa bann pratik dan nou sosyete? Eski i a konformite avek bann valer demokratik ki nou pe sey met bann lenstitisyon pou dir zot bezwen met an aplikasyon?

Alor mon pe demande ki tou bann Lotorite konpetan - tou Lotorite konpetan e sa konmans par Minister Later pou re vizit sa dosye sa *lease*. Rod tou bann Konsey Legal lo sa *lease* e si sa *lease* i merit kontinyen pou sa prosen 10an, parske la nou'n pas 2023 e parey mon pe dir i dwatet ale depi 2013 i dwatet ale depi 2043.

Eski alor nou pou kontinyen avek sa *lease* e permet *United Seychelles* pou zis a lafen sa *lease* akimil ankor en sonm ziska R15milyon Mr Speaker?

Ki mannyer nou konman bann dimoun responsab, nou kapab debout a kote lebra krwaze labous fermen e pa dir nanryen.

I moralman mal se pou sa rezon ki sa Mosyon i devan Lasanble Nasyonal ozordi.

Tou bann Lotorite konpetan i merit regard sa dosye. *Registrar of Companies* i merit regard *standing* sa lakonpannyen *Sun Press Printing Limited*.

Cabinet li menm zot merit - semenn prosen la asize e re evalye sa dosye sirtou aköz *NISA* i tonm anba *purview* Vis-Prezidan donn tou bann konsey nesaser e nou pran en aksyon. Eski *NISA* i reste lanmenm - en laranzman i ganny fer, ouswa *NISA* i al rod en lot batiman pou li lwe ?

Eski *NISA* i pran en *loan*? Parski si i pe kapab *afford* pou li peye i pran en *loan* pou konstri son prop batiman parey i annan en *SBC House* ozordi.

Mr Speaker, Lasanble Nasyonal i la pou debat bann size Nasyonal enportan. E i annan en sonm larzan konsiderab la ki en antite Leta pe pey en parti politik larzan ki otreman i kapab ganny servi pou bann lezot keksoz ki mon ava kapab retourn lo la dan mon *right of reply*.

Me pou lemoman parey Mosyon pe dir Lasanble pe demann *Board* avek Zesyon Lazans Nasyonal pour Servis Lenformasyon *NISA*, pou aret fer biznes avek Parti *United Seychelles* an relasyon avek propriyete kot zot pe *print* kot zot *print house* i sitye. Mon'n met tou bann fe ater, depi larzan zot pe depanse an gran kantite, ki mannyer bann aksyon ki al kont bann valer demokratik ki nou pe sey promouvwar dan nou pei e alor ki sa rezon mon demann

mon bann koleg dan Lasanble Nasyonal pou siport sa demann devan Lasanble ozordi. Mersi Mr Speaker.

(APPLAUSE)

MR SPEAKER

Mersi Onorab. Onorab Romain, ou anvi pran laparol an se moman? Ou annan laparol.

HON GEORGES ROMAIN

Mersi Mr Speaker. Bonn apre midi ankor enn fwa Mr Speaker e bonn apre midi tou bann dimoun ki pe swiv nou.

Mr Speaker, mon pou siport sa mosyon anmennen par Onorab Henrie e partaz serten refleksyon lo desizyon *NISA*, pou fer biznes avek Parti *United Seychelles* an relasyon avek lokasyon zot *print house* ki zot pe lwe avek sa parti, ki sitye kot *Bois de Rose Avenue* pou en peryod 30an.

Mr Speaker, premyerman nou rekonnet ki *NISA* i en antite piblik e ki li osi dan kapasite pou fer son reveni.

Mr Speaker, *NISA* i pa zis en lazans ordiner. I annan en manda legal etabli anba Lalwa *NISA* 2010 k presiz byen klèman ki sa lazans i sipoze delivre lenformasyon dan en fason efikas obzektif e san demontre okenn *bias*.

Sa prensip enparsyalite i pa zis en bon pratik pou *NISA*, me annefe i en obligasyon legal ki ganny met dan Lalwa li menm.

Savedir ki tou desizyon sirtou bann ki annan en lenpak lo son lendepandans, i bezwen ganny fer avek bokou refleksyon e respe pou son prop manda.

Alor ler en lazans i decide al lo en propriyete ki asosye avek en parti politik, sa i pa zis kree dout lo son lendepandans me i kapab ganny vwar konman en vyolasyon son prop manda legal. En lazans ki ganny e tabli pou reste enparsyal pa devret asosye li avek okenn parti politik.

Dezyenmman Mr Speaker, nou pa kapab lir konteks istorik. Nou rapel byen Parti *SPUP*, *SPPF*, *US* e la i apel En Nouvo *US* pandan plizyer dezener tir pran kontrol lo bokou propriyete Leta enkli later e menm batiman par egzanp kot *STC* i sitye. Nou tou nou konnen ki kantite larzan ki *US* in anmase atraver lwe landrwa ek *STC* e ki finalman in vann sa *lease* in vann *lease* sa propriyete.

Annou pa zwe bliye ki zot in fer bokou profi lo bann byen Seselwa. E la ozordi zot *leader* in vin dir ki i annan zis R5 dan son pos.

Mr Speaker, depi 2013 *US* in ganny en *lease* later ek

Gouvernman ek Gouvernman US sa letan kot en batiman STC i ete. Sa *lease* ti kout zot R50 mil par mwan e ki US in fer apre sa.? Sa menm bout later zot in lwe avek STC pou R823 mil 333 par mwan ant Septanm 2014 ziska Zen 2018 pou 4 mwan.

Savedir tou le mwan Parti US pe amas li en pti pe plis ki R773 mil e pou 46 mwan zot in fer en profi plis ki R35 milyon Mr Speaker, lo byen Seselwa.

E pa bliye Mr Speaker zot ki ti o pouwar a sa letan e zot parti In fer biznes ek son prop Gouvernman pou anrissi en pti group zot.

Ki klerman demontre ki ti napa okenn bonn Gouvernans dan sa desizyon ki zot in pran.

E ozordi zot annan kouraz pou vin donn lesan Gouvernman LDS. Lo lafason pou diriz pei.

Eski sanmenm sa Gouvernman ki pe retourn o pouwar ozordi pou vin fer sa bann kalite biznes e fer krwar zot pe get dan byennet Seselwa ?

E set a gras a presyon ki LDS atraver FPAC in mete ki STC e Parti US in negosye ek STC in aste sa *lease* pou lavalier R17 milyon.

E ozordi STC pe lwe ek Gouvernman pou zis R73 mil par lannen. konpar US ki ti pe

lwe sa menm propriyete pou R823 mil par mwan.

La ozordi sa menm parti pe vin dir Sesel pe plere anba Gouvernman LDS.

I annan plizyer lezot legzanp san bliy tou sa bann propriyete ki zot ti'n pran e pe ganny revann pou milyon lo marse prive. E bokou fwa napa okenn klarite lo ki mannyer sa bann propriyete ti ganny pran. Oubyen si ti annan en vre tranzaksyon a sa letan.

Mr Speaker, sa i en konsern Lepep Seselwa annan tye, alor ler lazans piblik menm enn ki zener son prop reveni i deside pou kontribye dan larzan sa menm politik atraver lokasyon en batiman, nou bezwen poz kestyon, eski sa i etik ? Eski i al anliny avek prensip bonn gouvernans e servis piblik ?

Trwazyenmman Mr Speaker, sa i en kestyon lo persepsyon e konfyans piblik i pa ase pou dir ki napa okenn lentansyon politik par deryer sa desizyon ki NISA in pran.

Dan en demokراسي, latransparans ek lentegrite i pa zis bann keksoz ki nou dir, me i osi keksoz ki nou bezwen demontre ki nou pe fer.

Sa aksyon NISA Mr Speaker par lwe batiman ek Parti US i met an dout kredibilite sa lazans.

Katriyenmman Mr Speaker, bann opsyon

alternativ mon mazine i bezwen egziste, aköz ki zot in swazir en propriyete ki i annan en lenfliyans ek en parti politik?

E risk perdi konfyans piblik kan i posibleman annan lezot opsyon anvi ki zot manda i klerman presiz enparsyalite.

Finalman Mr Speaker, mon krwar ki sa Mosyon pa pe *undermine* travay teknik oubyen travay ki zournalis NISA pe fer, aköz nou konnen ki zot pe donn tou e toulezour zot pe kit nou azour avek devlopman e aktyalite dan nou pei.

Pou sa mon felisit zot. Me parkont zot aktivite ki zot fer i merit touzour anliny avek zot manda legal ki zot annan.

Alor zot devret annan en nivo refleksyon e responsabilite ki reflekte zot plas dan la demokrasi e non pa fer okenn keksoz ki met sa antite an dout.

E la Mr Speaker, mon oule fer resorti semenn pase ler *LGB* ti fer resorti ti mansyon sa demosyon NISA avek *Maison du Peuple*, mon konnen *LOTO* Mr Speaker, atraver ou, ti vremen mekontan sa zour ti dir NISA si i bezwen rann sa landrwa i annan zis pou pey sa ki zot drwa e zot kapab sorti.

E mwan Mr Speaker, mon konn tre byen - nou tou nou konn tre byen si Parti *LDS*

pe fer en biznes koumsa avek en antite Gouvernman, nou ti pou'n fini ganny en *PNQ by now* Mr Speaker.

Alors Mr Speaker, mon pou siport sa Mosyon e mon demann *Board NISA* pou re evalye zot pozisyon e al rod en solisyon ki pli apropiye e ki reflekte zot enparsyalite pli byen. Mersi Mr Speaker.

(APPLAUSE)

MR SPEAKER

Mersi Onorab. Mon ava donn laparol Onorab Phillip Arissol.

HON PHILIP ARISSOL

Mersi Mr Speaker. Bonn apre midi Mr speaker, tou koleg Onorab, tou dimoun ki pe swiv nou, spesyalman bann zabitan Anse Boileau.

Mr Speaker, mersi pou donn mon laparol pou raport mon siport pou Mosyon anmennen par Onorab Henrie.

Mr Speaker i pa akseptab ki Lazans Nasyonal pour Servis Lenformasyon NISA I kontinyen annan en relasyon finansyel avek Parti *United Seychelles* an relasyon propriyete kot zot *print house* i sitye.

Sa i pa en ka administratif, me i en menas direk pou lendepandans ek kredibilite NISA.

Lenstitisyon Gouvernman i devret baze lo

latransparans enparsyalite me NISA i trouv li dan en sityasyon enparsyalite i kapab met an dout.

Mon dir i kapab ganny met an dout, en relasyon finansyel avek en parti politik i en konfli grav. E i afekte konfyans piblik. En Gouvernman serye pa kapab toler en tel pratik.

NISA i devret reste endepandan san okenn lenfliyans politik, pou asire ki lenformasyon i onnet e aksesib pou tou sitwayen. Nou demokrasi i bezwen en gouvrenans transparan kot lenstitisyon Gouvernman i travay pou nou tou pep, non pa pou siport okenn lorganizasyon politik.

Ler resours Leta i ganny manipile pou benefis politik i redwir konfyans pep e menas fondasyon nou demokrasi.

En Gouvernman ki devret travay dan lentere Lepep i transform a en mekanizm e ranforsi pouvwat politik olye ki i asir byennet nasyonal.

Mr Speaker, sa pratik i fer ki merit i grosi i ganny ranplase par politik partizan. Kot bann desizyon enportan i ganny pran dapre lentere restren olye ki i bezwen fondamantal Lepep.

Sa i annan konsekans grav. E degradasyon dan servis piblik en mank

transparans e ek ladministrasyon e en mank responsabilite kot bann dirizan par rann kont avek sitwayen ki'n elekte zot.

Dan en demokratik i fonde lo prensip Lalwa, latransparans ek responsabilite i enportan. I enportan ki bann mezir strik kont entervansyon politik i ganny met an plas. Manipilasyon politik i kapab anmenn koripsyon, kree en lanvironnman kot lentere endividi in ganny met pli i ganny mete pli o ki byennet piblik. E sa i kapab ranforsi bann dirizan sosyal e dekouraz linite e sodalite Nasyonal.

En tel sityasyon i osi afebli kapasite Gouvernman pou reponn efektivman sa bann defi Nasyonal tel ki kriz ekonomik, lasante piblik ouswa sekirite.

Alors bann lenstitisyon ladministrasyon e mekanizm kontrol enkli bann lazans *oversight* endepandan, tel ki sistenm Zidisyer e medya lib i devret reste solid, onnet e endepandan.

Sa i pou garanti po bann resours Leta i form parti patrimwann Nasyonal i ganny servi dan en dan lentere Lepep an antye olye ki soutir en senp group politik.

Mon oule rapel sa Lasanble, ki sa relasyon

biznes ant - Mon ava rebran sa, mon oule rapel sa Lasanble ki sa relasyon biznes ti konmanse an 2014 lepok ki Parti *SPPF*, Lepep la *US United Seychelles* ti o pouvwar.

Sa ti en desizyon kot zot ti servi zot pozisyon pou etabli en relasyon finansyel, ki ti pou permet zot annan kontrol lo Lazans Nasyonal pou servis lenformasyon.

Mr Speaker, mon pa krwar ki sa ti en keksoz normal. E mon dir klerman ki sa pa devret kontinyen. Ni par Parti *LDS* ki o pouvwar ozordi ni pa okenn bann lezot parti politik dan lefitir.

I vital pou nou met en lalimyer kler lo sa bann pratik e asire ki nou bann lenstitisyon piblik i reste endepandan onnet e servi lentere tou pep Seselwa.

Si nou anvi gard en demokrasi solid, nou bezwen fer sir ki tou resours Leta i ganny met i ganny servi dan en fason ekitab pou tou sitwayen. Pep Seselwa i merit en gouvrenans responsab ki met son laspirasyon e son byennet avan tou.

Nou fer en sanzman deswit. *NISA* pa devret vin en zouti politik. I bezwen reste en lenstitisyon kredib ki protez laverite e byennet pep Seselwa.

Si nou les sa relasyon finansyel, kontinyen nou pe

aksepte ki nou lenstitisyon i kapab vin en zouti pou manipil formasyon e sa i danzere. Nou pa kapab permet okenn lenstitisyon Gouvrenman vin en zouti dan lanmen okenn parti politik.

Menm si sa in ariv dan kad aktivite komersyal i esansyel ki nou fer sa en distenksyon kler ant sa ki en servis piblik, ki pou tou sitwayen e ki sa i en lorganizasyon politik ki ganny i annan son prop lentere e lobzektif.

Nou tou nou konn en medya endepandan i pilye fondamantal pou en demokrasi solid. Ler nou permet lenstitisyon Gouvrenman pou reste dan en sityasyon ki afekte son kredibilite, nou pe met an danze fondasyon dan nou demokrasi. Pep Seselwa i merit en sistenm kot lenformasyon i reste onnet san okenn presyon politik.

Ler nou pran en desizyon en pozisyon ferm lo sa sityasyon, nou re afirm nou langazman pou en gouvrenans, transparan e nou protez prensip demokrasi ki nou krwar ladan, sa i en tes pou nou Lasanble.

En moman kot nou bezwen debout san febles e fer sir ki nou pa les okenn lenfliyans ki pa apropiye

politizm lenstitisyon
Gouvernman.

Mon siport sa demann e mon demann tou Manm pou debout dan defans lentegrite nou pei. Nou bezwen termin sa relasyon finansyel ki pe met an danze la transparans lendependans *NISA*.

Nou pa pou aksepte okenn rezon ki pou pe bann pratik ki kont bonn gouvernans. Pep Seselwa i merit meyer. Mersi Mr Speaker.

MR SPEAKER

Mersi Onorab. Laparol pou Onorab Sebastien Pillay.

HON SEBASTIEN PILLAY

Mersi Mr Speaker. Mr Speaker, apre ki bokou in ganny dir lo parti ki an Lasanble mon krwar i neser pou mwan osi donn en larepons lo bann keksoz ki'n ganny avanse atraver prezantasyon Mosyon.

Mon oule met lo rikord ki spesifikman nou dan Lasanble sa group ki la nou'n ganny konnekte avek labi pouvwar, bann mo in ganny servi lo nou, nou'n ganny konnekte avek vorasite, e sa mo parti minoriter dan Lasanble Nasyonal in ganny servi e in ganny konekte avek konfli lentere. Sa group ki dan Lasanble. E ki a okenn moman mikro pa'n ganny

koupe e a okenn moman person pa'n ganny dir aret koze.

So fotespere ler mwan mon dir sa ki mon annan poudir okenn mikro pa ganny koupe okenn keksoz pa arive Mr speaker.

Mr Speaker, listwar in montre nou en keksoz senp. Nou souvandfwa ganny dir nou'n sanz nou non, nou ti apel *SPUP*, nou'n apel *SPPF* nou'n apel Parti Lepep ozordi nou apel *US*.

Parti ki lot kote lata i en moman donnen apel Parti Seselwa, in apel *United Opposition*, in apel *SNP* ozordi i apel *LDS*. Li osi in sanze. Selman li zanmen i vwar sa ki li in fer.

Rezon mon konmans koumsa Mr Speaker, se aköz i kler poudir i annan en zwe ki pe arive avek sityasyon aktyel, me ki enportan pou fer nou pep konpran kwa ki pe pase dan Lasanble ozordi.

Annou *remind* nou pep poudir ozordi nou dan lannen 2025. Nou dan lannen 2025 e apre Eleksyon 2020 kot mazorite Seselwa ti dir zot oule vot pou en Gouvernman *LDS* e donn li en mazorite absolut dan Lasanble ti vote. Tou sa ki'n pase 2014, 2015 2016 an se ki konsern *US* ti ganny nou dir nou pa oule nou pran *LDS*.

LDS in *fail* konpletman pou li delivre dan son bann

promes. In *fail* konpletman pou li *achieve* bann keksoz ki sipoze fer.

Prezan *fast forward* la ozordi 2025 nou'n ganny dir poudir i annan en Mosyon ki pe demande pou ki *NISA* i aret fer tranzaksyon biznes avek Parti *United Seychelles*. Me kestyon fondamantal ki nou bezwen demande avan nou eksplor bann lezot size ki'n souleve se be zot o pouvwar, *NISA* in tonm anba responsabilite Vis-Prezidan. Zot kapab *at any time* san ki nou bezwen annan en Mosyon pou fer en deba pou gat letan Lasanble, dir avek *NISA* be nou oule ou arete ek sa *rent* ek *United Seychelles* anba mon prezimen anba son Lagreman i bezwen annan en *clause* ki dir poudir be ou donn ou mwan notis e *NISA* *evacate* sa *permissions*.

Tou Seselwa ki annan lentelizans la deor ki pe ekout nou i konpran sa koumsa, aköz se zot ki o pouvwar se zot ki kapab fer sa tranzaksyon.

Prezan dezyenmman Mr Speaker an 2023 Prezidan in re apwent nouvo *Board NISA* e felisit *Board* avan.

Board avan ki'n *perpetrate* en relasyon biznes ki'n kontinyen pe relasyon biznes avek *US*, zot in apwent en nouvo *Board* an 2023 e 2023 sa *Board* ki vini i kontiny sa menm relasyon biznes.

So prezan ankor enn fwa mon demann mon lekor, si Prezidan in felisit sa *Board* avan, be ki Onorab Henrie i pe sey dir nou, eski i pe dir poudir Prezidan ti mal, dan felisit sa *Board* avan ?

Me se sa nou problem ki nou annan ozordi se ki nou annan en Gouvernman ki'n *fail* pou delivre lo promes ki in donnen e sey rod tou keksoz ozordi pou li kapab ganny *mileage* politik.

Me annou regard la an realite an fas. Par egzanp Mr Speaker Onorab ki pe anmenn sa Mosyon i menm Onorab Mr Speaker ki dan sa sez anler ti *mislead* Lasanble lo peyman ki ti ganny fer par son parti pou en *sponsorship* ki zot ti gannyen avek en lenstitisyon Nasyonal. Li menm li sa. Apre i *denied*.

Apre ki i fer i anmenn en lamannman dan Konstitisyon pou li fer ki bann Lenstitisyon Nasyonal i kapab *sponsor* en parti politik Sesel. Pou koriz son fot ki in fer, in anmenn lamannman dan Lalwa *Political Parties registration Act*, Mr Speaker mon koriz mon lekor.

Me sa ki enteresan. *Ombudsman* i fek ekri ou ankor e i *challenge* sa desizyon ki Lasanble Nasyonal ti pran e ou larepons ki ou'n dir si ki Lalwa i kot Prezidan.

Me tousala ou osi ou'n menm dir nou poudir ou pa rapel ki *Deputy Speaker* ti dir, kan ou vin donn nou resi me selman li i ti dan sez sa zour swar i annan *video* ki'n ganny dir.

Konmsi pou Seselwa konpran egzakteman ki nou pe fer. In akiz *US* pou fer biznes avek en antite Gouvernman kan li i kas Lalwa i sanz Lalwa pou zistifye in kas Lalwa e apre in dir ek nou poudir koumsa pou dir, nou ki mal nou ki fer tou fot. Sa i a pe fer pli byen menm sa.

E zot le ganny rezon pou sa zot. Me ler monn lir sa Rapor *Ombudsman* ki sa i enteresan sa, sa Lasanble pe ganny trennen dan en rigol - demokrasi pe ganny trennen dan en rigol zis aköz nou annan en latansyon politik pou nou sey fer keksoz dan en fason. Setou.

Mon pa konnen si i vanzans si kwa reste a vwar ki zot pe sey dir.

Prezan nou ganny nou en Mosyon ki sipoze koz lo en tranzaksyon biznes nou'n al dan *STC* nou'n al dan lot nou'n al dan lot e a okenn moman dan sa Lasanble sa nou bezwen dir avek Lepep Seselwa - a okenn moman personn pa'n ganny dir aret koze a leksepsyon ler nou, nou pou fer menm zafer ek zot ki

nou, nou pou ganny dir pa koze retourn lo Mosyon.

Pa koze retourn lo Mosyon aköz nou, nou pa ganny drwa fer komanter politik dan Lasanble.

Enn, Mr Speaker;- enn sa ki la anndan la nou ki la anndan reprezant sa parti dan sa Lasanble nou pa'n zanmen komet labi pouvwar. Labi pouvwar pe arive ozordi Mr Speaker kan ou annan en Minis i tap en dimoun avek loto i refize aksepte son tor e rod tou fason pou kasyet lefe ki in fer sa. Sa se labi pouvwar.

Labi pouvwar Mr Speaker, se ler ou annan en Minis ki sove dan en *roadblock* kot tou dimoun i bezwen arete pa ganny nanryen arive avek li e sa gard ki'n fer sa ki'n *deal* avek li sa zour swar i ganny sispann i perdi son gouse manze, sa i apel labi pouvwar Mr Speaker.

(APPLAUSE)

HON SEBASTIEN PILLAY

Labi pouvwar se ler ou ekrir bann *staff* dan ou departman e ou dir ek zot pa sipoze pran par dan manifestasyon politik kan ou dan en *pickup* deryer dan *motocade*, sa i apel lavi pouvwar.

(APPLAUSE)

HON SEBASTIEN PILLAY

Labi pouvwar se ler ou dir ek Gard ek Larme menm zot pa dan liniform, zot pa sipoze al rali kan deryer dan *pickup*, ou vwar Gard ek Larme - serten Gard ek Larme pe asize, sa i apel labi pouvwar akòz sa ki ou, ou fer personn pa ganny drwa fer.

(APPLAUSE)

HON SEBASTIEN PILLAY

So pa vin koz nou labi pouvwar Mr Speaker. Vin koz nou etik? Mr Speaker, i pa etik kan ou ti dir ek Seselwa pou sakouy pye ou pou fer larzan tonbe, Kan ou ozordi ou pe sakouy pye e ou pe *travel* partou *Abu Dhabi* dan tou pei lemonn *first class*. Sa ki apel pa etik Mr Speaker.

(APPLAUSE)

HON SEBASTIEN PILLAY

I pa etik Mr Speaker ler ou vin maltret France Albert Rene la anndan Onorab Georges i konnen ki mon pe dir kan se France Albert Rene ki'n fer sir ki ou kontinyen *practise* konman en avoka Mr Speaker.

(APPLAUSE)

HON SEBASTIEN PILLAY

E dan *archive Maison Du Peuple* i annan referans lo la Mr Speaker.

E byento sa bann referans pou sorti Mr Speaker.

Mr Speaker, napa okenn personn ki pou vin...

(Interruptions)

MR SPEAKER

Onorab, mon oule dir ou, ou pa pou ganny permisyon dir nenport keksoz. Kantmenm ou'n dir mon pa enteronp ou letan ou *out of order*.

Mon pe zis dir ou monn les ou koze e mon pou les ou koze mon. Me selman bann keksoz ki ou pe dir mon pe dir ou napa nanryen lo Mosyon.

Ou pe zis profite.

(comments off-mic)

MR SPEAKER

Order ! Ou pe zis profite ou pe dir nou pa enteronpe konmsi ou ava dir mon reste trankil les ou fer sa ki ou le, mon pa pou les ou e mon pe dir ou sa ki ou pe dir i *out of order*.

Prezan bann Manm mon pe demann zot gard lord fer zot bann entervansyon.

HON SEBASTIEN PILLAY

Labi pouvwar Mr Speaker, si ozordi dan nou pei i annan dimoun ki kapab eksprim zot lekor i annan ki pa kapab. Se sa lavi pouvwar.

(APPLAUSE)

HON SEBASTIEN PILLAY

E mwan mon pa'n ganny anvoye pou reprezant mon Parti *United Seychelles* - nou bann siporter e tou lezot Seselwa pou mwan vin reste trankil oubyen les okenn dimoun sibir e krwar poudir i kapab mont lo mon latet e dir mon ki pou fer. Omon konnen ki mon reprezante mon konnen kot mon sorti e mon konnen ki mon *stand for*.

E mwan Mr Speaker, ler mon tann en dimoun vin kot mon 2025 apre ki ou'n dan Gouvernman 4an ou'n vin koz tou sa koze ki ou'n koze senp keksoz ki bezwen ganny fer si zot annan problemm avek *rent* ki *NISA* i annan avek Parti *US* be i senp.

Donn notis, sorti!

(APPLAUSE)

HON SEBASTIEN PILLAY

Senp. Prezan ou vire ou dir ek nou koumsa poudir *US* pe abiz lo *NISA*, be ki mannyer *US* ki pe abiz lo *NISA* pa *NISA* ki pe dir ou i bezwen sa *premise*?

Ki mannyer *US* i kapab pe pran larzan ek *NISA* kan *NISA* ki pe dir ou i bezwen reste dan sa landrwa i napa lot landrwa pou li ale.

Mr Speaker, nou i senp sa - si sa i en tranzaksyon biznes ki ou pe koz lo la *then that's it*, i terminen atraver

Lagreman ki i annan dan sa tranzaksyon biznes.

Me sa ki mon pa dakor avek Mr Speaker, en sitasyon oubyen ensinyasyon ki'n ganny fer anba Lalwa *Political Parties* ki nou, nou pe kas Lalwa.

Sel parti ki'n kas Lalwa e i ganny tyonbo pe kas Lalwa se *LDS* Mr Speaker.

(APPLAUSE)

HON SEBASTIEN PILLAY

E Komisyon Eleksyon, pe refize pran aksyon ek zot, zisteman sa i apel labi pouvwar.

(APPLAUSE)

HON SEBASTIEN PILLAY

Mr Speaker, nou bezwen get larealite politik Sesel an fas.

LDS i konnen poudir ozordi i fay, i fay!

(APPLAUSE)

HON SEBASTIEN PILLAY

Malgre ganny eleksyon avek sa mazorite ki zot ti gannyen, malgre ganny eleksyon ek tou sa pouvwar i annan en sel keksoz ki zot in *fail* pou fer e sa se travay pou Seselwa.

(APPLAUSE)

HON SEBASTIEN PILLAY

Zot in travay zot. Zot in travay pou Arab.

(APPLAUSE)

HON SEBASTIEN PILLAY

Zot in travay pou *Russian*.

(APPLAUSE)

HON SEBASTIEN PILLAY

Zot in travay pou tou sa etranze ki ou pa konnen menm ed sa bann etranze kasyet larzan atraver bann zafer *One Coin - bitcoin* mon pa konnen, me selman zot pa'n travay pou Seselwa. E se sa le problemm ozordi Mr Speaker. Se sa la realite e apre ou ava vin dir ek nou ou ava vin koz nou, nou ki koronpi, nou ki isi laba.

Be nou ti koronpi, ok napa problemm, ou dir nou ti koronpi nou ti isi nou ti laba, napa problemm.

(APPLAUSE)

HON SEBASTIEN PILLAY

Me Seselwa, Seselwa Mr Speaker, Seselwa ti vot pou zot. Si nou ti sitan koronpi parey zot pe dir si nou ti sitan mal fer parey zot pe dir, Seselwa in met nou deor, ti met zot anndan.

(APPLAUSE)

HON SEBASTIEN PILLAY

Ti met zot anndan pou zot fer pli byen. Me zot vini ozordi avan lavey Eleksyon e koz nou ki mannyer la nou, nou pe anpes Seselwa ganny son trezyenm mwan.

Ki mannyer nou pe anpes Seselwa ganny son *long service*. Ki mannyer nou pe anpes Seselwa ganny ogmantasyon saler. Enn, Seselwa pa pe ganny trezyenm mwan aköz zot in donn zot lekor *allowance* ledan, *allowance* palto e tou lezot *allowance* ki annan ankör.

(APPLAUSE)

HON SEBASTIEN PILLAY

Seselwa pa pe ganny *Long Service* aköz ozordi nou bezwen peye pou Minis, fanmir Minis, dalon Minis, galan Minis e frer Minis pou *travel* lo avyon *first class*.

(APPLAUSE)

HON SEBASTIEN PILLAY

Sa letan kot nou, nou zis asize esper lezot koze mal bise, maltret nou in fini sa.

Si nou annan en keksoz pou nou dir zot nou pou dir zot. E nou bezwen dir zot dan en fason ki zot konpran ki nou sa lagrenn bat latet ki zot ti vann Lepep an 2020 nou pa pe aste nou.

(APPLAUSE)

HON SEBASTIEN PILLAY

Nou pa pou aste.

(APPLAUSE)

HON SEBASTIEN PILLAY

En keksoz ki'n ganny dir ankor se lenvestigasyon par ACCS. Me Mr Speaker ACCS ti mete *injunction* lo tou propriyete *United Seychelles*.

Ti met 6 mwan apre in pran ankor 9 mwan, 15 mwan. Napa nanryen ki ACCS in ganny vwar petet I pa'n fer son resers ankor enn fwa petet en lot dimoun ti ava donn li pou li lir. ACCS in retir restriksyon. Prezan Mr Speaker i pe dir *FPAC invstigate* rapor.

Be la mon lo rikord Mr Speaker atraver nou Clerk Komite nou'n ekri ACCS pou demann li si i annan en lenvestigasyon plizyer fwa.

Petet si i ti'n fer son resers i ti ava'n rod sa kopi sa bann let ek sa bann *email*.

Me i pa'n fer, ou konnen aköz Mr Speaker? Aköz son lentansyon i en move lentansyon.

(APPLAUSE)

HON SEBASTIEN PILLAY

Son lentansyon se vin fer politik bonmarse apre midi ki pou *backfire* lo en pwen fondamantal tre senp.

Ou o pouvwar ou anvi *NISA* sorti dir li ale. Senp. Napa nanryen.

Ler zot ti vini Mr Speaker an 2015 ti annan bann antite Gouvernman ki ti pe lwe kot *Espace*.

Onorab Ferrari pandan Bidze zot ti *threaten freeze* Bidze pou pa sorti. Minister *Tourism* ti sorti *Espace*. La ozordi selman zot in troun *Espace*.

(APPLAUSE)

HON SEBASTIEN PILLAY

No turning back - kit li lanmenm! *Everything* sa Gouvernman i dir ek Seselwa zot pa'n kapab gard zot parol.

La mon tandè Mr Speaker bann travayer *STC* ki ti pe al ganny *bonus* an Zilyet in ganny dir pa pou peye *bonus* an Zilyet la.

Mon ava peye si fodre Doyace. Parske ler mon ganny Eleksyon. So nou bezwen kapab sey ganny en konpran kwa ki zot oule egzaktèman.

Zot oule zot kot i annan en *playing field* politik ki zis zot ki fer politik. Zis zot ki kapab koze. Zis zot ki ava fer rali. Zis zot ki ava fer *motocade*. Zot in fer *motocade* avek plis *pickup* vid ki dimoun Mr Speaker.

(APPLAUSE)

HON SEBASTIEN PILLAY

Prezan zot in ariv en staz kot zot sey bouy tou keksoz an krwayan poudir dimoun pa mazine ki zot ti dir. Zot ti vin lo en baz en promes ki zot pou vin *deal* avek tou keksoz, *deal* avek.

Be oule dir mon *NISA* pe lwe avek *US* zot pa'n konnen, zot pa'n war? Nouvo *Board* i ganny apwente par Prezidan i pa'n diskite. In felisite vwala mon vwar Prezidan i felisite be lekel sa Prezidan ki la. I pa kapab Prezidan Michel i pa kapab Prezidan Faure aköz i bezwen Prezidan Ramkalawan.

Oubyen eski i bizi pe tro *travel* alors i pa'n gete, tousala i posib. Me selman sa ki mon konnen se ki in felisit *Board*.

Prezan nou pou demann avek Minister Finans avek lot pou al *investigate*. Be Minis Finans i zot Vis-Prezidan fek la bomaten, toulezour i vin dan Lasanble pou vin reponn keştyon. Zot pa ti kapab dir li poudir i annan sa problem, zot pa anvi dir li.

Mr Speaker, sanmenm sa ki apel en gaspiyaz letan dan sa Lasanble.

(APPLAUSE)

HON SEBASTIEN PILLAY

Prezan Seselwa prezan i zis asize i get sa. E nou bezwen

get lenformasyon ki ganny pase avek.

Bomaten in annan en *right of reply* kont mon ou'n donn en *ruling* mon pa pou al lo la. Baz sa *ruling* se en lalis *perpetrator*.

Travayer ki'n travay kot Komisyon, in konfirman an relasyon avek bann *perpetrator*.

Me selman sa lalis zanmen i vin piblik sa. Me si sa dimoun i oule mon fer en *apology* i senp, les mon ganny sa lalis. Mon ava fer en *apology*. *Apology*.

E mon pa ganny proteze par mon Speaker dan sa konteks mon. Mon ganny akize. Mwan mon ganny akize.

Par kont ler Minis i dir bann *taxi driver* i *overcharge* e *taxi driver* i ekrir ki pa zot tou e zot in donn non Minis bann *taxi driver* ki *overcharge*, Speaker, pa lir sa enn let. Sa demokrasi sa kalite keksoz ki nou oule vwar dan nu pei nou. Se sa ki nou pe vwar nou.

E aköz nou pe vwar sa se aköz koumsa ki politik i devret ganny fer isi Sesel. Politik i ganny fer aköz mazorite i kontrol tou keksoz i ava dir ki pou fer kan pou fer ki mannyer pou fer Mr Speaker. Se sa nou problem ki nou annan. E ozordi apre midi pou nou vin get sa kalite Mosyon.

E la mon tandé Mr Speaker, menm la mon pou ganny en lot *right of reply* menm si ASP i travay dan son lofis personnel i pa travay kot ASP.

Konmsi ki mannyer nou kapab konpran ki kalite Gouvernman ki pe ganny *run* kot tou dimoun i en sef dan li menm. Tou dimoun i deside ki pou fer e *at the same time* ou annan en Lasanble Nasyonal i *run around* parey en *headless chicken* pe sey rod tou keksoz pou li atrape.

Mwan mon oule ganny en konpran Mr Speaker, petet *mover* Mosyon i kapab eksplik nou konpran sa.

Tou sa bann keksoz ki in dir bann lenformasyon ki devan tou sa bann Lotorite konsernen. Be ki pwa enkonpetan sa Gouvernman i enkonpetan ? Ki si tou sa ki in dir i mal ki pe ganny fer, tou sa bann lazans pa kapab *deal* avek.

Be savedir zot devret ale. I zistifye par zot prop Mosyon pou prouve ki la la rezon aköz zot devret ale zot sitan enkonpetan Mr Speaker.

Mwan mon krwar poudir nou annan en problem dan sa Lasanble aköz la bomaten nou'n vwar piblik in vwar ki mannyer nou'n sey *rush* travay Lasanble pou nou ariv lo sa bann Mosyon.

Mon tandé menm dan *Bills Committee* bann *expert* in ganny dir si *Bill* pa bezwen anmennen.

Aküz? Zis pou ki nou kapab pran sa bann Mosyon politik pou vin fer politik bonmarse dan Lasanble.

Selman ler nou, nou anmenn Mosyon ki zot dir swadizan en politik bonmarse nou, nou ganny koupe, ou pa kapab anmennen.

En Mosyon pou demann kree en Komite pour bann dimoun en *tribunal* pou le 7 Desanm i pran 2 mwan pou en *Private Members Bill* ganny en larepons, de mwan pou Vis-Prezidan ekrir en Manm pou dir li sa. Sa pa son privelez ganny afekte sa.

Manm i ekrir sa Lasanble pou demande aköz lenformasyon pa ganny donnen avek bann Manm Proporsyonnel sa kote latab parey laba kot Minis i konfirman, Manm pa ganny sans dir zot *matter of privilege* dan Lasanble. Sa ki pe arive la. Nou, nou pou zis sibir. Nou pou zis les sa arive nou. E nou pa pou dir nanryen. Be nou moto i *Fearless in dignity* nou! Nou pou dir keksoz.

(APPLAUSE)

HON SEBASTIEN PILLAY

Nou pou kontinyen dir e nou pou kontinyen dir. Sa Eleksyon pa pou pase parey 2020.

(APPLAUSE)

HON SEBASTIEN PILLAY

E mon garanti poudir si zot retourn dan Lasanble avek 10 Manm zot, zot byen retournen.

(APPLAUSE)

HON SEBASTIEN PILLAY

Ou konnen mon kontan en keksoz ki Onorab Flory Larue ti dir resaman Onorab. Mon vwar i pe debout konman kandida endepandan Au Cap mon swet li bonn sans.

Ki in dir li, i dir koumsa poudir dan Lasanble ti annan keksoz ki i anvi dir i pa'n zanmen kapab dir akòz *party line*.

Sa i en lendikasyon si ou vwar en dimoun parey Flory i vin dir ou sa. La ou dir Flory i fol, *come on men*.

Onorab Loizeau, ou pa devret dir en keksoz koumsa i pa byen. Pa mank respe pou en madanm koumsa.

La ozordi ou pou dir Onorab Loizeau ou dir Flory i fol selman ler i ti la i pa ti fol.

Mr Speaker, *come on* Mr Speaker.

MR SPEAKER

Order! Order! Onorab Pillay i annan laparol.

Mon ava donn ou *point of order* apre.

HON SEBASTIEN PILLAY

Mersi Mr Speaker, mon annan laparol. En lot pwèn ki'n souleve Mr Speaker se sa size kot Komite ki kot la baze kot Minister later. *Yeah* be sa Komite i la. Sa Komite i sipoze pe get sa bann keksoz, be eski Onorab in fer en rapor ek sa Komite? Parey i toultan i dir nou eski in al fer en rapor li? Eski in fer en rapor ACCS? Eski in fer en rapor ek sa bann antite konsernen?

Be si i pa'n fer en rapor ek son bann antite ki i dir i pe byen travay savedir Onorab i enkonpetan Mr Speaker.

Si i ti annan tou sa lenformasyon tou sa dosye devan li e i toultan dir nou poudir sa bann antite [pe byen travay nou felisit sa bann Minis nou fek felisit Minis Rangasamy sa semenn.

Me akòz ou pa ti anmenn sa bann problem kot li laba pou *deal* avek?

Se sa kestyon ki devan nou ozordi Mr Speaker. Mon pa oule *impute* okenn *improper motives* lo *whether* Parti Gouvènmàn i oule fer politik bonmarse ek sa.

Piblik i ava vwar sa pou zot menm. E bokou zot ki'n siport *SNP* zot konnen ozordi

kote zot ete, par rapor sa bann ki pa'n zanmen siport *SNP* ki ozordi i ganny met da plato. Zot, zot konn tre byen la deor. Mon pe koz pou zot.

Me sa ki reste konman en esansyel Mr Speaker ozordi se ki zot o pouvwar e zot ti annan tou pouvwar pou pran en desizyon lo la.

Me prezan ki nou pe ganny dir Lasanble i bezwen *rush* bann *Bills* ki time sensitive akòz i pou annan en ta *Bills time sensitive entity*.

Mr Speaker, nou napa - mon pa konnen si i annan en Gouvènmàn ouswa azanda Lezislatif i pli an dezord se sa enn ki la.

Omwen avek Gouvènmàn Prezidan Faure ou ti ganny ou en *template* bann Lalwa ki i anvi anmennen. Sa enn ki la ni en *template* napa. Napa!

En dezord total. E sel keksoz ki zot kapab fer se vin avek bann Mosyon ki gaspiy letan Lasanble pou demann en antite pou aret fer biznes avek *US*.

Ou ti serye dan sa demann ler in fer bann Lotorite konsernen *deal* avek *NISA*, dir li sorti.

(Pa ankoler ou taler ou ava koze ou. Mon pe dir pou ou tande)

E prezan kwa ki enteresan dan tousala dan sa ki'n arive la, sa Mosyon in

ganny ariv lo *Order Paper*. Mwan mon krwar i *fail the test of admissibility*. Akòz i *fail the test of admissibility*? *NISA* i sipoze en antite Gouvènmàn ki pa Gouvènmàn mannyer mon pe konpran mannyer zot pe dir endepandan, dapre sa ki zot pe dir.

E dapre Onorab Arissol *NISA* i sipoze travay sa lenterferans me pa ou pe enterfer dan *NISA* ler ou pe dir li sorti dan en relasyon biznes avek *US*.

Konmsi ki kalite stupidite ki zot vin avek pli ale. Mon pa konnen si sa *motocade* in sitan fay, ki prezan in afekte zot latet prezan zot bezwen vin fer tousala.

Konmsi pou mwan sa ki sagrinan. Zot dir bann keksoz ki pa fer sans apre zot vin la avek. Zot pou bezwen tann mon, zot in anvi anmenn Mosyon zot pou tann mon.

Mon bezwen Mr Speaker zis reste lo en pwen fondamantal, en pwen enkontournab ki la devan mon la mon pe get sa bann portre dan Nasyon mon felisit sa bann dimoun ki'n ganny apwente lo sa bann *Board* me selman sa i mon pwen kardinal.

Prezidan i apwent en nouvo *Board*, i apwent nouvo *Board PMC* ki tonm anba Minis pou Finans. I donn Minister Finans son Vis-

Prezidan. I apwent nouvo *Board NISA* i felisit *Board* avan.

Oule dir mwan dan tousala dan tou sa bann apwentman, dan tou sa bann keksoz ki'n pase napa en moman donnen ki nou'n dir be in ler pou *NISA* aret pey *rent US*?

Eski sa Seselwa pe ekout mon la deor eski ou vwar sa fer sans ? ki ozordi, ozordi dan Lasanble apre midi 3er 40 ki nou pou vin debat lo en Mosyon, poudir sa Mr Speaker.

Zot in sitan ariv sa dan sa rigol dan sa fon barik ki zot in arive la ki zot napa ankor pou sey travay lo la ki sey anmenn sa bann Mosyon koumsa.

La byento nou pe al ganny enn ki i pe al dir pran *Maison Du Peuple* be vini ou ava pran.

(APPLAUSE)

HON SEBASTIEN PILLAY

Ler nou pou anmenn sa Mosyon *Maison du Peuple* osi nou pou annan deba lo tou bann lezot later ki sipoze ganny rebran. Sa osi nou pou anmenn. Akoz nou tou nou konnen poudir koze tou dimoun i kapab koze.

Aksyon ki i devret ganny fer. Sa ki Prezidan Ramkalawan ti fer se i ti *talk*

an 2020. Me son *talk was cheap*.

Akoz la ozordi Seselwa ki pe pey pou son *talk*. Mon pa vwar nanryen ki zot in kapab akonpli dan sa dernyen 5an ki montre en Gouvernman ki'n nobou delivre.

Si zot pa kapab - si zot pa kapab vwar poudir zot ti devret par egzanp anpes *NISA* kontinyen fer biznes avek *US* pandan 5an, Mr Speaker, *your Government needs to go!*

(APPLAUSE)

HON SEBASTIEN PILLAY

It needs to go! Pa trakase pa ou ki donn letan ou.

So an konklizyon Mr Speaker, an konklizyon nou vin lo sa pwen, tranzaksyon biznes ant *NISA* avek *United Seychelles*, dan son Lagreman i annan en *clause* ki dir poudir ou kapab donn en mwan notis *and then ale, evacuate sa premise*.

I enportan pou repete Mr Speaker, akoz repetisyon i zis ki dan lavi pou nou konnen ki pe pase.

Alors Mr Speaker, *NISA* ti annan pou li donn son notis. Nou, nou *ok* ek sa nou. Nou napa problem ek sa nou *ok*?

I ava annan dimoun ankor ki pou vin lwe landrwa. Prezan si zot annan lezot problem zot oule rode, kontinyen rode zot. Zot oule

pran *Maison du Peuple* vini! I annan lot ki zot oule pran. Vini, vin pran me konn vini, konn vini letan zot vin pran.

Zot konnen Mr Speaker. E ler nou pran deba lo sa Mosyon i annan bann lezot lenformasyon ki nou ava fer sorti, sorti dan larsiv *Maison du Peuple*. Nou ava met an gran piblik.

MR SPEAKER

Ou'n ganny 30 minit Onorab.

HON SEBASTIEN PILLAY

Mon pe fini Mr Speaker, mon pou fini lo sa not. Si Seselwa i fer sa fot pou donn zot ankor, Gouvernman oubyen mazorite dan sa Lasanble i pli gro fot ki Seselwa i fer.

Be mwan mon konvenki Mr Speaker, ki Seselwa in vwar kler e ki 2025 kan Septanm la, premye keksoz ki pou arive plizyer sa bann boutey ver pou tonbe lo miray ok?

E si i retourn 10 boutey ver i byen retournen.

Dezyenmman, Mr Speaker, *State House* se en Prezidan *United Seychelles* ki pe monte Mr Speaker!

(APPLAUSE)

HON SEBASTIEN PILLAY

Akoz zot in montre ki zot enkonpetan zot pa kapab travay e Seselwa pa kapab fer

zot konfyans. Mersi Mr Speaker.

(APPLAUSE)

MR SPEAKER

Mersi Onorab. Bon in fer mon krwar lerdtan edmi pre depi ler nou pe asize.

Mon krwar nou ava pran en poz e nou ava rebran. Selman mon pou limit poz en pti gin ozordi akoz nou *short* letan pe fini, nou ava rebran 4 er 05. Mersi.

(BREAK)

MR SPEAKER

Mon ava don laparol Onorab Sathya Naidu.

HON SATHYA NAIDU

Bonn apre midi Mr Speaker, bonn apre midi tou koleg Onorab e tou dimoun ki a lekout ki pe swiv nou sesyon ozordi.

Mosyon anmennen par Onorab Henrie i annan son nesesite e sa sete pou byensir edifye nou pep vizavi *NISA* e sa Lagreman ki i annan avek *United Seychelles* konman en parti politik, e akoz i annan en nesesite pou sa lorganizasyon ki ganny mandate dapre Lalwa, pou donn raportaz ouswa nouvel lo en ki enparsyal me selman i vini trouv li pe kondwir son loperasyon anba en

lenfrastruktir ki ozordi i tonm avek en parti politik e in annan lezot lenformasyon ki'n ganny soumet vizavi lakantite larzan sa parti politik pe fer vizavi tranzaksyon ki zot pe angaz zot avek *NISA*, e aköz eski lesansyel i dwatet ganny fer pou revwar pozisyon *NISA* an relasyon avek Lagreman ki zot annan avek Parti *United Seychelles*.

Zisteman ti dan rapor odit pou operasyonnel i en pwen konseren, i fer ki sa lorganizasyon i pou bezwen revwar son pozisyon e fer le neser.

E dwatet sa ki dwatet arive e parey Onorab *Leader* Lopozisyon in dir kekfw a en desizyon entern ti'n dwatet ganny pran dan plas anmenn en Mosyon.

Me isi atraver Lasanble Nasyonal, enn bann pouvwar ki nou, nou annan konman bann Manm se pou anmenn en Mosyon pou diskit lo en tel size espesyalman ler i kapab annan distorsyon apre ki en desizyon entern lo baz Gouvernman in kapab ganny pran, kot pli tar ou pou vwar *People Plus* mem konman en portparol *US* kot zot pe detourn desizyon Gouvernman parey zot fer *week in and week out*, me selman Lepep Seselwa i ase entelizan, zot lir, zot analize,

zot balanse zot konnen kan mansonz i ganny ekrir.

Me selman i enportan osi fer resorti nou pozisyon vizavi en tel relasyon ant *NISA* avek *United Seychelles* atraver sa *lease*, se pou osi fer bann travayer ki travay avek sa Nasyon konn nou pozisyon aköz i annan 52 travayer an tou, 42 plentan *and then* 10 lezot pe fer *part-time*, pou zot osi konn nou pozisyon aköz eski nou ozordi nou pe debat asize la e nou pa zis pran en desizyon an foupmanmal e apre demen zot vwar zot pe bezwen bouz dan en lokasyon pli tar.

E sa ki'n ganny ilistre atraver bann largiman ki'n ganny soumet par Onorab Romain, in non selman koz lo *NISA* e provizyon legal i dwatet pe swiv, me in osi plas lanfaz lo en lot tranzaksyon a sa ki konseren *STC*.

E byensir nou bezwen ilistre lo lafason ki sa parti politik ki'n o pouvwar pandan plizyer deseni in abiz pouvwar.

E byensir ler nou pe koz lo *NISA*, nou bezwen balans li avek en lot pwen kot nou pe ilistre en legzanp kler pou Lepep Seselwa vwar pou zot menm, kot dan sizyenm Lasanble Nasyonal ou ti annan *FPAC*.

Mon annan tou respe pou bann koleg lo kote *LDS* ki lo sa Komite, me latet sa Komite mon krwar nou dwatet

poz en pe kestyon akòz Oditer Zeneral in fer le nesese alòrs ou ti pou espèkte serten aksyon ti pou swiv.

Me nou tou nou konnen, Lepep Seselwa in vwar diferans ant FPAC anba sizyenm Lasanble Nasyonal par *leadership* Prezidan Ramkalawan sa letan i ti Onorab Ramkalawan e nou vwar diferans a latet FPAC ozordi.

E byensir atraver sa mankman konfyans kit nou, nou annan vizavi lo lafason ki li i pe deservi sa responsabilté, nou bezwen trouv nou atraver loter Mosyon e diskite lo sa size pou met Lepep Seselwa o kler vizavi sa sityasyon ki nou pe diskite ozordi.

E byensir listwar - atraver listwar nou kapab aprann e nou kapab aprann pou pa repet menm fot. Parti LDS pa pou fer sa ki zot, zot in fer, akòz nou nou'n debout pou sa ki byen e sa ki zis e sa ki drwat. Zanmen eski okenn parti politik espesyalman ler zot in ganny pouvwar pou diriz nou pei Sesel e pou anmenn nou pep delavan, i itiliz son pozisyon atraver bann diferan lorganizasyon lo baz Leta pou zot kapab akimil bann byen, pou zot kapab soutenir zot parti.

Se sa ki zot in sey fer. Lo lafason ki zot in akimil 46 bout

later. Sa 46 bout later ti kapab al pou bann endividi ouswa plizyer lezot lorganizasyon ki ti kapab anmenn nou pei delavan.

La i fer mon mazin sa bout propriyete Saint Louis par egzanp, kot ozordi i annan restoran me avan sa zot ti'n vann avek en etranze apre finalman in pas avek en lot dimoun e byensir wi sa dimoun pe fer son biznes ozordi selman ler mon get sa batiman mon panse ki nou ti kapab etabli bann bokou pou bokou plis biznes ki sa enn ki la ozordi.

E alòrs in montre klerman ki lo lafason ki zot in akimil later kot zot in mazin zis zot lentere personnel, ouswa lentere serten endividi otour zot parti zot in met nou pep an ayer.

Wi, dan sa 43 an ki zot, zot in la in annan progre dan en serten fason, me selman mon santi Sesel ti'n kapab ariv bokou pli lwen. Seselwa in vwar kler apre 2020 lo lafason ki LDS konman sa parti ki o pouvwar pe travay dan zot lentere.

Pourtan pou sa *motocade* ki pe fatig zot e ou a krwar zot pa pe vwar tro byen al sanz ou linet si fodre Onorab, me selman ler mon ti'n desann 1 er apre midi mon ti'n retourn se mon pros 9er diswar akòz depi 1er ziska 8er nou'n lo

semen nou pe fer nou *motocade* avek sa gran mazorite Seselwa ki krwar nou, nou parti e zot vwar travay ki nou, nou pe fer.

E Dimans zot pou vwar Grand Anse Mahe mannyer i pou ete. Akoz se *LDS* se *LDS* Lepep Seselwa in met konfyans ladan.

Mon vwar Onorab Pillay pe koz, e be selman mon kapab dir isi dan sa lenstitisyon monn antre a laz 26an konman en Manm Elekte pou distrik Saint Louis. Malgre ki zot in maltret mwan dan letan konpanny pou dir mon pa en Seselwa isi laba, antre dan mon distrik, antre dan tou kwen ou pou vwar ki mon distrik pe bouze Onorab Pillay.

Sa i en keksoz ki mwan mon pou met devan ou konman sa endividi ki kontan -

MR SPEAKER

Adres Speaker silvouple.

HON SATHYA NAIDU

Mr Speaker, atraver ou Onorab Pillay in fer mansyon serten benefis Minis i gannnen.

Me koz en kou lo benefis ki ou gannnen mon frer. Ilistre bout par bout, morso par morso, vizavi benefis ki ou gannnen avek Lepep Seselwa. Dir nou konbyen ou gannnen pou sekirite, dir nou konbyen

ou gannnen pou bann lezot keksoz.

Akoz ? Akoz i vin ek sa pozisyon. Ler mon fer konparezon avek sa ki mon pe gannnen avek pou ou e ler mon pe regard travay ki mon'n fer dan mon distrik an konparezon avek sa ki ou'n fer, atraver ou Mr Speaker sa ki'n Onorab in fer lo en baz Nasyonal mon bezwen poz kestyon Mr Speaker. Mon bezwen poz kestyon.

(Interruptions)

HON SATHYA NAIDU

Akoz en *MNA* an konparezon avek *LOTO* i ganny en diferans an term saler, sa i akoz i vin avek responsabilite ki vize ver sa pozisyon.

Alors ler nou pe fer konparezon ant sa ki en lot pe gannnen avek sa ki ou, ou pe gannnen, annou balans sa byen, akoz responsabilite ki vin avek sa pozisyon i bezwen vin avek en reminerasyon, ki fer sans ki egal e ki zistifye, travay ki sa endividi i bezwen fer. Annou aret pran Seselwa la deor konman bann dimoun ki napa lentelizans pou kapab fer bann lazistaz nesaser vizavi pwen, ki en endividi - konman en Manm Parlman i oule bouze atraver sa Lasanble.

Wi, nou tou nou annan en drwa pou eksprim nou. Silvouple annou servi sa drwa

byen. Ou'n admet, si oule admet poudir wi mon parti in fer in mal e *next time* ou *forward* e zot oule rann sa 46 bout later pou Lepep Seselwa pou nou pei bouze, fer li.

Pa vin dir ki non, non, non nou, nou pa form parti tou bann atosite - nou, nou pa form parti sa parti. Selman zot menm zot dan rali zot pe selebre 60an sa menm parti.

E pa bezwen vin koz lo listwar LDS, aköz ou pa konn listwar LDS aköz sa i en keksoz ki ou pa pou konpran. Aköz nou nou en pati ki dinamik nou, nou en melanz plizyer lezot parti ki'n ganny kre. *SNP* apre ki formasyon LDS nou ti'n pran en desizyon pou ferm parti e alors nou in annan en lot parti ki'n vini e sa se Parti LDS e se koumsa ki nou vwar diferan dimoun dan diferan parti politik ozordi i avek nou.

E nou vwar zot siporter osi pe dekile avek zot aköz zot in fatige avek sa retorik kot zot a pe glorifye Albert Rene.

Msye Rene ti annan son relevans li. Me apre zour ki'n ale i nepli relevan ozordi. Lazenés pa oule retourn an ayer. Zot oule bouz an avan. E i enportan ki nenport parti politik sa i aplik pou nou. Bann fot ki zot, zot in fer nou, nou pa pou fer. Nou pa pou zanmen fer sa bann fot ki zot, zot in fer. Aköz se pou sa

rezon ki dimoun in vot pou sanzman.

E i enportan ki i annan travay nesese ki ganny fer ant *NISA* avek Gouvernman pou revwar sa sityasyon ki la e mon swe isi ki dan en dele letan rezonnab zot kapab vwar en lot lokasyon kot zot pou kapab bouze, pou zot kapab kondwir zot lopeyasyon e i bezwen ganny fer dan en dele letan rezonnab.

Wi, nou pa krwar dan konfli lentere - nou pa krwar dan labi pouvwar. Nou krwar dan bann prensip ki zis, ki fer sans e ki dan lentere Lepep Seselwa.

E nou pe travay dan lentere Lepep Seselwa. E 100poursan le 27 Septanm zot pou met konfyans dan nou, zot pou donn nou ankor 5an vi nou'n travay byen pou sa 5an zot pou donn ou ankor 5an, e apre sa nou ava gete ki mannyer nou ale e Lepep Seselwa i ava koze atraver bwat vote. Me selman en keksoz i kler ki nou bezwen en Lopozisyon bokou pli serye, bokou pli responsab ki sa enn.

Alors dan bwat vote silvouple reflesir byen. Ozordi i annan plizyer lezot parti - sa ki mon pe vwar lo *ballot paper* i regretab pou nu la demokrasi, fransman dir ou, aköz i enportan pou annan kalite an term kandida. Pa fer sans annan kantite.

Me selman *LDS* ki i annan sa kalite; *LDS* ki annan sa vizyon pou Lepep Seselwa pou nou bouz nou pei an avan e se nou pou reste la pou nou kapab anmenn Sesel kot fodre ale. Akoz i annan travay ki reste ankor pou nou fer baze lo tou bann keksoz ki zot in mal fer, se nou ki pe repare pou nou kapab anmenn nou pei kot i dwatet petet ete. Mersi Mr Speaker.

(APPLAUSE)

MR SPEAKER

Mersi Onorab. Onorab Woodcock.

HON WAVEL WOODOCK

Mersi Mr Speaker. Mr Speaker, ozordi laverite in sorti dan sa Lasanble. Zis parey dan sizyenm Lasanble ler Onorab Simon Gill ti dir ki per fondater ti dir li ki zot in tro get zot lekore Mr Speaker.

La ozordi Mr Speaker i lo verbatim Mr Speaker, pa mon ki'n dir *Leader* Lopoziyon 3er 26 minit 26 segonn Mr Speaker *Leader* Lopoziyon in admet e in dir Mr Speaker, Lepep Seselwa antye an deor in tann li.

E mon'n al tire Mr Speaker lo *Youtube* in dir, "Nou ti koronpi i *ok*, napa problem Mr Speaker.

(APPLAUSE)

HON WAVEL WOODOCK

I lo rikord verbatim, mon parey monn dir *Leader* Lopoziyon in admet devan nou Lasanble Nasyonal.

Mr Speaker, sa rezon akoz nou bezwen kit li lanmenm. Akoz nou pa kapab les sa bann kalite pratik ki Onorab Gervais Henrie in anmenn devan sa Lasanble ozordi, bann pratik Mr Speaker, ki napa etik pratik Mr Speaker, ki koronpi.

E nou, nou pa kapab les sa bann kalite pratik ki'n arive dan lepase e ki'n arive dan lepase e ki'n arive e ki ankor pe arive e ki *US* pe fer Mr Speaker, retourn ankor dan en Gouvernman serye e en Gouvernman responsab parey nou annan ozordi anba ladministrasyon *LDS*.

Mr Speaker, *SPUP* sanz son non mannyer i oule *SPPF*, *PLUS* se menm parti. E zot in dir zot menm in ganny fer dan zot bann Konvansyon ki zot bezwen protez zot bann aki. E zot bann aki pe sap zot Mr Speaker.

Sanmenm sa ou vwar zot dan lafreder zot pe taye pe vann tou sa bann aki, akoz zot konnen nou pe vin rode. E mon per taler zot a sey taye pou vann *Maison du Peuple* Mr Speaker. Mon pa fye zot sa bann boug mwan Mr Speaker.

E Mr Speaker, zot pe repet bann retorik, zot pe fit sa vye sa sabouye Mr Speaker, an krwayan i pou koup ankor ki i pa pou zanmen koupe Mr Speaker.

E laverite Mr Speaker, ki ozordi in ganny devwale dan sa Lasanble i ofans zot Mr Speaker. Laverite i ofans son met.

Sa ki nou vwar Mr Speaker, e sa ki nou kontinyen vwar lannen ale, lannen vini se labi Parti *SPUP*, Parti *SPPF*, Parti Lepep *US* ki ankor pe arive ozordi Mr Speaker.

US in fer en kantite keksoz dan zot benefis dan lepase Mr Speaker. Zot napa etik. Nou vwar bann pratik koronpi. Mr Speaker, kot zot in abiz zot Lotorite, parey monn dir kot zot bann Manm menm in admet Mr Speaker, e la ozordi *Leader* Lopozişyon in admet.

46 morso later *acquired* Mr Speaker, swa gannnen pou nanryen pou R1 Mr Speaker. Mr Speaker sa se labi. I pa byen, i pa byen Mr Speaker sa se vorasite e Lepep Seselwa deor pa kontan.

E dan rapor Oditer Zeneral ti sorti Mr Speaker, ki *Leader* Lopozişyon in fer pous devan pou depouy sa rapor Mr Speaker, pou anmenn bann antite Gouvernman devan pou zot diskrit sa, i pa'n fer sa i montre sa *contrast* ant *Leader*

Lopozişyon ozordi avek Prezidan Ramkalawan, ki sa letan dan son letan li ler i ti *FPAC* i ti fer sir ki tou bann rapor koripsyon i ti vin devan *FPAC live and direct* kot tou dimoun Seselwa i kapab vwar ekoute e analize. I pa'n fer sa li.

US atraver son lakonpannyen *Sun Press Limited* Mr Speaker, zot pa'n pey vre pri sa propriyete Mr Speaker, ki parey nou'n aprann ozordi zot in *lease* avek *NISA parcel V8543* Mr Speaker, 1663 met kare parey loter Mosyon in dir Mr Speaker en lakonpannyen ki pou *US* Mr Speaker, in *lease* sa morso propriyete sa propriyete Mr Speaker, avek Nasyon en lakonpannyen Gouvernman en lakonpannyen paraetatik Mr Speaker.

E sa i montre Mr Speaker, en keksoz ki i pa en pratik ki premye fwa nou fe fas avek dan sa Lasanble Nasyonal.

Kot *United Seychelles* i *lease* later Mr Speaker, pou nanryen pou en pti sonm larzan apre re *lease* sa menm later ouswa sa menm propriyete avek en lot antite Gouvernman.

Listwar in montre e i ankor pe montre vre karakter, vre personnalite, sa *United Seychelles* ki Parti *US* degize

Mr Speaker, Parti Lepep *SPUP* degize Mr Speaker.

US Mr Speaker, ekout sa byen - e Onorab *Leader* Lopoziyon i annan lodas pou dir sa Mosyon i stipid - en gaspiyaz letan!

Eski i en gaspiyaz letan ou abiz lo larzan Seselwa Mr Speaker?

US i *lease* en propriyete avek *NISA* pou R763 mil 848 Mr Speaker. En propriyete zot in *lease* Mr Speaker, pou selman pa ni menm R50mil Mr Speaker, avek Gouvernman e zot pe fer en profi tou le lannen R713 mil 958 profi par lannen Mr Speaker! En later pou Gouvernman ki kalite lodas, ki kalite vorasite? Ou ganny sa later pou pa ni menm R50 mil ou lwe sa kantite pou ou fer sa kalite larzan? Larzan ki Seselwa Mr Speaker, ti kapab pe benefisye avek?

E sa *lease* parey loter Mosyon in dir pou 30an, *United Seychelles* pou fer en profi R21.4 milyon profi Mr Speaker. Eski i normal sa? Eski i stipidite sa? Eski i en gaspiyaz letan pou nou ekspoz US pou sa ki zot ete Mr Speaker?

Mr Speaker, i fer lapenn. E mwan fransman mon leker i fermal ler mon vwar ki mannyer sa parti in abiz lo later Lepep Seselwa. Ki nou ti kapab fer bokou avek Mr Speaker.

Nou'n vwar konfli lentere, labi menm parey Onorab in dir pe al kot nou *Political Parties Registration and Regulation Act*, kot endirekteman ouswa direktteman benefisye avek en larzan ki sorti kot en antite Gouvernman.

Apré zot ava vin aköz nou, kan zot menm zot, zot pa'n fer zot *form declaration of assets* zot pa'n soumet?

Kan zot menm zot, zot pa vot Bidze Anti-Koripsyon Mr Speaker? Zot lager kont Anti-Koripsyon?

Zot vin ziz nou kan se zot menm zot ki pe kas tou Lalwa. E dayer zot pe aköz nou, nou ki pe kas Lalwa bann parti politik. Kan lepase in montre ki bann labi ki zot in fer atraver Lazans Proteksyon Sosyal, servi larzan Seselwa pou aste vot Mr Speaker.

Ozordi zot annan sa lodas vin akiz nou - en parti responsab ki nou, nou pa pe fer sa bann kalite keksoz Mr Speaker.

US in abitye fer sa. *Lease* later Gouvernman. E la laprev levidans ki ti annan en let sorti kot zot Sekreter Zeneral *Ex-Minister Cosgrow - Ex-Minister* Cosgrow in fou li deor ... pase ek en *tanbour - ek Onorab Tamboo Mr Speaker, ki pe fer Mr Speaker? Zot in ofer 3. 5 *NISA* pou aste sa later pou R3.5 milyon. Pa'n ase abize Mr

Speaker? Donn zot en milyon touzour apre zot ava pey R100 mil par mwan.

Mr Speaker ki si sa, sa? Eski pa labi sa? Eski sa pa koripsyon sa? Eski sa i pa levidans ki zot in vol Lepep Seselwa Mr Speaker. Levidans i la kler devan nou.

E *lease* Mr Speaker, mwan dan mon distrik ou konnen kantite difikilte nou'n gannyen pou nou kas bann *lease* ki'n ganny fer?

Lease, i annan son bann lenplikasyon legal. E ler aköz pou nou kapab zis donn notis fer *NISA* sorti.

Mr Speaker, ler Onorab Gervais Onorab *Jose Henrie pe dir sa, ou konnen ki montre ki Onorab Aglae i dir lot kote latap *off-mic*? I dir koumsa "pey nou, nou larzan avan apre nou ava sorti!"

Sa 21 milyon Mr Speaker, ou vwar lafason ki zot mazine Mr Speake? Vwar lafason ki zot rezonnen Mr Speaker?

Annou pa bliy propriyete Bois de Rose. Bois de Rose V10104 ki ti ganny *lease* avek US pou preski nanryen Mr Speaker, ankor dan sa bann menm tape menm - dan bann R50 mil si mon pa tronpe.

Apre zot ti *sublease* sa menm propriyete avek STC an 2014 pou R823! *Exact replica* Mr Speaker.

Zot *sharp* lo sa, zot *master* lo la Mr Speaker! 823 mil pa par lannen Mr Speaker, sa enn ki la ki nou pe *deal* avek i par lannen. STC ti R823 mil par mwan Mr Speaker! Depi 2013 Mr Speaker, STC ti ganny peye *I mean* STC ti bezwen pey US R39milyon zis *rent* Mr Speaker; R39milyon, kantite larzan zot benefisye. Kot in ale sa bann larzan? Eski zot in ed zot dimoun? Ouswa zot in monte desann lo tiket 8 mil Dolar Mr Speaker pou monte desann *Abu Dhabi, Dubai* partou zot bann...

Apre zot ti vann sa menm propriyete pou R17milyon Mr Speaker. Mon annan levidans ankor Mr Speaker. Annou al en kou lo Praslin, annou al en kou lo Praslin.

Horizon Complex Mr Speaker. En lot propriyete *acquired* ankor Mr Speaker Praslin, Baie Sainte Anne dan distrik Onorab Churchill Gill ek Onorab Porice. En bon pe antite Gouvernman ti pe *lease* ti pe lwe lespas lofis avek *United Seychelles*; Servis Sosyal, SNYC zot ti'n met li en pti trou anler lwen avek manrmay, lwen avek lekol ti pey sepa konbyen tou le mwan Mr Speaker.

E ozordi se mwan ki ti anmenn sa lalit dan sizyenm Lasanble e mon kontan setyenm Lasanble aköz i en konfli lentere pou sa bann

antite Gouvernman sorti *Horizon Complex* e ozordi SNYC i deryer Sant Kominoter Grand Anse Praslin, ki annan bokou 5 a 6 group lentere ki pe ganny ki pe deroule an se moman Mr Speaker.

E pa bliy osi, resaman Onorab Gill dan enn son lentervansyon dan Lasanble i ti fer en *statement* vreman enportan. I ti dir i ti demann Minis ki ti la devan aköz zot pa ti aste later Moulinie Payanke? Aköz ki Gouvernman pa ti aste?

Me mon pa konnen si son *leader* ti'n bliye dir li poudir sa later Moulinie Payanke kot *gym* i ete ti pou i later *United Seychelles* Mr Speaker.

Aküz ki zot in vann pou milyon. Aküz ki *United Seychelles* pa ti rann sa later Moulinie e sa *gym* Payanke aköz pa ti donn Gouvernman later zot in ganny pou nanryen Mr Speaker. I montre Mr Speaker zot vre lentere - zot vre mantalite, zot vre personnaz Mr Speaker, e i pa pou zanmen sanze. *Once* en voler touzour en voler Mr Speaker.

Sanmenm sa ki apel vorasite Mr Speaker. Me i ti ava rann sa later, i ti ava dir Onorab Gill mon tann ou mon tandé ou pe lager Moulinien wi, manrmay ki ti annan sa *gym* la pou bezwen sorti.

Be a nou ava rann ou nou ava rann Gouvernman. Manrmay Moulinie, manrmay Cote D'Or ava ganny sa laplenn pou zwe. Manrmay ti ava kapab kontinyen vin dan *gym* laba Cote D'Or Mr Speaker. Non Mr Speaker vorasite in vann pou milyon Mr Speaker pou zot donn bal lo la. Taye vann bann propriyete partou.

English River Mr Speaker. Nou bezwen ozordi fer en bazar dan kwen laba aköz sa later *US* in vann.

Saint Louis zot in vann in fer restoran anler. *Espace* in vann pe koz *Espace Leader* Lopozisyon atraver ou Mr Speaker, pe koz lo *Espace* zot in vann *Espace for* milyon, non? R100milyon zot in vann *Espace* Mr Speaker.

Later Flanbwayan si Gouvernman pa anpes zot kot Flanbwayan i ete Mr Speaker zot ti pe sey vann dan menm tape pou anviron R100 ekek milyon ankor Mr Speaker.

Be le kestyon, zot pe rann kont bann siporter zot parti kot tou sa bann larzan pe ale? Ki zot pe fer avek sa bann larzan? Eski zot pe zis aranz nennen ek larzan? Ouswa zot pe servi sa larzan pou zot ed zot bann siporter ki dan bezwen Mr Speaker?

Ladan menm Mr Speaker, zot in vol nou sofa

Lasanble zot in donn Rosita tou! En?

(Laughter)

HON WAVEL WOODOCK

Napa de kalite keksoz Mr Speaker ki zot pa pe fer ozordi. E nou, nou bezwen montre Lepep Seselwa ki kalite dimoun, kisisa *United Seychelles*.

Parey mon'n dir Mr Speaker *once* en voler touzour en voler Mr Speaker. Zot pa pou sanze.

E nou, nou pe dir nou pa zanmen kapab les sezans retourn o pouvwar ankor nou dir - *No turning back* - nou pou kit lanmenm, aköz nou pa kapab les sa bann koronpi retourn ankor dan Gouvènmman. Aköz zot pou fer parey Mr Speaker. E zanmen, zanmen Lepep Seselwa pou les en keksoz koumsa arive.

Avek sa 2 mo mon dir ou mersi Mr Speaker.

(APPLAUSE)

MR SPEAKER

Mersi Onorab. Onorab Georges, ou ti'n demann laparol? Ou ti'n lev lanmen anler. Onorab Arissol, *ok*. Onorab Arissol, ou annan laparol.

HON SANDY ARISSOL

Mersi Mr Speaker. Bonn apre midi Mr Speaker. Bonn apre midi bonswar tou bann dimoun ki pe ekoute.

Mr Speaker, mon krwar Mosyon ki devan nou, i en Mosyon enportan ki Lepep seselwa dan lakour pe swiv e Lepep Seselwa pe dir avek nou kot zot pe asize devan zot televizyon, ler nou pou vot lo sa Mosyon zot osi dan lakour zot pou vot lo sa Mosyon ki pe ganny pase apre midi.

Aküz zot pe dir sa? Parske ozordi kot nou touse dan nou pei Parti *US* ti enplik ladan. Tou keksoz i annan pou fer avek lwe en bout later, anmas plis larzan *US* i la.

Selman *US* sa menm parti ki dan nou Lasanble Nasyonal, se zot ki kestyonn an relasyon avek plis larzan dan nou pei.

Letan Onorab Pillay ki ozordi in ganny nominen pou li vin Vis-Prezidan son parti dan sa prosen Eleksyon i vin dan nou Lasanble Nasyonal e konmans akiz tou dimoun sa i montre en depar en defet ki zot vwar devan zot.

(APPLAUSE)

HON SANDY ARISSOL

Zot vwar sa defet pe vini. Parske premyerman ler zot ti fer zot Konvansyon ni ganny kouraz dan zot Lasanble pou zot remersi sa detrwa pti

aktivis, ki ti vini zot pa ti kapab fer.

O kontrer ki zot ti fer? Byen ankoler, byen nerve vin dan Lasanble Nasyonal konmans *challenge* to dimoun.

Selman ozordi zot vire zot pe lager lo Mosyon ki Onorab Henrie in anmennen, zot pe lager lo *motorcade* ki'n fatig zot, ki zot in pas zot letan renar dan tou kwen semen, la ozordi zot koz lo la.

Mr Speaker, Onorab Pillay ki'n ganny prononse Vis-Prezidan e i krwar i pe al *State House*, i ava kontinyen reve pou li al *State House*. I pa pou arive *State House* li, i pou reste an deor Lasanble Nasyonal.

I vini i dir avek nou, nou *motocade* ti fay, in vwar ou pase dan *motocade* konmsi ou konman Mr Speaker Lasanble, ou konman en imen, konman en endividi ou pa devret dan *motocade*.

Selman zot Speaker avan ti lo tou *stage* politik li, i ti dan tou *motorcade* li, i ti dan tou aktivite politik. Zot bliye sa ozordi.

Sa menm Onorab Pillay ki vin dan nou Lasanble Mr Speaker, ki akiz tou dimoun, ki'n pran son letan pandan 4an maltret tou bann profesyonnèl Lasanble ki vin annan dan Lasanble.

Ozordi i vire i koz avek *screen*, i dir Seselwa "ekout mwan." I fer son lavwa ptipti –

"konpran mwan, pei i bezwen sorti anba *LDS*." Dimoun i vwar pre pou li gele.

Mr Speaker, dimoun deor i konpran akòz *SPPF*, Parti Lepep, *US* in vin en minorite dan nou pei. Mosyon pe montre nou.

Prezan ki nou vwar? Sa parti minoriter, ki'n fer en Konvansyon fay. Ki nou vwar dan zot lasal? Nou vwar - mon ava dir ki nou ti vwar, nou ti vwar zot pti zanfan parti ki zot ti kree, pe lev lanmen pe siporte. Nou ti vwar makro sale pe asize, ki nou ti vwar Mr Speaker, nou ti vwar sa msye ki ti tap sa pti garson Pointe Larue ki pa'n ganny nanryen, nou'n vwar tou bann ki'n pran *loan SBFA* ki pa'n rann, zot tou zot dan lasal. Ou konnen akòz zot dan lasal Mr Speaker? Parske zot anvi pouvwar.

Zot pa enterese ek Seselwa zot! Zot anvi pouvwar pou zot retournen pou zot kontinyen fer sa ki zot ti fer 43an pase.

Lepep Seselwa pe al met zot dan bin listwar enn fwa pou tou.

(APPLAUSE)

HON SANDY ARISSOL

Onorab Pillay i vin dan nou Lasanble ou konnen ki i vin dir avek nou Sesel i annan labi pouvwar.

Mon ava dir Onorab Pillay, avek son parti minoriter kwa labi pouvwar ?

Labi pouvwar Mr Speaker, letan zot pa deklar zot *assets* konman bann dimoun responsab, i apel labi pouvwar.

Letan zot refize pey zot *loan* ki zot pran avek labank, i apel labi pouvwar. E zot lo radyo e Lepep Seselwa i tandé, i apel labi pouvwar. Labi pouvwar se letan nou vwar Rosita pe asize dan sez Lasanble i apel labi pouvwar.

Prezan Mr Speaker, sa pti group minoriter ki asiz la anndan, zot ou ava vin donn nou leson dan Lasanble Nasyonal? Zot ki pou dir nou ki nou pou fer dan nou pei.

LDS in ganny en mazorite e nou pou ankor la pou 5an, 10an, 15an zot, zot pe al dan in listwar.

(APPLAUSE)

HON ARISSOL

Mr Speaker, Onorab Pillay i vin dan sa Lasanble Nasyonal ki i dir ek nou? Ozordi nou'n *fail* Lepep Seselwa, nou pa'n akonpli sa ki nou nou'n dir zot. Nou pa'n fer sa ki nou'n dir zot.

Onorab Pillay, i bliye poudir ler nou ti pran pei an 2020, nou ti anba *COVID - 2*an edmi nou'n lager ek *COVID*. E ler nou ti pe lager ek *COVID* sa

pti group minoriter ki asiz la, dirize par Onorab Pillay, ki zot ti fer ? Zot ti refize vin asize pou donn en koudmen.

Zot ti lager kont vaksen pa bon. Pa'n ganny soz *WHO*, apre zot ti al pran deryer rido zot tou. Zot ti dir ek nou pa ouver *Airport* les *Airport* frenmen. Si nou ti'n eksplik zot si nou ti esper zot pei pa ti pou kot i ete ozordi.

Me letan zot, zot ti pe refiz-e fer tousala, zot ti dir ek nou zot pa konsilte deryer rido zot. Zot pa fer nanryen deryer laport zot, aköz zot pa ti enterese pou travay pou Lepep Seselwa.

La sa menm group dimoun i vini i dir ek nou, nou pa'n get Seselwa nou'n get Arab, nou'n get *La Russie*.

Mr Speaker, be letan Bel Ombre mon'n ganny 3 proze lakaz, be bann dimoun ki reste ladan bann *La Russie* ? Bann Arab ki reste ladan?

Letan Seselwa in ganny 17poursan logmantasyon, se annan *La Russie* ki'n ganny logmantasyon, se bann Arab Mr Speaker ?

Letan tou annan *weights* kot *Welfare* in ogmante apre 10an ki pa'n ogmante, lekel ki'n gannyen sa bann benefis, se bann Arab, dalon Onorab Pillay avek bann *La Russie*, dalon Onorab Aglae ki'n gannyen Mr Speaker?

Letan nou get plizyer keksoz ki'n arive dan nou pei. Bann *maintenance*, bann renovasyon, nouvo Por lo La Digue, nouvo Por lo Praslin. tou bann lenfrastriktir, la Praslin fek ganny ankor, be lekel ki pe benefisye sa ? bann *La Russie*, dalon Onorab Pillay, avek bann *Arab* dalon Onorab Aglae Mr Speaker? Me pa Lepep Seselwa ki benefisye.

Sa pti group dimoun ki ozordi in vin en group minoriter dan nou Lasanble zot napa okenn manda pou donn nou pou okenn leson. Zot in vwar poudir defet i anba zot lipye *State House* zot pa pou vwar Mr Speaker, parske partou, partou kot zot in met zot lanmen Lepep Seselwa in vwar, poudir nou ti kapab benefisye avek plizyer milyon Roupi.

Ler zot vini zot anmenn bann *PNQ* ki fize dan 30 minit, eski i fer sans sa ? La ozordi Mosyon Onorab Henrie in ganny *challenge* - en bann Mosyon ki pe gat letan Lasanble, ki pa konnen ki nou pe anmennen, me ler Onorab Pillay pe anmenn bann *PNQ* ki pa fer sans dan Mardi la, ziska 10er edmi i fize Mr Speaker, eski i fer sans? eski pa gat letan Lasanble?

Mr Speaker, Onorab Henrie son Mosyon ki'n anmennen pe fer Lepep Seselwa konnen poudir *US* ki

zot la anndan, ki zot an deor, ki zot pa asosye, ki zot asosye set en group bandi Mr Speaker. En group move dimoun.

E ozordi i annan en gro liv - sa pa mwan ki dir sa. I annan en rapor *TRNUC* ki zot koz lo la tou lazournen, kot Seselwa in dir ki mannyer zot in pase atraver sa parti ki apel *US*, *SPPF*, Lepep. Ki mannyer zot in perdi zot byen. Ki mannyer later in ganny pran. Ki mannyer zot larzan in ganny servi an malapropo. Pa mwan ki'n dir sa. Dan sa gro rapor ki annan Mr Speaker.

E la ozordi Onorab Henrie sa ki'n fer se senpleman in anmenn en Mosyon pou fer Lepep Seselwa konnen.

Zis parey Onorab Georges pe anmenn en Mosyon *Maison du Peuple* ki tou dimoun pe espere laba deor.

Ladan menm zot ava monte zot ava dir" vin pran, vin pran!" Sa i montre larogans an ver parti ki refiz-e demann pardon Seselwa zis parey zot *Leader* in dir "*Put up swa shut up!*"

Sanmenm sa bann group dimoun ki i anvi vin o pouvwar Mr Speaker. Si ou pa dakor ek nou sistenm ou pou ganny vwar dan en rigol anba en pon!

"Si ou pa dakor" Mr Speaker, "ouswa *US* i tro fay

pou ou, tou sa ki ou'n gannye i kapab sap ou!"

Be ki kalite menas sa? E ki ou pe anvoy sa mesaz? Ek sa *first time voter*? Avek sa granmanman ki son pti zanfan in travay, ki Gouvernman LDS in aksepte li dan nou Gouvernman e ozordi in ganny en promosyon? E ozordi in aste en transpor, alors i pa siport US i pou perdi son plas travay? Son *loan* pou tonbe? I pa pou kapab pey son *loan*? Se sa ki zot pe dir Lepep Seselwa?

Ler zot dan Lasanble zot vini zot koz pti lavwa, zot pre pou gele, zot Sef dan zot rankont i maltret tou dimoun Mr Speaker, Lepep Seselwa.

Aprè zot vini zot ava dir ek nou "a zot ki pou mont *State House* kan nou ti donn zot sa posibilite *State House*, ki zot ti fer? Sarye manze koson nwit e zour *State House*. La zot anvi retourn *State House*.

Mr Speaker, Onorab Henrie sa ki'n fer resorti i enportan pou Lepep Seselwa.

Parski pandan tou sa letan. Letan US li NISA pe pey US milyon, milyon, milyon apre zot vin dan nou Lasanble zot dir ek nou,

"Zanfan pe mor lafen."

"Dimoun pli ale i vin pli mizer."

"Nou pa pe pey travayer."

Selman zot, zot konman en parti politik get kantite

milyon zot akimile tou le mwan. Eski zot siporter i konnen.?

Ler zot fer Konvansyon eski zot detay finansman olye zis bann zenn i sante "Ale Patrick, Ale Patrick, Ale Patrick."

Eski zot fer sa?

(Off-Mic)

(Ou ekout radyo ou!)

(APPLAUSE)

HON SANDY ARISSOL

Eski Mr Speaker, zot fer zot kont pou Lepep Seselwa, ek zot bann siporter? Espesyalman zot manm ki siport zot pou konnen kote pe ale tou sa larzan ki zot pe akimile? I en kestyon sa.

Me par kont Mr Speaker zot, zot pe fer sa ki nou Gouvernman pe fer? Nou Gouvernman i kontinyen fer plis lakaz, fer plis semen. Nou kont Gouvernman i kontinyen asi benefis pou tou nou bann dimoun aze. I asire ki nou zanfan i ganny goute, i ganny *breakfast* dan bomaten. Nou Gouvernman i kontinyen fer travay, letan zot, zot pe akimil larises, larises, larises e ankor larises Mr Speaker.

Me pa bliye, letan nou, nou'n vini nou'n vwar en kantite keksoz ki'n pas anba US nou

Ile Soleil, *Welfare* pa konnen lekel ki'n pran. *SIDEX* i annan keksoz *SEYPEC*, *SBFA*, partou Mr Speaker, zot in sey pran, zot in pran zot in pran, e zot in pran.

(*comments off-mic*)

HON SANDY ARISSOL

La ozordi sa Mosyon Onorab Henrie i fatig zot parske i koz lo *United Seychelles* e propriyete.

Alor parey zot larogans parey zot abitye fer," Arr be zis dir li sorti li lo nou propriyete, ale!"

Larogans, larogans e ankor larogans. Sa ki Seselwa i bezwen analize. Nou pou vot pou en parti ki apre 43an in servi son pouvwar pou li akimil larises lo ledò malere, akimil pouvwar, par servi son Lotorite lo ledò Seselwa, e la ozordi nou pe koze zot dan Lopoziyon sel mesaz ki sorti dan zot labous se larogans, larogans larogans. Fer dimoun per, fer dimoun fristre, menas dimoun menase, menase e atak bann profesyonnèl parey zot fer, apre zot vire zot get medya.

"Be ou konnen Lepep Seselwa, nou bezwen analize e sa parti ki la, la nou pa kapab vot pou zot ankor! "

Prezan i annan en lot keksoz enteresan. I annan en

lot Manm li i vini i redres sa ki Onorab Pillay in dir li.

- Non pa sa ki Onorab Pillay ti dir. Ou konnen Onorab Pillay ti dir nou sa. E nou pe krwar pou dir sa tel zafer, tel keksoz."

Dimoun i vwar zot.

Sa *motocade* in fatig zot, zot grense. Nou konpran zot fristrasyon. Nou konpran zot fristrasyon. La Grand Anse Mahe Dimans pa pou bare ankor.

Zot a ronfle, zot a ronfle, zot a ronfle - parey Onorab Pillay pe fer la Mr Speaker, e nou pe *challenge* zot pou zot fer *motocade* en kou dan sid. Aret fer *motocade* dan nor, aret fer *motocade* Sanmdi apre midi ler dimoun i sorti travay. Fer li en zour Dimans e nou ava vwar Onorab Pillay lo en poto elektrik parey tou bann kandida Mr Speaker.

Sel parti ki fay la anndan. Sa garson ki plennyen, sa garson ki plennyen sak fwa nou koze Onorab Pillay Mr Speaker.

E la i pe *disturb* mwan. Selman li ler i koze i dir ek ou, be ou Manm pa kapab dir zot nanryen. La li aköz parol i tro bokou pou li, la prezan i vwar poudir i vwar poudir nou fay.

Mr Speaker, Mr Speaker, mwan mon anvi dir en keksoz kler ozordi *US* pa pou al pli lwen kot i ete. Onorab Pillay,

in fer en prediksyon poudir kekfwa nou ava antre 10 nou konnen lekel ki'n dir li sa prediksyon 10.

Onorab Georges in partaz sa lenformasyon 10 avek mwan lekel zot avoka ki'n fer sa prediksyon 10. En, en-en.

Mr Speaker, sel parti ki pa pou rantre ek nanryen se laba lot kote. Lot kote ki pa pou rantre ek nanryen. Parske Seselwa in vwar zot dan kler.

E Seselwa - sa ki ti enteresan dan zot Konvansyon zot ti bezwen fors en pe dimoun anndan "en al debout deor get lot *big screen*, donn lenpresyon deor i annan dimoun. Fer krwar i plen. Fer krwar i plen. Fer krwar i plen.

(Comments off-mic)

HON SANDY ARISSOL

Mr Speaker, nou ler nou ti anndan dan koridor ek dan semen pa kapab gete. Alor douler lo zot Mr Speaker parey labitid.

E mwan mon krwar Mosyon Onorab Henrie i enportan pou nou Gouvernman prezan gete. E parey Onorab Woodcock in mansyonnen plizyer lezot landrwa ankor kot *US* nou pe fer biznes avek zot, e ozordi dimoun pe demande.

Mon vwar triko Patrick pe vann Pointe Larue anpandan dan en *hanger*. Lontan zot ti gannyen triko, parasol, lot, *keyring* lot. Nou pa vwar nanryen pou le moman la.

Bann la pe demande be tou sa bann larzan la ki zot in anmase, omwen, omwen fer en pe triko, en pe parasol pou nou, aret vann. *Ok?* Sekreter Zeneral parti fer en pti let anvoy laba kot zot gran frer. Ed nou ek en pe keksoz.

Non, Mr Speaker, zot pe akimil larises, aköz zot konnen zot pe al perdi Eleksyon. Apre sa larzan i ava ganny partaze antre zot, e sa pti siporter sa pti siporter li i pa pou ganny nanryen li, i pa pou ganny nanryen.

Me zot bann ki ansarz zot ava kontinyen gannyen, ranpli fer plen voyaze, la zot vini zot akiz mon Prezidan i monte desann, i ale *Dubai*.

Be zot Sef la kot i ete? Semenn pase kote i ti ete? Zot pa koz lo la sa. I ti *Dubai* li osi Mr Speaker. Sa zot pa koz lo la sa.

Selman zot reste trankil, zot *challenge* sa ki pou mwan, zot rode kot i ale.

Mon Sef, Prezidan ler i bouze, i annan en Bidze ki tonm anba son lofis ki nou, nou ti vote pou li lo sa kote latab. Pou permet li fer son travay pou pei.

Mon tann zot pe lager *allowance* ledan, *allowance* linet, lontan i la sa bann *allowance*, pa fek evante sa.

Selman zot, zot pe lager enkli Onorab Pillay pou li vin Vis-Prezidan, aköz pou li ganny *allowance* ledan, pou li ganny *allowance* linet,

(comments and laughter)

HON SANDY ARISSOL

...pou li ganny *allowance* tanbour, pou li ganny *allowance* lot. I pe lager pou Vis-Prezidan pou li ganny tou sa *allowance*. Selman toulezour i konplent sa menm *allowance*.

Me sa ki nou'n bliye fer bomaten, bomaten nou'n bliye fer se demann VP ler i ale kit lakle la lo latäb, en fason 5er sekirite ti äva donn li pou li al ävek.

Nou, nou ävi zis dir ävek Rosita rann nou, nou sofa silvouple. Rann nou, nou sofa, *ok?* pa pran nou sofa pou li Mr Speaker.

Mosyon Onorab Gervais Henrie, i dir pou Lepep Seselwa ki pe ekout nou laba deor,

Lasanble i demann *Board* ävek Zesyon Lazans Nasyonal pour Servis Lenformasyon NISA pou äret fer biznes ävek Parti *United Seychelles* an relasyon ävek

propriyete kot zot *print house* i sitye.

Mr Speaker, Mosyon in lo *Order Paper* en pe letan. Mosyon i lo bon semen. Nou lo sa kote latäb nou pou vote e an menm tan nou pe dir ek Rosita rann nou, nou sofa! Mersi bokou Mr Speaker.

(APPLAUSE)

MR SPEAKER

Bon, *ok* bann Manm ki'n koze ziska konmela, ti bann ki'n lev lanmen depi lo konmansman premye *round* deba.

Napa bokou Manm ki'n al long. Me selman ävi letan mon pou met limit 15 minit. Mon krwar i äva sifizan pou koz lo sa topik.

Si i annan keksoz ki pou ganny dir lo sa topik, bon 15 minit limit. Mon donn Onorab Loze laparol.

HON JOHAN LOZE

Mersi Mr Speaker. Parey labitid Lepep Seselwa dan son i äva note sak fwa Loze i koze zot enpoz limit letan lo son koze. Sesel antye pou konnen sa.

Mr Speaker, mon demann en leskiz Lepep Seselwa ki sa komedi ki fek deroule e Sesel antye mon krwar i kapab vwar poudir *LDS*.

(Mr Speaker, Onorab Doyace Porice i konmanse en?)

Sesel antye i ava vwar poudir zot pa serye avek sa Mosyon e ki Onorab Arissol in mank son vokasyon, mon felisit li i ti devret en *stand-up comedian* e mon regrete pou bann viktim *TRNUC* ki'n ganny dekrir konman sa gro liv.

Me, me vi ki sa size *TRNUC* in leve mon'n ganny sans donn mon pozisyon mon parti. Pou annan en negosyasyon. Gard lespwar i pou annan en negosyasyon avek zot ki pou anmenn sa sityasyon a son lafen.

I pou annan respe anver zot, i pou annan en tretman. (Mr Speaker, Onorab Doyace Porice pe donn son bal laba)

I pou annan en bon fason fer an ver zot ki a leka ozordi.

Mon krwar letan nou pe koz sa gro liv *TRNUC* la, nou devret konmans par annan respe pou sa bann dimoun. Annan en negosyasyon avek zot. Si nou anvi donn zot en zour solannel en zour *fallen heroes*, en zournen memoryal pou zot koz avek zot, negosye avek zot.

Si sa bann dimoun ti anvi swazir lanniverser Mr Hoareau, zot ti ava swazir lanniverser Mr Hoareau. Si zot ti anvi swazir zour lanmor Mr Hoareau, zot ti ava'n swazir zour lanmor Mr Hoareau.

Pa ti bezwen fors zot zour Lendepandans. Sa i zour Lendepandans.

Si ou asize ou koz ek zot, ou montre zot respe ou annan en negosyasyon avek zot, ou anmenn sa dosye a son lafen dan plas servi li konman zot seval batay politik aköz zot in fay zot ava vwar disparisyon, zot in fini mor. 2020 zot ti fer *motocade* avek 2 mil loto, 2025 zot fer *motocade* ek 225 loto.

Zot pa bezwen kontinyen abiz bann viktim *TRNUC*, ni dan Lasanble, ni an deor Lasanble.

Dosye i avek zot Prezidan, zis dir li mat li, travay lo la, anmenn sa dosye a son lafen.

La en Mosyon pou zot anmenn. Dir zot Prezidan mat li anmenn sa dosye *TRNUC* a son la fen.

Mr Speaker, zot dir Mosyon i lo later *United Seychelles* tan byen ki mal, mon pou montre zot aköz nou pei i parey i ete ozordi.

Zot sit nou konbyen *United Seychelles* i lease en later vid apre zot dir nou, konbyen nou pe lwe sa later avek *NISA*. Zot in fer parey pou *STC*. Zot dir nou konbyen nou pe lwe avek *NISA* e zot deklar tousala profi. Zot konpar later vid pou later vid, kan lo sa later ki pe lwe avek *NISA* i annan en batiman 375 met kare *ground floor*, avek 400 met kare vid *paved parking* ki'n ganny fer par *United Seychelles*

Nou pe lwe batiman, *parking*, later se sa rezon ki ou vwar zot dan sa sityasyon kot zot été ozordi si tou zot konte la, i koumsa parey zot pe konte.

Mr Speaker, vi ki nou later NISA Mosyon i lo NISA, mon annan en let dan mon lanmen la - taler nou pe koz lo let ki Wallace Cosgrow in ekri NISA - mon annan en let dan mon lanmen la date le 2 Zen 2025, be annou koz en kou lo let ki'n ganny adrese le 2 Zen 2025 Wallace Cosgrow,

"Dear Mr Cosgrow request for permission to make moditification to lease the premises."

Nou le 9 Zilyet ozordi. Let date le 2 Zen.

"I am writing to formally request your permission to make certain modifications to the lease permits V8543 located the National Information Services Agency NISA currently occupies under the terms of our lease agreement dated August 1st 2014.

Nou korek la Mr Speaker, let en? Mon pe lir let la.

"Specifically, NISA would like to make the following additions and improvements to the existing structure."

(1) *Constructing internal office partition.*

(2) *Installing additional electrical outlets and lightening.*

(3) *Constructing additional toilets and a kitchen.*

Mr Speaker, let mon pe lir la en, date le 2 Zen 2025.

Ozordi nou le 9 Zilyet 2025. *"These improvements are intended to enhance the functionality of the space and support our business operations more effectively.*

I assure you that all work will be carried out in accordance with local regulations by licensed professionals.

I also confirm that all modifications will be made at NISA's expends.

I would appreciate if you would confirm your consent in writing and please let me know if you require any additional information or documentation to facilitate your approval. "

I ankor let menm ki mon pe lir la en. Let date le 2 Zen 2025 ozordi nou le 9 Zilyet 2025.

"Thank you for your attention to this matter I look forward to favorable response."

Let le 2 Zen 2025. Ozordi le 9 Zilyet 2025 zot travers la anndan devan nou avek en bal konfizyon lo zot latet.

Be konmsi zot pa pe akorde zot? Zot Gouvernman

pe demande ki zot ganny permisyon pou ofer *extensions* sepa kwa sepa ki lot ankor dan nou batiman. En batiman ki nou pe *lease* pa en bout later vid, parey zot, zot pe sey fer Seselwa krwar aköz zot lalang, en batiman avek later avek *carpark*.

Be klerman zot pa pe konekte zot antre zot. Gouvernman la i ganny *run* par zot Prezidan li. Zot kapab senpleman dir li enform son Vis-Prezidan ki i ansarz *NISA* dir *NISA* sorti.

Be *NISA* osi pa ni bezwen pey nou si i pa le li, ale li! Sorti ale pa ni pey nou ale, foutemalkan! Ki zot pe fer la?

Mr Speaker ou vwar sa let la. Mon pou dir ou en sekre ozordi, monn ganny lir onnetman ofisyelman.

Mon dir ou sa aköz mon la mon pa'n bezwen al kas maryaz okenn zofisye Gouvernman dan okenn Departman Gouvernman pou mwan ganny lenformasyon pou vin soumet devan Lasanble apre pa deklar mon lentere *comme* kwa mon'n al *corrupt* en zofisye Gouvernman *to the point* mon'n kas son maryaz.

Mon pa'n bezwen al dan okenn sityasyon kot mon vwayaze monte desann avek en zofisye Gouvernman lo fre Gouvernman, apre deklar

lager anba *Airport* kot msye marye in vini in le klake.

Apre travers ek lenformasyon ki mon'n gannyen ek sa menm zofisye Gouvernman ki mwan mon annan en relasyon avek, pou vin tal dan Lasanble "ar yen yen yen yon yon yon. Konmsi zot pli onnet.

Pe kas maryaz dimoun zis pou zot *spy* lo *United Seychelles*, pou ganny en pti lenformasyon?

Be mwan mon pa'n bezwen al fer tousala. Mon pa'n bezwen al kas maryaz per...sonn pou mwan ganny lenformasyon. Mon'n ganny li onnet.

Mr Speaker, lot pwen mon oule koz lo la. Mosyon i lo *Sun Press*.

Mr Speaker, *Sun Press* i annan Kontra ek *NISA*. Be *Express Printing* li i kit tou departman Gouvernman ozordi pe *print* kot li pou ki *Express Printing*?

Lekel ki annan lentere dan *Express Printing*? Ki ozordi tou Departman Minister pe ganny laba pou al *print*. E mon krwar zot annan rezon, ler zot dir *FPAC* i bezwen fouye al gete.

Mwan mon krwar ozordi *FPAC* i bezwen al fouye, al gete tou sa bann Kontra ant bann departman Gouvernman ek *Express Printing*.

Be nou pa kapab annan Gouvernman ki pe nourri, anrisi fer gra politisyen, e la i pa ni menm parti politik, la i politisyen. 3 zot Mr Speaker? 3 mousketer pe gra lo larzan Gouvernman. Sa konmsi zot pe ganny gave. Larzan pe ganny forse dan zot lagorz pou antre.

So alors i pa zis *Sun Press* li i *Express Printing* tou. Ok, mon note Mr Speaker.

Mr Speaker, letan nou vini nou dir koumsa poudir en *lease* i en kontribisyon. Tousala la i bann keksoz ki montre nou aköz zot parey zot ete ozordi. Kan mannyer, nou pe *lease* en propriyete avek en lazans, Onorab Henrie i vini i dir nou sa i en kontribisyon.

Mr Speaker, en kontribisyon i sa ki zot gannyen ek Friedrich Naumann, sepa si zot pa'n gannyen mon pa konnen mwan. li ki ti dir zot in gannyen ek ek Friedrich Naumann apre in bezwen amann Lalwa pou kasyet son pese.

Mr Speaker, en donasyon, en kontribisyon i en keksoz ki ou gannyen san lekspektasyon okenn lesanz.

En *lease* mon donn ou litalizasyon mon *popoyote ou pey mon retour pou mon *popoyote. Setou.

Be kan mannyer sa de keksoz i parey? Zot ki'n al

pran donasyon avek Friedrich Naumann ti dir la dan sez Mr Speaker, ou pa ti la mon konnen ou dir ou pa konnen si ti ganny dir. Ti ganny dir la dan sez.

Prezan i ava vin dir nou si nou annord avek SRC - si nou annord avek FIU, si nou annord avek sepa ki lot.

Be zot ki pa annord. Zot pe kas maryaz sa bann dimoun. Zot ki pe *foutre la merde* dan relasyon sa bann dimoun pe fer divorce, pa nou. Met en lord ek zot lekor. Aret vwayaze lo leren Lepep Seselwa, lo larzan Gouvernman pou zot al fer *honeymoon* aletranze, msye marye i oule bat zot anba *Airport*.

Se sa, sa bann sityasyon ki nou bezwen gete konnen e konpran ozordi Lepep Seselwa.

E mon konnen zot pa kontan mwan aköz mon dir zot bann keksoz ki zot pa oule, e zot pa anvi tande.

Mr Speaker, sa zistwar larzan palto la, *issue* avek sa i pa ki i ganny donner, ouswa pa ganny donner.

Me annou aret koz lalang poudir ti la depi avan. Swa zot dan Lasanble zot lalang, ler zot dir ti la depi avan, ouswa Minis Derjaques ti koz lalang 2021 letan i ti dir nou sa ki nouvo, sa ki fek entrodwir, sa ki'n ogmante.

Be zot defayans moral kot i vini zot? Zot koz nou COVID ti annan COVID, be ti 2021 zot ti fek rantre 2020, se pa si zot ti'n fer 9 mwan ler zot ti'n deside angresi zot lekor avek sa bann gro *allowance*.

Ti 2021 ler tou dimoun ti pe soufer. Zot bliye ki zot ti pe fer 2021 zot? Zot zwe bliye. Lanmenm ler zot vini zot dir nou, granmersi nou Prezidan in donn *breakfast* lekol. Be ler zot ti tir goute, avan zot ti donn *breakfast* zot ti tir goute, zot ti tire ti eliminen ti aret donner, pandan plizyer mwan zanf an pa'n gannyen.

Tou dimoun ki pa'n ganny lasistans sosyal. Tou sa dimoun 2021 ki pa ti ganny asiste. Tou sa *allowance* lo travayer Gouvernman ki zot in tire.

Trezyenm mwan ki Kreol i martirize. Ozordi travayer bezwen dray dan *cone* pas tes pou li ganny son Trezyenm Mwan.

Lekel isi anndan la ki dray dan *cone*? Lekel isi ki pas tes pou ganny son trezyenm mwan? Personn, napa ni enn nou ki bezwen pas tes pou nou ganny nou trezyenm mwan.

Arete sa bann kalite zafer si zot ti anvi, lontan mon pe dir zot, si zot ti anvi met en *performance base allowance* met en *performance base allowance*. Pa devret annan

nanryen pou foute ek trezyenm mwan personn dan Gouvernman sa.

Sa ki voler, sa ki triker, sa ki koronpi. Parske letan zot ti pe martiriz sa pep ki apel Kreol an 2021, lanmenm ler ki zot in antre zot in donn zot lekor logmantasyon ledan, palto, lipye, latet, zorey - depi bren seve ziska pous lipye zot in angresi zot lekor.

Prezan ozordi - la enn laba i annan 4 fosdan mon krwar. Prezan ozordi zot ava vin dir nou arr ti deza la. Ti lanmenm. An plis kit li lanmenm. Apre tou sa matir ki zot in fer sa pep?

Mr Speaker, si in annan en group dimoun ki'n debout a kote sa pep ki'n sanpyonn son lentere, ki'n lager pou li depi 2021 ziske la se sa group dimoun ki la.

(APPLAUSE)

HON JOHAN LOZE

Kot in konsern benefis sa pep nou'n toulta la.

Mr Speaker, ou ava rapel ou menm. Kot ou ti dir nou, non pa koz lo la ase, koup nou mikro. Ou ava rapel ou menm Mr Speaker. Ou tande Mr Speaker, pe dir zot in vole larzan vye tantin. Li menm ki'n vole.

MR SPEAKER

Terminen Onorab.

HON JOHAN LOZE

Mersi Mr Speaker. Mr Speaker, selman ou ava agree, i en pe ofansiv pou en dimoun ki'n vol larzan vye tantin ozordi maltret nou vole.

Mr Speaker...

(comments off-mic)

HON JOHAN LOZE

...tande, anba bal zonnyon mon ti vin dan ou lofis mon'n lev sa size avek ou.

MR SPEAKER

Onorab, wi, wi, wi. Me selman mon konpran ki i annan en mon pa konnen ki mannyer mon pou apel li.

En keksoz tre personnel sa ki Onorab Porice pe dir e mon envit li pou evite.

Onorab 15 minit silvouple. Terminen.

HON JOHAN LOZE

Mersi Mr Speaker. Mr Speaker, mwan mon oule fer kler avek Nasyon Seselwa, in annan en group dimoun ki'n defann son lentere depi 2020 ziska ozordi.

E Seselwa i konnen, i konnen i konpran i kler pou zot. Sa group sez vid laba lot kote avek zot leren mou ki parey min bwi pa menm annan kouraz, lev lanmen pou defann Lepep Seselwa. Zot pa'n zanmen prosed

lonnekte pou koz pou sa pep. Zot pa'n zanmen kapab debout dan lentere sa pep ki'n met zot la.

Ozordi zot dir nou NISA pa devret pe fer biznes ek Parti Lepep nou dir zot wi, dakor. NISA i devret sorti depi yer. Yer sorti, yer ale, sorti NISA ale! Mont *State House* kot sa msye i ava donn ou en landrwa avek fer biznes avek nou ki en parti politik, nou agree avek lespri e lesansyel Mosyon.

Sa Mosyon kot zot in maltret nou voler, zot in dir nou kriminel, zot in dir nou tou sa ki zot ti annan pou dir mon napa problem avek Mr Speaker.

Selman sa ki zot pe apel voler la, nou ki'n debout a kote sa pep, pa sa bann bwi ki laba dan sa ta sev vid! Mersi Mr Speaker.

MR SPEAKER

Mersi Onorab. mersi. Bon Onorab Loizeau 15 minit.

HON NORBERT LOIZEAU

Mersi Mr Speaker. Bonzour Mr Speaker i annan en gro barik vid pe ronfle laba ou tandé.

MR SPEAKER

Ok, Onorab.

HON NORBERT LOIZEAU

Mr Speaker, mon pa ankor koze mon tann ouur ...

(laughter)

MR SPEAKER

Onorab, arete. *Look*, mon krwar mon krwar Manm nepli annan nanryen poudir lo sa Mosyon. Mon pa pe tann nanryen nouvo. Mon pa pe vwar nanryen ki koz lo sa Mosyon.

Mon ava envit bann Manm silvouple zis dir sa ki zot annan pou dir. Sey reste lo Mosyon si zot kapab. Me selman annou evit lensilt personnel.

Onorab Loizeau ale demare.

HON NORBERT LOIZEAU

Mersi Mr Speaker. Mr Speaker, pou konmanse mon anvi met lo en keksoz lo rikord.

Mon anvi fer Lepep Seselwa deor taler ti annan en Mosyon, ti annan en parol ki Onorab Pillay in dir lo mwan *in regards to* Onorab Larue permet mon Mr Speaker.

Mon anvi dir avek tou dimoun deor se sa bann dimoun lo sa kote latib ki'n toultan maltret Onorab Larue.

(comments off-mic)

HON NORBERT LOIZEAU

Sa bann letan ler zot ti pe maltret Onorab Larue, mwan mon ti en dimoun ki ti konsol

Onorab Larue dan sa bann moman ki zot ti pe maltret li. Li avek Onorab Loze Mr Speaker.

Mr Speaker, permet mwan mersi pou donn mon en sans pou mon koz lo sa Mosyon.

(comments off-mic)

HON NORBERT LOIZEAU

Mr Speaker, Mr Speaker, ou trouve. Mr Speaker,

(comments off-mic)

MR SPEAKER

Arete silvouple.

HON NORBERT LOIZEAU

...sa Mosyon.

(comments off-mic)

MR SPEAKER

Arete!

HON NORBERT LOIZEAU

Sa Mosyon i enportan Mr Speaker, aköz i montre nou ki mannyer in telman annan labi - in telman annan labi Mr Speaker, anba Gouvernman US.

Mr Speaker, permet mon konmans koumsa; eski i ok pou en group dimoun vol lakaz antre ladan pran tou keksoz vann lwe e menm avek ou menm konman ki ti propriyeter sa landrwa?

Mr Speaker, non sa i mal. Mr Speaker, mon ava eksplike aköz nou konmans koumsa.

An 1977 parti *SPUP*, *SPPF* ki ozordi *US* i vol nou pei atraver koudeta. Zot ti pran tou sa ki zot ti kapab e zot ti met lo zot non zot parti konman zot byen.

Mr Speaker, sa bann letan zot ti abiz pouvwar pou zot vol tou *asset* Lepep Seselwa.

Mr Speaker, menm ki zot ti dan Gouvènmman zot ti lwe sa landrwa avek Gouvènmman Gouvènmman ti pe fer biznes avek Gouvènmman Mr Speaker. Sa bann letan ki zot, zot ti o pouvwar.

E tou sa bann larzan ki zot ti ranmase, ziska la ti rantre dan kont sa parti politik, ki ozordi pe aspire pou retourn o pouvwar, pou zot kontinyen parey zot ti pe fer avan.

Me nou dan *LDS* nou dir sa pou kapab kontinyen! *No turning back* Mr Speaker! Nou pa pou kapab retourn deryer.

Se sa rezon ki Onorab Henrie ozordi in vin avek sa Mosyon, ki pou ganny sipor mazorite nou ozordi, aköz nou en parti Mr Speaker ki onnet.

Nou pa krwar ki Gouvènmman i devret soutir okenn parti politik dan en tel fason. E nou pa anvi ki okenn Gouvènmman ki ava vini dan

lefitir ki i ava kontinyen fer parey.

Mr Speaker, pandan bokou lannen Gouvènmman pe pey en parti politik pou ki *NISA* i kapab *operate* dan sa landrwa.

Pa ti pou byen Mr Speaker, ki *NISA* ti ava ganny son prop landrwa pou zot menm pou zot kapab *operate*? Wi, ti pou byen.

Ozordi *US* pe koz lo byennet travayer Mr Speaker. Selman larzan ki ti kapab al an ver bann travayer kot *NISA*, pe al dan kont *United Seychelles*.

Zot pe koz lo byennet travayer Seselwa Mr Speaker, pandan tou sa letan zot in byen pase atraver lwe bann landrwa ki zot pa'n aste, ki zot in zis pran aköz sa bann letan zot ti dominer. Mr Speaker, aköz zot pa rann sa landrwa vi ki zot dir ki zot zot en nouvo parti? Zot pa ti sa bann ki ti la 43an Mr Speaker. Aköz zot pa rann sa bann landrwa?

Sa zafer ki dan Bidze *NISA* i ava ganny plis larzan pou zot loperasyon, pou zot fer zot loperasyon pli byen.

Mr Speaker, ozordi nou pe lager pou *NISA*. Zot pou rapel ki mannyer *US* ti *rip-off* *STC* - zot byen rapel.

Selman ozordi nou tann en Onorab dir nou'n fer ditor sa pep pandan 4an edmi Mr Speaker. Ki ditor nou'n fer sa

pep ? Ler nou ti pran pei nou ti zenou. Nou'n travay dir parey Onorab Arissol in dir. Nou'n ouver nou *Airport*, nou'n donn vaksen, ki Onorab Pillay ti al pran deryer rido.

Mr Speaker, nou'n fer tousala e ozordi nou'n fer ki tou Seselwa ki travay dan sekter piblik i kapab ganny en lapey.

Solman nou'n ganny dir ki nou'n fer ditor sa pep, kan le 29 Zen nou'n onor nou bann *fallen heroes* Mr Speaker. Lekel ki ti fer ditor sa bann dimoun Mr Speaker?

Parey Hoffman, Sony Elizabeth, Simon Desnousse lekel ki ti fer zot ditor Mr Speaker.

Mr Speaker, tou sa zot in fer ditor, be tou sa bann *fallen heroes* ti ganny afekte anba sistenm ki Onorab Pillay pe siporte ozordi. Ozordi Mr Speaker, i dir ki li i *Fearless in dignity* - menm logo, menm parol ki Prezidan Rene ti servi dan tou sa bann letan ki'n o pouvwar selman zot nouvo.

Mr Speaker, ozordi zot dir zot pa ti la 43an. Mr Speaker, zot pa ti la 43an zot nouvo US, be rann tou sa ki zot predeser in pran. Rann aköz pa pou zot sa, zot pa sipoze laba. Zot dir sa en vye loulou. En vye loulou ki'n mor ki'n antere. Be ki zot pe rode avek sa vye loulou Mr Speaker?

Bel Air Mr Speaker? I pe nonm mon Bel Air, Bel Air dir ou kandida Bel Air 2 mil zanmen i pou ganny eleksyon.

Kontinyen tir portre avek bann bin salte ki'n plen, apre poste lo *facebook*.

(APPLAUSE)

(laughter)

HON NORBERT LOIZEAU

Mr Speaker, salte i reste dan bin, si ou vwar en bin salte i plen bann *truck* i ava vin tire. Be ou ou pa sa *pick up* salte pou ou tire pou ou met partou lo *facebook*.

Mr Speaker, dir li kontinyen rod tou bann vye miray ki pe *crack* pou li met lo *facebook*.

Mr Speaker, ler mon pe dir rann sa bann keksoz ozordi bann La Rivière Anglaise pe rod en landrwa pou zot. Onorab Labonte pa la pou dir mon ava dir dan son plas.

Zot in vann sa landrwa ki bann zenn ti rezouir zot lekor ladan.

Zot in vann partou Beau Vallon. Sepa konbyen milyon Roupie Mr Speaker.

Ler lazenes La Rivière Anglaise pe rod en landrwa, Mont Fleuri partou. Selman ki zot pe dir avek lazenes Mr Speaker, siport zot. Ki mannyer lazenes i siport zot, zot in negliz lazenes. Zot in

pran keksoz ki lazenes ti pe servi zot in vann pou milyon.

E en kestyon mon demande Mr Speaker, oli sa bann larzan ki zot in vann tou sa bann keksoz. Mon pe demann sa aköz bann travayer *Maison Du Peuple* ki'n ganny zis lanmwatye zot trezyenm mwan saler i ankoler Mr Speaker.

Zot ankoler zot ti anvi zot 100poursan, zot pa'n gannyen e zot, zot pe marse dan *first class* Mr Speaker. *First class* al partou. Ler zot ler i annan rali Praslin zot monte zot reste *Raffle*. Bann aktivis *US* zot mont dan *Cat Cocos* zot ganny de labyer, de labyer avek en *burger*, zot, zot al manz lotel. Mr Speaker, bann siporter *US* pe rode kot sa larzan i ete.

Mr Speaker, an terminan mon anvi dir ki mon pou siport sa Mosyon aköz tou sa bann letan *US*, *SPUP*, *SPPF*, *US* in abiz pouvwar pou zot vol tou *asset* Lepep Seselwa.

E ozordi Onorab Pillay li i pe rezouir sa, i pe koz mwan si sa menn tou.

Wi, sanmenm tou Onorab Pillay. Mon annan ankor 5an ankor pou mwan vin koze.

Aküz mwan Mr Speaker, Mr Speaker, ozordi en boug parey Onorab Pillay ki zanmen in debout lo en poto elektrik, menm pou debout kont

Onorab Esparon ki la in per, ozordi i pe koz mwan.

(APPLAUSE)

HON NORBERT LOIZEAU

Met ou lekor lo en poto, apre ou ava koz mwan. Pa fer parey en gro barik vid zis ronfle Mr Speaker.

Mr Speaker, an terminan mon anvi dir ek Onorab Henrie, nou pou siport sa Mosyon. Mwan mon pou siport sa Mosyon.

Kantmenm zot pe ronfle laba les li. Kontinyen ronfle. Aköz i annan en gro en vye proverb Sinwan Mr Speaker, ki dir en vye proverb Sinwan - pa en proverb Afriken, ki dir ler ou pas o bor en komen trou ou tann ronfle ladan, konnen i annan bann mous ver Mr Speaker.

E la ozordi Onorab Uranie i pe sey atak mwan li menm li ki'n fer petisyon, petisyon kont lopital. Fer petisyon kont soz lapolis.

Selman apre ler al vizit lopital, i kasyet deryer pe antre pou portre tou *selfie* li ki pe fer li ki pe montre.

(APPLAUSE)

HON NORBERT LOIZEAU

In fer petisyon pou lekol La Digue. Ozordi i pe ronfle. Ou merit ontel!

Ozordi ou konnen ki i dir Mr Speaker?

MR SPEAKER

Ou ti pe konklir.

HON NORBERT LOIZEAU

Bann dimoun La Digue bann dimoun La Digue i mizer. Kan manner ou kapab dir dimoun La Digue i mizer?

(comments off-mic)

HON NORBERT LOIZEAU

Mr Speaker, ozordi i dir dimoun La Digue i mizer, selman napa touris La Digue, selman tou lans i plen!

(laughter)

HON NORBERT LOIZEAU

Bro, gete ki ou dir avan ou vin atak mwan, konnen ki ou dir.

Ozordi Mr Speaker, gete lekel ki pe servi sa lopital pou fer dyaliz, dimoun La Digue i apresye.

Mr Speaker, mon anvi dir ek Onorab Henrie, mon pou siport son Mosyon aköz sa parti ki Onorab Pillay ki i dir ki li in ganny pozisyon *Leader* Lopoziyon, aköz i ti dir li i pli *pretty* ki Onorab Simon Gill, alors se li ki vin la. Li i *pretty boy*, i sipoze vin la.

(laughter)

HON NORBERT LOIZEAU

Akoz sa parti ki li i siporte Mr Speaker, zot in vol tou nou *asset*. Zot in vol tou nou *asset* e vann e ranpli zot pos Mr Speaker. Mersi bokou.

(APPLAUSE)

(comments off-mic)

MR SPEAKER

Napa Mosyon pou *closure of debate*. Onorab Hoareau ou annan laparol.

HON JOHN HOAREAU

Mersi Mr Speaker. Bonn apre midi Mr Speaker, bonn apre midi tou dimoun ki pe ekoute.

Mr Speaker, si dan lentervansyon Onorab Sebastien Pillay in koz en bout laverite se ki in dir ki, “Wi, nou koronpi!”

(APPLAUSE)

HON JOHN HOAREAU

Mr Speaker, Mr Speaker, atraver ou in menm demande nou bann Minis in *travel* in *travel* avek galan ensidswit. Me mwan mon anvi demann li an Desanm ler Dokter ti *travel* pou al Langleter e i ti depans 10 mil Dolar Ameriken dan en pou en tiket *first class* eki i ti *travel*?

Mr Speaker, eski sa bann dimoun ki vin siport zot laba dan *United Square* eski sa

bann dimoun in *travel first class* parey Dokter?

Mr Speaker, mon ti a kontan osi demann li akòz in akize ki nou Minis in tap sepa in tap en zofisye Lapolis ek loto.

Eski i rapel byen ler Minis Dolore Ernesta ti touy en dimoun Pointe Larue ? Eski sa fanmir ti ganny zistis pou lanmor sa ?

Eski sa fanmir ti ganny zistis pou lanmor zot garson ?

(Interruptions)

MR SPEAKER

Onorab, en moman. En moman.

(Interruptions)

MR SPEAKER

Order! Order, silvouple. Bann Onorab, sa deba pe vin enposib. Napa nanryen ki pe ganny dir lo Mosyon. Napa nanryen person ki pe adres size ki devan zot, e nou pe tann menm keksoz lo tou le de kote fwa apre fwa.

Nou'n ariv 5er edmi pre. Eski nou kapab retourn lo Mosyon si zot annan keksoz ? Oubyen si napa nanryen pou dir eski zot kapab zis larg zot drwa pou entervenir lo mosyon e permet nou terminen ?

Mon met sa la silvouple, konsidere. Nou pe al nou pe

met Lasanble an dezord e nou pe...

(Interruptions)

MR SPEAKER

Order, Onorab Pillay, mon pe koze. *Order! Ok,* mon'n fer lapel monn fer lapel Manm i annan drwa koze, mon pe demann zot silvouple reponn lo mon lapel. Mersi.

HON JOHN HOAREAU

Mersi Mr Speaker mon kapab kontinyen?

Mr Speaker...

(comments off-mic)

MR SPEAKER

Order!

HON JOHN HOAREAU

Ler nou gete nou vwar poudir...

(comments off-mic)

MR SPEAKER

Order! Order! Onorab Pillay, aret kriye. *Ok,* mersi.

(comments off-mic)

MR SPEAKER

Ale, Arete, arete!

(Interruptions)

MR SPEAKER

Order! Bon, aret kriye. Mon pou konmans met Manm deor zis pou mwan - zis pou mwan ganny en deba ki fini en pe annord. Onorab Hoareau, silvouple.

HON JOHN HOAREAU

Mersi Mr Speaker, mon kapab *proceed*? Mr Speaker, nou konnen atraver lenformasyon ki nou'n ganny avek loter Mosyon ki *Sun Press Printing Limited* en lakonpannyen *US* ki'n anmas plis ki 22 milyon 900 mil 915 mil pandan 30an ki in lwe sa propriyete avek *NISA*.

Mr Speaker, ler ou gete dan 30an sa larzan ti kapab ganny servi pou fer plis ki 40 *unit* lakaz. Ler ou gete pandan 30an sa larzan ti'n kapab ganny servi pou donn trezyenm mwan saler pou en tyer nou *public service*; ler ou gete sa larzan ti'n kapab ganny servi pou donn logmantasyon mon bann travayer dan *public service* pou plis ki 2 mwan.

Ler ou gete sa larzan ti kapab ganny servi konan pou pey *long term service* pou plis ki 1an.

Ler ou gete a larzan ti kapab ganny servi pou pey *Welfare* pou plis ki 3 a 4 mwan pou bann dimoun ki lo lalis *Welfare*.

Mr Speaker, mon konsider sa Mosyon konman

en Mosyon patriyotik; en Mosyon ki si *Leader* Lopoziyon ti serye, i ti ava anmenn en *PNQ* pou demande aköz ki Gouvernman pa vwar sa konman en konfli lentere ant son parti avek sa ki pe lwe sa landrwa.

E sa la nou ti ava vwar poudir vreman wi i en konfli lentere ant son parti avek sa ki pe lwe sa landrwa. Aköz en konfli lentere i kapab koze ler ou annan en serten *grip* or ou annan en serten *hold* lo atraver sa finansman ki ou pe peye pou lokasyon sa landrwa e pou ou lendepondans konman en *free press*.

Mr Speaker, diferans ant nou avek zot, se ki nou, nou pa koronpi, zot, zot koronpi parey zot in admet.

Nou, nou lanmen i prop. Nou napa okenn ka kot *ACCS* an se ki konsern koripsyon.

Nou responsabiliz dimoun e ed zot pou konpran nesosite pou zot travay e vin bann sitwayen onnet dan sosyete ki ed zot fanmir, ki fer grandir ki fer epanouir zot fanmir.

Mr Speaker, zot zot pas zot letan is bat latet dimoun e fer Seselwa krwar poudir zot pli mal ki avan.

MR SPEAKER

Retourn lo Mosyon Onorab.

HON JOHN HOAREAU

Mr Speaker, bokou keksoz in dir ki an deor Mosyon. Alor donn mwan osi sa privez pou mon dir serten keksoz ki an deor Mosyon.

Mr Speaker, nou, nou krwar dan devlopman sa pep, nou krwar ki i nesese pou nou servi nou larzan byen. Servi larzan ki Lepep Seselwa i prodwir atraver son *tax* pou devlopman sa pei, pou devlopman lakaz, pou donn goute nou zanfán, pou renouvle bann fasilite sport, pou donn plis logmantasyon dan servis piblik.

E se sa ki nou'n fer, pandan sa 4an edmi ki nou'n la o pouwar.

Mr Speaker, parey mon dir ki sa biznes ki *SPPF* pe fer avek *NISA* i en keksoz ki moralman i mal.

Ako ou pa kapab pe anrissi en parti atraver Leta Sesel atraver lwen en propriyete avek en konpannyen Leta Sesel.

Mr Speaker, si nou gete *US*, zot, zot in anmas plis ki 132 milyon atraver bann lavant ki zot in fer partou, partou zot in vann Beau Vallon, kot Biro Brans zot in vann English River, zot in vann Saint Louis e zot ti menm anvi vann la deryer kot *Maison du Peuple*.

Eski ozordi zour sa larzan ki zot in ranmase eski zot pe servi sa pou ed zot bann

dimoun ? Non. O kontré ki zot fer ? zot ekrir en fo let, dir sa bann dimoun vin demann nou *fridge*, *cooker* e anvoy sa kot *State House* an krwayan an di-z-an ki zot bezwen led. Be si zot ti annan serten lanmour prop ,eski sa i en keksoz pou zot fer?

Mr Speaker, nou, nou pa *bribe* personn pou Eleksyon nou. Dimoun i vin vote aköz i vwar ki wi dimoun i vin vot pou nou aköz i vwar ki nou'n fer pou zot.

MR SPEAKER

Arete.

HON JOHN HOAREAU

E avek sa Mr Speaker, e avek sa mon pou dir dimoun reste ferm dan zot krwayans avek nou. Kontinyen sipòrt nou. Aköz nou pou kit li lanmenm nou pa pou les tonbe. Mersi.

MR SPEAKER

Mersi Onorab, pou fer li ase kourt. Ou'n sov nou en pe letan. Onorab Sultan.

HON VALDANA SULTAN

Mon lanmenm Onorab. Mersi Mr Speaker.

(comments off-mic)

MR SPEAKER

Arete, arete! Onorab Sultan ou annan laparol.

(comments off-mic)

MR SPEAKER

Arete silvouple. Yes, Onorab konmanse.

HON VALDANA SULTAN

Mersi Mr Speaker. Bonn apre midi Mr Speaker ek bann koleg Onorab.

Mr Speaker, atraver ou mon pe esper Onorab Pillay konnen wi, mon la. Mon annan mon letan.

Mr Speaker, mon ti napa okenn lentansyon pou koz lo la, sanmenm sa Onorab petet pe mazine mon pa ti pou la, mon pa la, me mon zis anvi fer pas mon pwennvi lo sa size.

Mon pou reste lo Mosyon mon pa pou long. I zis ki mon anvi pas mon refleksyon, mon analiz.

Mr Speaker, *NISA* ki i en antite piblik e sipoze fonksyonnen endepandaman pou mon pa devret pe fer biznes avek en parti politik ki apel *US*.

E lefe ki zot pe fer sa parti sa biznes avek zot, i fer nou doute si vreman *NISA* ti vreman endepandan anba ladministrasyon *US*, Lepep, Parti *SPPF*?

Mr Speaker, nou'n tann dir ki anba ladministrasyon *US*, bann lartik ti bezwen ganny *vet* ganny *edit* avan *printing*.

Mr Speaker, si sa i vre, eski nou kapab garanti pou servi bann zournal *Nasyon* lepase, konman en sours lenformasyon kredib ?

Akoz nou tou konnen ki bann zournal i souvan ganny servi konman en referans.

Mr Speaker, ler mon reflesir lo tousala i fer mon realize ankore pou ki *NISA* kontinyen fer biznes avek Parti *US* i kree en konfli lentere espesyalman dan en sosyete demokratik kot lendepandans medya i esansyel.

Par Mr Speaker - par *NISA* aret fer biznes avek Parti *US* pou anmenn e ranforsi konfidans piblik dan *NISA* konman en lenstitisyon non-partizan, e osi anmenn plis latransparans dan tranzaksyon finansyel.

Mr Speaker, nou Prezidan Mr Wavel John Charles Ramkalawan in met lanfaz lo depolitiz bann lenstitisyon piblik.

E pou mwan si *NISA* i kontinyen annan relasyon biznes avek Parti *US*, sa i ava demontre en rezistans an ver sanzman.

E Mr Speaker, mon'n tann zot pe akiz nou, nou koronpi, nou isi nou laba, nou ti kapab donn lord *NISA* - zot, zot pa - zot en nouvo *US* me selman Mr Speaker, in menm annan en Manm ki'n deza dir dan lot kote latab ki nou pou

blanm bann *SPPF*, me pa sa *US* ki la.

Mr Speaker, be si zot napa nanryen pou fer avek *SPPF*, akòz zot pe lager son bann byen?

Pou mwan sa i vin parey bann pti zanfàn ki oule byen zot granmanman, me zot pa oule okenn afilyasyon avek granmanman akòz petet son pase...

(APPLAUSE)

HON VALDANA SULTAN

...petet son pase ti annan bann move repitasyon.

Me Mr Speaker, parey mon'n dir mon pou kourt, pou mon ler mon fer sa pti analiz tre kourt, mon vwar ki Mosyon Onorab Henrie i annan merit.

E mwan mon pou donn mon sipor sa Mosyon. Mersi.

(APPLAUSE)

MR SPEAKER

Mersi Onorab pou reste kourt e zeneralman lo Mosyon.

Mon pou donn Onorab Aglae in lev son lanmen lo dernyen moman...

(laughter)

MR SPEAKER

...e Onorab Aglae pou dernyen mon pa pe pran okenn non ankor, Onorab Aglae pou dernyen entervenàn pou sa

Mosyon e Onorab Aglae mon pou donn ou 10 minit.

HON EGBERT AGLAE

Mersi Mr Speaker. Mwan osi mon pa pou long lo sa Mosyon. E vi ki ou pa'n edike poudir lalis in frenmen i mon drwa pou mon lev mon lanmen pou mwan koze.

Mr Speaker, sa Mosyon ki'n ganny anmennen par Onorab Depite Speaker - Onorab Henrie.

(comments off-mic)

MR SPEAKER

Onorab Henrie, trankil. *Order!* Onorab kontinyen.

HON EGBERT AGLAE

Mr Speaker, mon pe respekte Onorab Henrie konman Depite Speaker. Sa Mosyon i en Mosyon ipokrit.

Akòz mon dir sa Mr Speaker? Loter Mosyon dan son resers, i ti'n dwatet apros.

(Interruptions)

MR SPEAKER

Order! Order! Mon pa konnen mon pa konnen lekel ki mon pou met deor, i annan telman i annan telman Manm ki pe fer dezord.

Onorab Pillay, reste trankil. Reste trankil. Onorab Aglae terminen.

HON EGBERT AGLAE

Mr Speaker, mon fek konmanse. Mr Speaker, rezon aköz mon dir sa Mosyon i en Mosyon byen ipokrit, monn tann diferan koze la anndan lo sa mosyon.

E letan zot ti pe koz - zot pe kriye, '*LDS no turning back*,' solman zot pe *turn back* lo en kantite size lepase.

Loter Mosyon dan son prezantasyon i ti dwatet dir nou lo sa kote latab e ki li i en dimoun dapre li i fer son prop resers, i pa kopye lo nanryen i ti'n devret apros *NISA* ouswa *Board NISA*, premyerman demann *NISA* eski Parti *US* e atraver son *subsidy company* ki *Sun Press*, eski *US* in fors *NISA* pou antre dan en Lagreman komersyal.

Eski *US* i kontrol operasyon *NISA* ouswa kontrol son kad ladministrativ?

Mr Speaker, i annan serten Manm lo kote latab ki'n koze, ki'n dir poudir zot dout lendepandans ouswa travay bann zournalis ki travay *NISA* e ki'n kestonnen si bann zournal oparavan i kredib.

Be Mr Speaker, mwan tou bann zournal ki *NISA* i sorti zanmen ki mon'n vwar in vin *praise United Seychelles* mwan. Mon pa'n zanmen vwar sa mon.

O kontrer toulezour ozordi pandan sa 4an nou

vwar portre Prezidan pe fer keksoz lo Nasyon.

Napa okenn editer ki travay ek *US* ki *edit* zournal okenn zournal *NISA*.

So ki mannyer zot kapab vin akiz nou. Si i annan keksoz poudir lo zournalis ozordi se ki *LD* ki met presyon lo zournalis.

(APPLAUSE)

HON EGBERT AGLAE

I annan zournalis ki ti pe fer bann program in ganny dir sorti arete fer. I annan zournalis in ganny deporte dan sa pei lo 24 er. La ozordi zot ava vin koz nou zournalis?

Mr Speaker, en lot pwen ankor, *LDS* depi 2020 Oktob 2020 i o pouvwar. E sizyenm Lasanble mon ti la anndan mwan. Letan nou ti pe pas Bidze la, tou bann antite ki ti pe lwe en landrwa ki swa ki annan ki ek siporter *US* ouswa en lakonpannyen, zot ti fer sorti. E zot pa ti vot lo sa bann Bidze.

Espace la o bor nou i enn sa bann legzanp kot Minister Touris ti bezwen sorti. E ozordi zot in vwar zot in retournen, i annan *bio security* ki laba e i annan lezot lazans ki laba.

Ou vwar sa Mosyon ki la Mr Speaker, i montre ou leta lespri *LDS* ek zot lespri revanz. I annan en kantite keksoz ki

nou'n kapab diskite dan sa Lasanble.

Onorab Loze atraver ou Mr Speaker in koz lo size *TRNUC*. Ki sa bann dimoun pe esper sa Gouvernman apre ki zot in servi *TRNUC* konman en seval batay, pou kapab ganny en *closure*.

Me nanryen pa ankor ganny fer Mr Speaker. Zot pe koz lo lentegrite, zot pe koz lo *lease*, me lo zot kote latab i annan dimoun ki *lease* later ki pou Gouvernman ki'n *sublease* ek lakonpannyen osi, lo zot kote latab i annan, pou plizyer mil Roupri Mr Speaker tou le mwan.

Zot le koz lo lentegrite Mr Speaker, letan zot dir *US* sa letan sizyenm Lasanble ki ti pe lwe en bout later avek *STC* 800 ekek mil ki zot ti fer sorti e zot ti dir letan zot ava sorti *STC* i ava kapab fer pli pri abordab ki pa bezwen pey plis.

Me ozordi prezan ki i annan *middlemen* dan *STC*, *CEO* bann *Chairman* pe fer biznes avek *STC* dan zot prop lakonpannyen.

E pep Seselwa sa ki pe espere pou dir en meyer pri lavi *STC* pa ankor kapab donn nou ozordi.

(APPLAUSE)

HON EGBERT AGLAE

O kontrer *STC* i ava vin dir nou in fer R66 milyon profi lo ledon malere lannen pase.

Zot pa onte *STC*! Zot pa onte aköz *STC* i sipoze en antite ki sipoze fer pri pli abordab pou malere kapab viv.

Mr Speaker, letan nou pe koz ankor lo *NISA*, *NISA* si i ti santi li i dan sa Kontra ki li i annan avek *Sun Press Limited* i ti pou vin devan. E i ti ava dir mon pa satisfè avek sa *deal* ki ou pe donn mwan.

Me ki *NISA* in fer? Atraver ou Onorab Loze in met en let ki *NISA* in demande pou annan bann *maintenance* e lagrandisman dan sa landrwa, pou kapab fer son looperasyon pli meyer.

Be eski en antite ki pa satisfè avek sa lanvironnman ki ladan i pou vin fer en *request* parey pou vin demande pou ki i kapab annan bann tel lagrandisman? Non!

I pirman en mannev politik pou *LDS* pe sey *start* sa masin avan sa *rally* ki zot pe al fer Grand Anse.

E sa masin ki pe ganny difikilte pou *start* parey mon krwar sa 200 loto ki ti dan zot *motocade* e la Mr Speaker, zot swazir pli pti laplenn Grand Anse pou zot al fer zot *rally*.

(APPLAUSE)

MR SPEAKER

10 minit Onorab.

HON EGBERT AGLAE

Mr Speaker, mon pe terminen. Si *LDS* ti konvenki ek krwar dan son lekor i ti ava al lo sa pli gran laplenn swa Anse Royale ouswa vin *Freedom Square* i a konn son lafors.

Mersi Mr Speaker.

MR SPEAKER

Mersi. Mon ava donn laparol Onorab Henrie pou repons lo deba. Onorab, fotespere ou kapab *rise above* tousala e retourn lo ou Mosyon. Mersi.

HON GERVAIS HENRIE

Mersi Mr Speaker. Ankore enn fwa bonn apre midi tou bann dimoun sirtou bann zabitan Mont Buxton. Nou pe apros lafen nou manda, e i reste apepre en mwan pou nou fer dan Lasanble e alor mon krwar i annan en pe leksitasyon an plis.

Me solman parfwa politik i koumsa e mon pa krwar vreman i lentansyon bann Manm pou nou montre nou napa disiplin. I zis arive parfwa e i *ok* pou mwan.

Mr Speaker, mon oule konmans mon *right of reply* an lirzan en bout orizinal mon prezantasyon.

Alor i al koumsa; ler *US* pe pey Gouvernman R49 mil 890 lo en *lease* lo pou en *lease* en later, *NISA* pe pey *US* an

retour R763 mil 848 dan sa menm letan e ki 15 fwa plis sa sonm ouswa 1431poursan an plis.

Mr Speaker, zis mazinen ki par mwan *NISA* pe pey *United Seychelles* R363 mil 654 sa i par mwan. Sa *rental* par mwan i plis ki *United Seychelles* i pey Gouvernman pou son *lease* pou 1an, ki tonm selman R49 mil 890 par an.

Savedir par an *United Seychelles* pe anmas R763 mil mon ava re pran sa, R763 mil 848 avek *NISA*. Me li i pe pey Gouvernman zis R49 mil 890.

Mr Speaker, ler ou *minus* sa sonm ki *United Seychelles* pe pey Gouvernman R49 mil 890 par an dan R763 mil 848 ki *NISA* pe pey *United Seychelles* par an, i fer ki R713 mil 958 pe al dan kof sa parti politik, ki tou le-z-an zis avek sa tranzaksyon avek *NISA*.

E Mr Speaker, sa ki mon oule piblik Seselwa ki'n swiv en pe politik resaman, personnelman mwan Gervais Henrie, mon'n anmenn en konpany sistematik pou ekspoz bann malfer Parti *United Seychelles*.

Akoz mon oule ki dimoun sirtou bann zenn Seselwa, aköz zot ki bezwen siport transformasyon dan sistenm gouvernans nou pei. E mon oule ki zenn i sezi sa. Ler mon ti anmenn Mosyon 2018 lo

deals ki zot ti pe fer avek *STC*, ki Onorab Georges Romain in koz lo la.

Ler mon'n anmenn Mosyon lo lefe ki zot bann Manm pa ti pe deklar zot *asset* e la ozordi ler mon'n anmenn Mosyon lo tranzaksyon biznes ki zot pe fer avek *NISA* se pou ekspoz *US* ki en parti politik ki pe servi pouvwar, pou vol *asset* sa pep pou anrisir zot lekor, zot parti e pou zot kapab kontinyen kontrol nou atraver pouvwar politik.

(APPLAUSE)

HON GERVAIS HENRIE

Mon remersi tou bann Manm ki'n koze lo sa mosyon. Mon'n apresye sirtou bann Manm Mr Speaker, ki'n vin avek zot prezantasyon prepare, kalkile.

Onorab Romain, in konsantre lo lefe ki en antite Gouvernman i bezwen a tou moman e par en konfli, promouvwar prensip enparsyalite akòz i pou reflekte lo son kredibilite.

Onorab Phillip Arissol, in osi koz lo sa size konfli lentere, e ki mannyer nou bezwen anpes en antite leta partikilyer en *media house* ganny servi konman en zouti politik.

Onorab Naidu in met larealite o kler. E kot in dir ler sa Mosyon i vin dan Lasanble nou koze, dimoun i tandè, nou pa'n ale pou nou enpoz lo

direksyon *NISA* pou dir li fer. Sa. Akòz si nou ti fer sa, sa parti minoriter pou kriy lasasen pou dir viktimizasyon napa kankan ki zot pa ti pou fer.

Alor nou vin la e dan mon prezantasyon inisyal monn mansyonn tou sa bann antite ki a mon avi ki ti'n merit pran azir, menm ler mon *MNA* dan parti o pouvwar parti ki dan Gouvernman pou mwan kapab dir poudir nou la anndan nou kapab *operate independently* e sinyal keksoz kot i mal e dir avek sa bann antite pran zot responsabilite akòz zot annan pouvwar legal e zot bann zofisye zot ganny peye pou fer zisteman sa.

And this is where nou demokrasi i bezwen pe ale. Alor oli problemn avek sa?

Onorab Woodcock in dir ki i pa premye fwa ki nou diskrit bann size parey dan Lasanble. Akòz parey in dir, i montre vre karakter sa parti. Kot i annan en keksoz e sa Onorab Sandy Arissol in *expand* lo la. Partou kot *US* in met lanmen Mr Speaker, zis larzan sa pep ki zot in pran, pran, pran e servi kont nou!

Onorab Norbert Loizeau in dir nou poudir labi pouvwar par en parti politik i ganny manifeste atraver diferan fason.

E dan sa ka la nou'n vwar Parti *US* ki'n servi son

pozisyon an 2014, pou li kapab *compel* en antite Leta kont Lalwa parti politik pou li pran en Kontra avek li e en labi resours Leta.

Onorab Hoareau in dir nou sa sonm ki ziska prezan NISA in peye, ki nou ti kapab fer avek ki son term *welfare*, ki son term saler pou travayer, ki son term *long service award* pou bann travayer.

Alor Mr Speaker, mon ti note, ki dan dernyen Konferans Lapres Prezidan Ramkalawan *State House*, en zournalis Nasyon ti demann Prezidan en kestyon apropo sa Mosyon.

E ki mannyer mwan mon'n vwar sa kestyon in vini, konmsidire zot ti annan en pe lafreier bann travayer Nasyon, aköz kekfw zot santi poudir zot lorganizasyon i pe vin konman en size politik dan Lasanble Nasyonal.

Me mon oule reasir zot, ki konman en kolej profesyonnel medya, mon annan zot a ker. Aköz ler zot antite i pran larzan k otreman i kapab re investir dan zot lorganizasyon - me pli enportan dan zot personnelman, e i pran zis konmsi en kado i donn en parti politik tou le-z-an – tou le mwan, ki sa i vedir ?

I enpakte negativman lo abilite NISA pou donn nou en pli bon saler, pou donn nou en

pli bon bonous lafen lannen, pou donn ou plis loportinite lantrennman, pou donn ou bann lezot benefis, par egzanp transpor apre travay en lasirans, aköz ou louvraz konman zournalis i kapab danzere, bann lezot *perks*; i anpes NISA fer bann levennman lakonpannyen kot zot ti kapab sosyalize antre zot travayer, ouswa menm avek ou bann manm fanmir, ouswa avek zot bann *partenaires* e lezot *stakeholders* ki ou travay avek.

I anpese ki zot ganny en meyer landrwa travay. Ozordi zot tou zot pe sere dan en pti landrwa, alor sa Mosyon i ganny anmennen zisteman pou nou met zot sityasyon o kler; met presyon nesaser direk ou endirek lo tou bann antite konsernen pou pran aksyon vizavi sa sityasyon *lease* pou ki zot kondisyon travay konman bann Seselwa, bann profesyonnel Seselwa i amelyore.

E lefe i reste ki nou bezwen demann serten kestyon. *Sun Press Printing* ti lwe en batiman ki ti'n varye avek NISA.

E sa i sa bann travayer ki zot ki'n fer depans lo la. An plis dan Kontra, Onorab Loze tou sa savan ki i savan Mr Speaker, dan tou Kontra letan ou pe *lease* la, i annan en *clause* ki dir ou ki okenn

maintenance ki ou pou fer avek sa propriyete, ou bezwen demann permisyon. I osi senp ki sa, osi senp ki sa

Mr Speaker, *Sun Press Printing*, li i *lease* sa propriyete. Solman peyman i fer lo kont *US*. I annan en problem pou mwan la. E sa, sa bann keksoz ki nou pe dir nou bezwen regarde.

Eski *Sun Press Printing* i annan permisyon pou *sublease* sa keston ki nou oule bann antite i al kot *Attorney Zeneral* i reget sa Kontra, eski i annan permisyon pou li *sublease*? Osi senp ki sa nou pe demande regarde, legalman si non kennsel. Demen bomaten napa okenn larzan pou pey Parti *United Seychelles* e zot napa drwa pou zis dir sorti ale. Non, non, non napa, napa drwa.

Mr Speaker-Mr Speaker la i fer mon trwazyenm manda ki mon vin dan Lasanble. Premye fwa letan mon ti antre an 2007 mon ti ganny swazir pa bann pa Komite *SNP* aköz mon ti posed en kalite ki zot ti santi mon ti kapab anbelir lekip *SNP* an 2007.

Apré bann dirizan Linyon Demokratik Seselwa letan nou'n negosye, in vwar poudir mon annan sa abilite, mon annan sa personnalite, mon annan sa prezans karakter konpetans,

leksperyans pou mwan debout.

E mersi zabitan Mont Buxton pou konfye mwan sa responsabilite an 2016.

Zot re donn mwan en manda 2020 e mon persi a de Mr Speaker mon pou retourn isi mwan an Septanm 2025.

(APPLAUSE)

HON GERVAIS HENRIE

E aköz, aköz? Mon pa'n antre Lasanble apard premye fwa lo tiket *rebate* mon, *I proved myself!*

E en dimoun parey Onorab Pillay, pa kapab montre mon ledwa *comme* kwa mon pa konnen ki mon pe fer ozordi apre midi dan Lasanble Nasyonal.

A de fwa mon'n ganny elekte e mon *challenge* Onorab Pillay atraver ou Mr Speaker, pou vin debout kont mon Mont Buxton e mon ava montre li ki mannyer nou ganny elekte. Mon ava montre li.

Mr Speaker, letan Onorab Pillay, anfet mon ti pe merit pe mansyonnn son non mon aköz in dir mon pa bezwen mansyonnn son non.

Dirizan Lopozisyon e in pran laparol, mon ava dir ek bann dimoun ki pe aspire laba deor i annan en kantite zot pou vin ranplas nou isi la anndan, dan distrik Mont Buxton deza mon konnen

apard mwan i annan ankor 3 lezot ki'n fini met zot non delavan mon swet zot bann sans.

Me mon re asir zot *you are just wasting your time. I'm just going to pass by you like* pa ni bezwen vini. Fini asire.

Mr Speaker, me pou bann ki oule vini, si zot pe rod en legzanp ki mannyer demen pa zanmen, zanmen fer entervansyon Lasanble Nasyonal al regard sa diskour ki *Leader* Lopozisyon in fer lo an repons mon lentervansyon ozordi apre midi.

I ti en diskour ki tou zot bann largiman ti napa fonnman. I ti mank konfidans; largiman ti fay in inyor Lalwa nou *Standing Orders Order 59* ki koz lo *content of speech* ki dir *59 (1)" a member shall confirm his or her observations to the subjects and the discussion and may not introduce matters not therefore not relevant thereto."*

E in al dan tou direksyon, I pa'n kapab reste lo *subject matter*. I pa'n prepare pou li donn en repons menm ler sa Mosyon ti lo *Order Paper* pou plizyer semenn. I pa'n reflesir lo bann largiman ki mwan monn avanse e pou li kapab fer kaskou vitman konman en politisyen *seasonal*, pou li kapab reponn. I pa'n artikil

son bann largiman byen. In napa largiman pe *grounds* pou li defann sa aksyon modi e mal se ki son parti pe fer vizavi *NISA*.

Si- si Sesel annou regard tou bann dimoun ki'n vin kandida Vis-Prezidan Mr Speaker, napa en pli move kandida *VP* ki nou'n deza gannyen e napa en pli move en pli move Dirizan Lopozisyon ki nou'n deza depi retour miltiparti!

(APPLAUSE)

HON GERVAIS HENRIE

Mr Speaker, in vin dir ek mwan oli mon rapor avek bann antite ki monn mansyonnen.

Mon rapor la i la mon pe fer ler mon'n met tou bann pwen devan e mon'n sit sa bann antite sa ki Lasanble Nasyonal i dir i en Lotorite sa lenstitisyon, e aprezan se zot pou reazir lo bann keksoz ki Lasanble Nasyonal in dir.

E i pa okenn labi pouvwar ki nou pe fer. Parski atraver sa Mosyon napa dimoun ki'n ganny touye, napa dimoun ki'n disparet, napa dimoun ki'n ganny egzile forseman. Napa dimoun ki'n ganny prizonnyen ilegalman, napa dimoun ki'n ganny detenir ilegalman. In napa labi pouvwar sa bann keksoz nou, nou pa'n fer.

Mr Speaker, Onorab Loze li monn fini *deal* ek sa zafer let ki'n lir zafer *improvement structures*.

Be sa i dan Kontra. Me Mr Speaker, ler i dir ki son parti pou negosye avek bann viktim *TRNUC*, ki negosyasyon zot pou fer? Pardon zot pa ankor kapab dir, leskiz zot pa ankor kapab demande, mon demann mon lekor ki negosyasyon zot pou fer ek sa bann dimoun?

Pou dir ek zot dan ki rigol e anba ki pon zot pou ganny mete set fwasi? Sa negosyasyon ki zot pou al fer avek sa bann dimoun? Zot napa Lotorite moral pou tous size *TRNUC*.

E Mr Speaker, dan lentervansyon tou bann dimoun lot kote in montre ki zot, zot pa enterese avek la demokrasi. Sel keksoz ki zot enterese avek se pouvwar.

A lafen defen Mr Speaker, apre tou lesplikasyon ki Onorab *Leader* Lopozisyon in fer, en *charlatan speech* in fer ki Seselwa i - bann lesplikasyon ki in donnen sa lo *NISA*, e i annan en sel keksoz ki Lepep Seselwa pou retenir atraver sa Mosyon.

Se ki sa Parti *US* in fer larzan malapropo. In fer larzan malapropo aköz zot in abiz zot pouvwar pou rantre dan tranzaksyon biznes avek *NISA*.

Kestyon zot ti pe merit demann zot lekor, a vin zistifye pou defann zot aksyon se ki mannyer *parcel V8543* i ariv dan zot lanmen an premye lye?

Ki mannyer parti politik i ganny en kare later konble peye par larzan *taxpayers money* Seselwa? I pa ti merit zanmen leka!

Mr Speaker, sa kestyon ki zot ti merit pe demande. Pa zis vin fer *speech just because we think we're pretty face. And we have no substance in what we say.*

Mr Speaker, i kler, i kler aksyon - i kler ki aksyon parti *United Seychelles* i montre nou en keksoz. I montre nou en keksoz. E sa keksoz nou bezwen met li dan en konteks.

Mazinen ki zot ti fer avek *STC* kot *Hypermarket*. Lwe en landrwa avek Gouvernman pou R73 mil par an, me lwe avek *STC* pou R823 mil 333 par mwan.

Mazinen ki zot ti fer avek propriyete *STC* kot zot *hardware Depot* i ete. Mazinen ki zot in fer avek *STC* kot sa *Cold Storage facility* in fek fer.

E dan son diskour kot louvertir, Prezidan Larepublik ti eksprim son lakoler e degou pou sa kalite fason fer Parti *United Seychelles* ki'n *deprive* Lepep Seselwa pou plizyer lannen, zis par pran, pran e pran, pran.

I montre legoizm, i montre vorasite. Otreman nou kapab dir zot egois, zot voras zot gouli, zot anfanmen, zot konn zis pran, pran e kontinyen pran.

Me ler zot pe pran annou pa oublie ou ki pe ekoute poudir zot pran sa ki pou zot pran sa ki pou mon e zot pran sa ki pou nou.

E ki mannyer alor nou kapab nou kapab kontinyen soutir sa parti e nou, nou pe dir tou bann Lotorite konsernen, asize otour en latab kalkile mannyer zot pou re pran sa propriyete V8543 e demen bomaten nou dir sezi e kas sa *lease*.

Mr Speaker, mon ava termin lo sa. E la mon oule koz bann zenn Seselwa. Nou pe apros en letan kritik, dan nou demokrasi kot nou demann zot en fwa tou le 5 an pou vin delavan e pran en desizyon.

E mwan sa ki mon anvi dir avek lazenes Seselwa, i annan en keksoz ki'n konmanse retour miltiparti in vin an 93 e ankor enn fwa mersi tou bann dimoun ki en fason ouswa en lot, in kontribye pou anmenn la demokrasi dan Sesel pou retourn nou dan en sistenm miltiparti.

I annan ki'n kout zot, zot lavi, in kout zot, zot propriyete e enfiniman mwan ozordi mon

la aköz mon pe mon'n bezwen debout lo zot zepol, alor mersi pou tou sa ki zot in fer.

Prezan lazenes Seselwa lavey nou Selebre nou 50tyenm lanniverser Lendepandans.

(comments off-mic)

MR SPEAKER

Koze Onorab, terminen.

HON GERVAIS HENRIE

Mersi Mr Speaker.

MR SPEAKER

Ou'n dir ou pe terminen, terminen.

HON GERVAIS HENRIE

...se ki lazenes i bezwen anpes labi pouvwar politik kontinyen dan nou pei. Zot bezwen konnen ki in pase. Ler nou'n koz lo bann keksoz dan lepase, pa bezwen ganny degou avek sa dir zis nou koz lo lepase.

Nou bezwen konn *textualize* en keksoz, pou nou eksplike aköz nou bezwen fer sa sanzman, me pli enportan aköz nou pa kapab retourn laba kot nou ti ete. Demann o tan kestyon.

Challenge zot bann dirizan. Ler ou desann laba dan en triko rouz dan *United Square challenge* bann dirizan, ensiste ki zot promouvwar bann lideal etik. Anrezistre ou konman en zenn. Al vote vin

menm Manm konman en manm parti politik. Siport s size drwa imen, siport bann linisyativ ki promouvwar latransparans e bon gouvrenans.

E sa Mosyon ozordi se sa ki nou pe fer. I en kontinyasyon dan nou batay konman LDS pou nou anmenn en pli bon Sesel. Ki nou pe demann bann zenn, se dekode zot e avek tou bann parti politik ouswa bann politisyen ki oule kontrol nou. Pa donn zot sa sans; pa donn en parti politik e sirtou bann dirizan okenn drwa annan kontrol lo nou lavi.

E finalman Mr Speaker, ozordi nou'n ekspoze pou vwar pou montre ki en parti politik in fer en keksoz ki mal.

E zot in napa kouraz pou avoue pou dir *ok, ok* kekfw a i annan en keksoz mal la e nou ava pare pou nou asize koz avek zesyen e *Board NISA*, non! menm zafer ler nou ti anmenn bann keksoz *TRNUC* ziska ozordi sa bann dimoun pa kapab demann pardon pou sa ki zot in fer.

Alor nou vwar la poudir nou bezwen en lot kalite Lopozisyon, en Lopozisyon ki pli konstruktiv, en Lopozisyon parey LDS ti fer ant 2016 a 2020.

Alor parey mon ti dir lot zour bann pti parti politik reflesir byen lo sa ki mon pe

dir, organiz zot e silvouple vin pran sa sez isi dan plas *United Seychelles*.

Akoz nou bezwen en Lopozisyon ki pl i responsab, ki pli konstruktiv ki pli bon pou Sesel, ki pli travayan e ki pou kapab ed nou konman en parti ki krwar dan laliberte, pou nou kapab avans bann lideal demokrasi. E kot nou kapab ed bann pozisyon mon pou ed zot pou nou fer sir ki nou met US dan bin listwar enn fwa pou tou. Mersi Mr Speaker.

MR SPEAKER

Bon, avek repons lo deba. Nou ava bot lo Mosyon. E mon krwar zot in tann ase lo sa Mosyon zot pa bezwen pa bezwen ki mon re lir li ankor.

Manm ki an faver lev lanmen silvouple? Mersi. Manm ki kont? Mersi.

Mon ava ganny kont Madanm Clerk lo Mosyon Onorab Gervais Henrie.

(comments off-mic)

MR SPEAKER

Sorry, Speaker pe koze silvouple! Lo Mosyon Onorab Gervais Henrie 20 Manm in vot pour, 9 Manm in vot kont, zero Manm in *abstain*.

Mosyon in aprouve par Lasanble. Mersi.

Avan zot konmans fer tapaz e avan zot bouze, de pti *item* ki nou bezwen fer, premye

Madanm Clerk pou fer en *First Reading* ki pou met en *Bill lo Order Paper*.

MADAM CLERK

Mersi Mr Speaker. *This Act may be cited as the Constitutional Appointees (Amendment) Act, 2025.* Mersi Mr Speaker.

MR SPEAKER

Mersi Madanm Clerk. Mon'n donn onorab Georges laparol pou en mesaz e erezman i pa kontrovers. Onorab Georges, ou laparol.

HON BERNARD GEORGES

Mersi Mr Speaker. Mr Speaker, parey ou'n dir letan i tar nou pa pou pran bokou letan.

Mon ti anvi zis Mr Speaker koz de minit apre midi lo en size ki'n pas devan Lasanble detrwa semenn pase.

Lo Mosyon ratifikasyon, tou le de kote latib ti ratifye serten lamannman lo *the Rome Statute* ki'n konstitye Lakour Penal Enternasyonal. *The ICC Court*.

E ler nou'n fer s isi nou pa ti realize lanpler sa ki nou ti pe fer. Yer oubyen avantyer, avantyer bomaten in annan en *meeting* dan Nasyon-z-Ini *L'Amerique*, e la bann dirizan *Parliamentarian for Global Action (PGA)* ti prezan enkli reprezantan Sesel kot Nasyon-

z-Ini e nou'n ganny felisite konman en Lasanble Nasyonal e konman en pei pou raktifye sa bann lamannman *the Rome Statute*.

Mon ti anvi zis partaz sa avek Lasanble, e pou ki nou realize ki kantmenm nou ptipti, kantmenm nou lwen annan de fwa sa ki nou fer i al bokou pli lwen ki nou lorizon. E sa set en legzanp.

E mon krwar ki nou tou dan sa Lasanble nou tou isi Sesel nou bezwen fyer ki konman en pti Lasanble dan en pti pei nou'n kapab devans bokou pei pou anmenn sa bann lamannman e pou ratifye zot sa bann lamannman ki neser pou anpes bann krim kont bann krim zenosid eksetera, kont limanite e asire ki Sesel i pran son plas parmi bann Nasyon. Mersi Mr Speaker.

(APPLAUSE)

MR SPEAKER

Mersi Onorab Georges. Bon, nou'n terminen pou ozordi, Lasanble i ava *adjourn*.

E parey zot konnen nou annan en program demen maten sanble i ava repran demen 9er pou kontinyen sesyon avek Minis Rangasamy lo bann size ki'n leve deza dan son *statement*. *Adjourn*.

(ADJOURNMENT)

